

# **San Juan peyaquinaelivaisi pacuenia tajëvelia Dioso tsitajëtatsi pacuenia itsijitsia mapanacuataje**

*Pacuenia tajëvelia Jesucristo Dioso tsitajëtatsi,  
juya bajarapacuenia Jesucristo petsitajëtsijava Juan-  
javabelia yabara pelivaisi*

<sup>1</sup> Daxita xuanë Jesucristo tajëvelia Dioso tsitajëtatsi, daxita bajaraxuanë pelivaisi, xanë Juannë, yaquinajë mapabaxutotaje. Bajaraxuanë baja bepijiayo copiapatsiana. Xuanë tajëvelia Dioso tsitajëtatsi Jesús, bajaraxuanë juya Jesús tsitajëtsiana pijajivijavabelia. Bajaraxuata nexata Jesús itorobica pijaángel xanëjavabetsica. Nexata bajaraxuanë jumapecataeya tajëvelia netsitajëta Jesús pijaángel. Neyapëtaeyaxananua pajamatabëcuenelivaisi xaina bajaraxuanë.

<sup>2</sup> Nexata daxita bajaraxuanë pacuenia taniji, pelivaisi yaquinajë mapabaxutotaje. Pacuenia Dioso nejumaitsi, yaquinajë. Pacuenia Jesucristo ata jumaitsi, bajaraxua ata yaquinajë.

<sup>3</sup> Pajivi tsimuxulebiana mapabaxutoje Dioso pejumecovënëtsivi penacaetuatsijavata, jamatabëcuenebarëya tsane. Pamonaë ata namuxunaevetsiana mapalivaisije, nexata itsa jumecovënëtsiana pacuenia Dioso tajëvelia jumaitsi, bajarapamonaë ata jamatabëcuenebarëya tsane. Bajarapacuenia

jamatabëcuenebarëya tsane tsipaji baja imoxoyo  
pevajënae tsaponae pecopiapatsinexa daxita  
xuanë pelivaisi yaquinajë mapabaxutotaje.

*Pacuenia Juan toyaquina siete patomarabejepi-  
jivi, Dioso pejumecovënëtsivi, yabara pelivaisi*

<sup>4</sup> Xanë rabaja Juannë. Pacatoyaquinatsi siete  
papabitsaëtomëbeje, Dioso panejumecovënëtsivi,  
Asiavënë nacuata panejinavanapaevi. Ajena,  
mapamatacabitaje, Dioso ponapona. Dioso  
nacua pexanaevajënaeya ata, Dioso ponapona.  
Daxitamatacabijavabelianexa ata Dioso  
ponapona. Pacatovajëtatsi Diosojavabelia  
papecajamatabëcuene barëyayaexanaenexa,  
papecaayavenonaenexanua. Siete paespíritubeje  
nubena Dioso peecaejava, tronovënëjava,  
pitabarata. Pacatojitsipatsi bajarapamonae  
papecajamatabëcuene barëyayaexanaenexa,  
papecaayavenonaenexanua. <sup>5</sup> Jesucristojavabelia  
ata bajarapacuenia pacatovajëtatsi. Jesucristo  
baja cajena pexaniajailivaisi, Dioso pejumelivaisi,  
jivi tsipaebabiaba. Daxita petëpaevivecua, Jesús  
baja namataxainaeya Dioso asaëyaexanatsi  
petëpaejavavecua. Mapanacuata jivi pevetsivi  
ata matatoxenetsia, Jesús pepo pevetsinë daxi-  
tacuene. Jesús vajanacaasivaxae, nacasivatëpa.  
Nexata baja nacavecuaajibiaexana daxita  
pibisiacuene vajaexanaeneconimi. <sup>6</sup> Nexata  
baja Jesús pijajivitsi nacaexana itsamatacabi  
vajanacabarëevetsinexa daxitacuene. Jesús  
baja nacaexananua sacerdotevitsi, Jesús paxa  
Diosojavabelia jivi vajatovajëtabiabinexa. Nexata

vaxaitsi daxitamatacabijavabelianexa ayaija-matabëcuene rajutabiabianatsi Jesúsjavabelia. ¡Apo vereverecae tsane Jesús daxitacuene pevetsijava! Bajara itsi tsane.

<sup>7</sup> ¡Panenamuxunaevere mapalivaisije! Cristo raja najetarucaena athëbëvetsica itarërëbota. Pamatacabi Cristo najetarucaena athëbëvetsica, daxitajivi taenatsi. Pamonaë ata yenecacuatatsi, bajarapamonaë ata taenatsi. Daxita nacuanëpijivi, pamonaë Dioso apo pejumecovënëtsivi, itsa taena Cristo penajetarucaejava athëbëvetsica, nuena pecajunavi. Bajara itsi tsane jivi itsa taena Cristo athëbëvetsica penajetarucaejava.

<sup>8</sup> Jesús nayabarajumaitsi mapacueniaje: “Xanë rajane baja daxitacuene pepo tataxuxuabinë. Xanë rajane baja icatsia daxitacuene tacopiarucaeyaexanaenënexa,” nayabarajai Jesús daxitacuene pevetsinë, daxitacuene pexanaenexa ata pecaëjëpaenëtsi. Ajena mapamatacabitaje Jesús ponapona. Dioso nacia pexanaevajënaeya ata, Jesús ponapona. Daxitamatacabijavabelianexa ata Jesús ponapona.

*Pacuenia Juan Jesús yacotiaya tsitanaitajëtsi yabara pelivaisi*

<sup>9</sup> Xanë Juannë, panijabananënë. Tsipaji najuajumecovënëtavanapatsi Jesucristo. Nexata pacuenia paxamë ata itsamonae pacabejiobiaexanapona Dioso papijajivixaemë, bajara pijinia pacuenia xanë ata itsamonae nebejiobiaexanapona. Jesucristo pijajivitsi nacaexana itsamatacabi vajanacabarëevetsinexa

daxitacuene. Jesucristo papecayavenonaexae, pacaasaēmē tsavanapae Dioso panejume-covēnētsijava. Bajara pijinia xanē ata itsinē. Dioso pejumelivaisi jivi tatsipaebabiabixae, naneconitsia ponaponajē Patmosvënë tunaetota. Jesucristo pelivaisi ata jivi tatsipaebabiabixae, naneconitsiaponaponajē.

<sup>10</sup> Nexata Patmosvënë tunaetota domingota Espíritu Santo netsijamatabēvënëca. Nexata tapēnēverena pecuaicuaijajava ayaijume, betrompetajume penajumetsijava, jumetaniji.

<sup>11</sup> Pecuaicuaijajava nejumaitsi mapacueniaje:

—Xanē rajane baja daxitacuene pepo tataxuxuabinē. Daxitacuene icatsia tacopiarucaeyaexanaenēnexa. Xua baja taneme, bajaraxua baja pelivaisi copiaya yaquinare. Xuanē ata icatsia aeconoxae taeponaename, bajaraxuanē ata pelivaisi yaquinaename. Bajaraxuacujinae bajarapalivaisi toitorobianame Dioso pejumecovēnētsivi, siete patomarabejipijivijavabelia, Asiavënë nacuata pejinavanapaevi. Toitorobianame bajarapalivaisi Efeso tomarapijivijavabelia, Esmirna tomarapijivijavabelia ata, Pérgamo tomarapijivijavabelia ata, Tiatira tomarapijivijavabelia ata, Sardis tomarapijivijavabelia ata, Laodicea tomarapijivijavabelia ata, nejai mapacueniaje tapēnēverena pecuaicuaijajava.

<sup>12</sup> Nexata napēnēyorotajē tataenexa ponē tapēnēverena nebarēcuaicuaijai. Nexata taenubajē siete xuabeje orota pexanaejavanē. Bajaraxuanē pematatuta naitayotanubena. <sup>13</sup> Bajaraxuanē

petuatuajëta taenutajë pebi. Bajaraponë yabara jamatabëjumaitsinë:

—Jesús raeta, Daxitajivi Pematapijinë, jamatabëjanë.

Bajaraponë penaxatatsijava apiareca. Nacorobëcëtanuca orota pexanaepana.

<sup>14</sup> Mataniojai bitso pacuenia baniojai papaëputo. Pitaxutobeje naitayota. Pacuenia isotocotia bacotia itsi, bajara itaxutocotia itsi.

<sup>15</sup> Petaxubeje ata nivenivenabeje pacuenia banivenivena broncevënëjava pesetsijava, beoronanitomi. Pecuaicuaijajava najumeta pacuenia banajumeta jonca.

<sup>16</sup> Pecujuanenia cobenanuca siete patuluputobeje. Pecuibuatsina pitsapa anijabarëneniabeje pexiujaiespada. Pacuenia matabipijijumeto itsa aitaavajënae, xaniavaetsia baitayota, bajarapacuenia itabaranaitayota.

<sup>17</sup> Itsa taniji bajaraponë, betatëpaenë irataeya bocajunuajë bajaraponë pitabarata. Itsiata baitsi jane bajaraponë nejayarena pecujuacobeta. Nejumaitsi:

—Pëtsa necujunavame. Xanë rajane baja daxitacuene pepo tataxuxuabinë. Daxitacuene icatsia tacopiarucaeyaexanaenënexa.

<sup>18</sup> Xanë rajane baja pepo tasaëtsaponaponanë daxitamatacabijavabelianexa.

Xanë picani tēpajë. Itsiata baitsi jane icatsia asaënë tatēpaecujinae. Nexata baja asaënë tsaponaponae daxitamatacabijavabelianexa. Dioso netocopata tacapanepaenexa tajajivi peponaeyaniva infiernojavabelia. Netocopatanua tananeconitsiaexanaenexa pijaneconi pexainaevi

peponaenexa infiernojavabelia. <sup>19</sup> Xua baja taneme, bajaraxua baja pelivaisi yaquinare. Xuanë ata icatsia aeconoxae taeponaename, bajaraxuanë ata pelivaisi yaquinaename. <sup>20</sup> Xuanë, siete patuluputobeje, tacujuanenia cobenanucajë, mapajamatabëcuenelivaisi xainaje. Siete rabaja pijinia patomarabejepijivi Dioso pejumecovënëtsivi penamatacaitorobivi tsavanapae. Xuanë pijinia siete xuabeje orota pexanaejavanë pematatuta naitayotanubena, mapajamatabëcuenelivaisi xainaje. Siete rabaja pijinia patomarabejepijivi Dioso jumecovënëtavanapa, nejai Jesús, ponë taenutajë, siete xuabeje orota pexanaejavanë tuatuajëta penucaenë.

## 2

*Pacuenia Juan vajatuxanenë Jesús itorobatsi petoyaquinaenexa Efeso tomarata Dioso pejumecovënëtavanapaevi penamatacaitorobinëjavabelia yabara pelivaisi*

<sup>1</sup> Jesús icatsia nejumaitsi:

—Efeso tomarata peecaenë, Dioso pejumecovënëtavanapaevi penamatacaitorobinëjavabelia, toyaquinare. Nexata daxita pijajivi yajava yapëtaena mapalivaisije, nejai Jesús, ponë siete patuluputobeje pecujuanenia cobenanuca, siete xuabeje orota pexanaejavanë pematatuta penaitayotanubenaejavanë tuatuajëta penucaenë.

Jesús nitoroba Efeso tomarata peecaenë, Dioso pejumecovënëtavanapaevi penamat-acaitorobinëjavabelia, tatoyaquinaenexa mapejumaitsilivaisije: <sup>2</sup> “Yapëtaniji daxita xua paexanavanapame. Yapëtanijinua ayaicuenia Dioso panetonacuenebijava. Yapëtanijinua ajamatabëcuenesaëya Dioso panejume-covënëtavanapaejava. Yapëtanijinua panecuenenatae-jitsibijava pibisiacuene pexanaevi. Yapëtanijinua nayajivitaeya panejinavanapaejava itsamonae papecayamaxëitojorobianiva. Itsamonae picani papecayamaxëitojorobinexa, pacajumai tsabiabi: ‘Paxanë raja paapóstolevinë,’ pacajai tsabiabi. Itsiata penajumetsënëtsivicuene payapëtaeyabiabame panenayajiviyapëtaexae. <sup>3</sup> Paxamë bajayajebi pacaajamatabëcuenesaëmë tsavanapae Dioso panejumecovënëtavanapaejava, itsamonae pacabejiobiaexanabiabi ata. Ayaicue-nia panacuenebame patacaitorobicuene. Apo payabaracueranaemë cajena. Bajarapacuenia panenacuenebavanapaexae, pacasivajamatabëbarëyatsi. <sup>4</sup> Itsiata baitsi jane caejavayo yabara pananeconitame xanëjavaberena. Tsipaji aeconoxae apo panejitsipaemë pacuenia picani bajayata copiaya panejitsipame. <sup>5</sup> Panenajamatabënapire icatsia pacuenia bajayata panejitsipame. Panajamatabëcuenepënëyorore xanëjavaberena. Panetonacuenebavanapare icatsia pacuenia bajayata xaniavaetsia panetonacuenebavanapame. Itsa baja apo panejitsipaemë tsane icatsia, nexata baja apo patajajivimë tsane. <sup>6</sup> Itsiata baitsi jane pacasivajamatabëcuenebarëyatsi pataneja-

matabëcuenejëpaexaemë mapacuene yabaraje. Pacujiruitoyamë nicolaítavi pibisiacuene pexanaponaejava. Bajaraxua pexanaejava xanë ata cujiruitoyanë. <sup>7</sup> Itsa pamuxuvojorubename, panatojumetaema pacuenia Espíritu Santo jumaitsi Dioso pejumecovënëtsivijavabelia. Jumaitsi mapacueniaje: ‘Pajivi Cristo jumecovënëtaponapona ëpetëpaejavabelianexa, bajarapajivi Dioso tocopatsianatsi pejonenexa Dioso pijanacuayabetsia,’ jai Espíritu Santo,” pejailivaisi toyaquinare Efeso tomarata peecaenë, Dioso pejumecovënëttavanapaevi penamatacaitorobinëjavabelia, nejai Jesús, siete xuabeje orota pexanaejavanë tuatuajëta penucaenë.

*Pacuenia Juan vajatuxanenë Jesús itorobatsi petoyaquinaenexa Esmirna tomarata Dioso pejumecovënëttavanapaevi penamatacaitorobinëjavabelia yabara pelivaisi*

<sup>8</sup> Jesús icatsia nejumaitsi:

—Esmirna tomarata peecaenë, Dioso pejumecovënëttavanapaevi penamatacaitorobinëjavabelia, toyaquinare daxita pijajivi yajava peyapëtaenexa mapalivaisije, nejai Jesús, ponë daxitacuene pepo petaxuxuabinë, daxitacuene icatsia pecopiarucaeyaexanaenënexa.

Bajaraponë picani tēpa. Itsiata baitsi jane icatsia asaë petëpaecujinae. Nexata baja asaë tsaponaponae daxitamatacabijavabelianexa. Jesús nitoroba Esmirna tomarata peecaenë, Dioso pejumecovënëttavanapaevi penamatacaitorobinëjavabelia, tatoyaquinaenexa

mapejumaitsilivaisije: <sup>9</sup> “Yapētāniji daxita xua paexanavanapame. Yapētānijnua itsamonae papecabejiobiaexanaponaejava. Yapētānijnua bepanejiobivicuene. Itsiata baitsi jane itsamatacabi Diosojavatatsia bitso panexainaevi tsane. Yapētānijnua pibisiacuenia papecabaracuaicuaijajava judíovi, Dioso apo pejumecovēnētsivi. Bajarapamonae cajena saya dovathi pijajivi. <sup>10</sup> Pētsa pacujunavame itsamonae, pacabejiobiaexanaejitsia ata. Dovathi raja pejamatabēcueneta penaneconitsivi pejebabiabibota, pacananeconitsiaexanejebiana. Bajarapacuenia pacananeconitsiaexanejebiana dovathi papecajamatabēcueneyapētaenexa xaniajai pepacuene patanejumecovēnētsijavamē. Pacabejiobiaexanaponaena diez pamatacabibeje. Bajarapacuenia pacaexanae ata tsane, itsiata panejumecovēnētsianame matapania panetēpaejavabelianexa. Nexata xanē pacara-jutsianatsi matacabi apo pevereverecaejava. <sup>11</sup> Itsa pamuxuvojorubename, panatojumetaema pacuenia Espíritu Santo jumaitsi Dioso pejumecovēnētsivijavabelia. Jumaitsi mapacueniaje: ‘Pajivi Cristo jumecovēnētaponapona ēpetēpaejavabelianexa, bajarapajivi apo itsacueniabi tsanetsi cotocaevi patēpaejava,’ jai Espíritu Santo,” pejailivaisi toyaquinare Esmirna tomarata peecaenē, Dioso pejumecovētavanapaevi penamatacaitorobinējavabelia, nejai Jesús, siete xuabeje orota pexanaejavanē tuatuajēta penucaenē.

*Pacuenia Juan vajatuxanenē Jesús itorobatsi petoyaquinaenexa Pérgamo tomarata Dioso pejumecovēnētavanapaevi penamatacaitorobinējavabelia yabara pelivaisi*

<sup>12</sup> Jesús icatsia nejumlahitsi:

—Pérgamo tomarata peecaenē, Dioso pejumecovēnētavanapaevi penamatacaitorobinējavabelia, toyaquinare daxita pijajivi yajava peyapētaenexa mapalivaisije, nejai Jesús, ponē pecuibuatsina pitsapa anijabarēneniabeje pexiujaiespada.

Jesús nitoroba Pérgamo tomarata peecaenē, Dioso pejumecovēnētavanapaevi penamatacaitorobinējavabelia, tatoyaquinaenexa mapejumlahitsilivaisije: <sup>13</sup> “Yapētaniji daxita xua paexanavanapame. Yapētanijinua dovathi pijajivi tuatuajēta panejinavanapaejava. Itsiata baitsi jane pajamatabēcuenesaēmē tsavanapae patanejumecovēnētavanapaejavamē. Bajayata Antipaspijinē tajumelivaisi jivijavabelia tsipaebabiaba. Nexata Antipaspijinē paxamē tuatuajēta dovathi pijajivi pebeyaxuabijavatsi, patae atamē, itsiata apo pacopatsimē patanejumecovēnētavanapaejavamē. Bajara-pacuenia patanejumecovēnētavanapaexaemē, pacasivajamatabēcuenēbarēyatsi. <sup>14</sup> Itsiata baitsi jane itsajamatabēcuenējavaxi yabara pananeconitame xanējavaberena. Bajarajota Pérgamo tomarata paxamēyajuvēnēvi muxubijiapenetapona itsamonae pibisiacue pexanaenexa. Bajayata Balaampijinēmi jivi peyamaxēitojorobabiabinēmi ponapona. Nexata Israelpijinē pemomoxi penaneconitsinexa Dioso-javabelia, Balaampijinēmi itoroba Balacpijinēmi

pemuxubijiapenetaponaenexa Israelpijinē  
 pemomoxijavabelia. Nexata Balacpijinēmi  
 muxubijiapeneta Israelpijinē pemomoxi  
 penaponaenexa fiestajavabelia. Nexata  
 fiestajavata itsamonae dajubinē itsa beyaxuaba,  
 jumapecataeya pexanaenēanējavabelia  
 ofrendacuenia perajutsiyajuvēnēvi naxane  
 Israelpijinē pemomoxi. Balacpijinēmi  
 muxubijiapenetanua Israelpijinē pemomoxi  
 pibisiacuene pexanaenexa pevitota. Bajara  
 pijinia pacuenia aeconoxae paxamējajuvēnēvi ata  
 exanapona. Pérgamo tomarapijivi pibisiacuene  
 pexanaenexa, muxubijiapenetapona.

<sup>15</sup> Itsamonae pijinia paxamējajuvēnēvi nicolaítavi  
 petsipaebaponaelivaisi jumecovēnētavanapa.  
 Nexata tanejumecovēnētsivi pibisiacuene  
 pexanaenexa, bajarapamonae muxubijiapene-  
 tapona. <sup>16</sup> Bajaraxuata paxamē xaniavaetsia  
 panajamatabēcuenepēnēyorore Diosojavabelia.  
 Itsa jume, xanē nexata naxanitsiayo ponaenajē  
 paxamējavabereca tabarēnabenexa bajarapamonae  
 tacuibuatsina pepitsapaeespadata. <sup>17</sup> Itsa

pamuxuvojorubename, panatojumetaema  
 pacuenia Espíritu Santo jumaitsi Dioso  
 pejumecovēnētsivijavabelia. Jumaitsi mapacue-  
 niaje: ‘Pajivi Cristo jumecovēnētaPONAPONA  
 ēpetēpaejavabelianexa, bajarapajivi rajutsianajē  
 pexaenexa manávēnējaya, athēbēpijijaya,  
 pejamatabēcuenē asaēyaexanaejavanexatsi.  
 Rajutsianajēnua penioponaEIBOTO. Bajarapaiboto  
 pijumata bajarapajivi vēnērutsianajē pejanavēnē.  
 Itsajivi ata apo vēnēyapētae tsanetsi. Caejivi,  
 bajarapaiboto pepitsijivi, navēnēyapētaena,’

jai Espíritu Santo,” pejailivaisi toyaquinare Pérgamo tomarata peecaenë, Dioso pejumecovënëtavanapaevi penamatacaitorobinëjavabelia, nejai Jesús, siete xuabeje orota pexanaejavanë tuatujëta penucaenë.

*Pacuenia Juan vajatuxanenë Jesús itorobatsi petoyaquinaenexa Tiatira tomarata Dioso pejumecovënëtavanapaevi penamatacaitorobinëjavabelia yabara pelivaisi*

<sup>18</sup> Jesús icatsia nejumaitsi:

—Tiatira tomarata peecaenë, Dioso pejumecovënëtavanapaevi penamatacaitorobinëjavabelia, toyaquinare pijajivi yajava peyapëtaenexa mapalivaisije, nejai Dioso pexënato, ponë pitaxutobeje naitayota. Pacuenia isotocotia bacotia itsi, bajara pitaxutocotiaitsinë, ponë petaxubejenivenivena ata pacuenia banivenivena broncevënëjava pesetsijava, beoronanitomi.

Jesús nitoroba Tiatira tomarata peecaenë, Dioso pejumecovënëtavanapaevi penamatacaitorobinëjavabelia, tatoyaquinaenexa mapejumaitsilivaisije: <sup>19</sup> “Yapëtaniji daxita xua paexanavanapame. Yapëtanijinua itsamonae ata paneasivatsavanapaejava. Yapëtanijinua patanesivanajamatabëcuene copatavanapaejavamë. Yapëtanijinua panetonacuenebijava Dioso. Yapëtanijinua paneajamatabëcuenesaë tsavanapaejava, itsamonae pacaitsacueniababiabi ata. Yapëtanijinua pacuenia panetonacuenebavanapame pamatacabi ajena panejumecovënëtame. Yapëtanijinua

pacuenia jane baja aeconoxae bitsoyo panetonacuenebavanapame. Bajarapacuenia paneexanavanapaexae pacasivajamatabëbarëyatsi. <sup>20</sup> Itsiata baitsi jane itsajamatabëcueneyo yabara pananeconitame xanëjavaberena. Tsipaji apo pacujiruitavetsimë Jezabelvënëva pibisiacuene pexanaejava. Bajarapova beprofetava, Diosojumelivaisi bepepaebiva, natane. Nexata patajajivimë bajarapova pacayajuvënëyamaxëitojorobapona baja. Bajarapova papecayajuvënë yamaxëitojorobinexa jumai tsabiabi: ‘Pebijivi pijavavecua jaitsi ata itsava, itsiata apo itsacuene. Bajara pijinia itsi petiriavi ata. Itsanë jaitsi ata pamonavecua, itsiata apo itsacuene. Bajara pijinia itsi pevi ata. Dajubinë itsa beyaxuaba ofrendacuenia pevi perajutsinexa jumapecataeya pexanaenëanëjavabelia, bajarapaviyajuvënëjava xae atatsi, itsiata apo itsacuene,’ jai tsabiabi bajarapova patajajivimë papecayajuvënë yamaxëitojorobinexa. <sup>21</sup> Bajarapova picanì pecopatsijava pibisiacuene pexanabiabijavavecua, bajayajebi evetaponaponajë. Itsiata baitsi jane apo jamatabëcopatsi pevitota pibisiacuene pexanabiabijava. Apo najamatabëcuenepënëyorotsi xanëjavaberena. <sup>22</sup> Bajarapova nexata avitaniaexanaenajë camata pebobocaenexa. Nexata pamonaë paxamëyajuvënëvi itsa apo copatsi tsane bajarapova pitorobicueniatsi pexanavanapaejava, pamatabëxëyo pevitota pibisiacuene exana bajarapova pitorobicueniatsi, nexata bajarapamonaë ata bitso nabejibitsiaexanaenajë. <sup>23</sup> Bajarapova pexi

ata verebiabianajë. Nexata daxita Dioso pejumecovënëtsivi nejamatabëcueneyapëtaena. Nejamatabëcueneyapëtaena daxitajivi bēpēnēa pejamatabēēthētota, penajamatabēxainaecuene ata, tayapëtaenēcuene. Pacaejivimē canacujitsia xuavajëto panetonacuenebavanapame, bajara pijinia pitsijavavajëto pacarajut-sianatsi. Xuavajëto pijinia panijaneconi paxainame, bajara pijinia paneconivajëtota pacananeconitsiaexanaponaenatsi. <sup>24</sup> Paxamē apo panejumecovënëtsivi, Jezabel pacaitorobi ata pibisiacuene picani paneexanaenexa, mapacuenia pacajumaitsitsije. Paxamē apo pajumecovënëtsimē dovathi pijalivaisi, palivaisi Jezabel jivi tsipaebapona. Bajarapalivaisita cujarubapona dovathi pijacuene pevajënaeyabelia peyapëtaeyaexanaponaenexa. Bajaraxuata apo pacaitorobitsi panejumecovënëtsinexa pematatsēnēa itsalivaisi, piyapëbejelivaisi. <sup>25</sup> Nexata pacaasaēmēre tsavanapae panejumecovënëtsijava Dioso pejumelivaisi matapania ëtapatsimatacabitsica javabelianexa. <sup>26</sup> Itsamonae ëpetëpaejavabelianexa, catsitecavanapaena tanesivanajamatabëcuene copatavanapaejava. Tajitsipaecuene ata netoexanavanapaena. Bajarapamonae itsamatacabi tocopatsianajë pevetsinexa daxitanacuapijivi. <sup>27</sup> Bajarapamonae itsamatacabi daxitanacuapijivi itsa evetsiana, ajumesaëya itorobabiabiana pejumecovënëtsinexatsi. Pacuenia xanē ata taxa netocopata daxitanacuapijivi taevetsinexa, bajara pijinia pacuenia bajarapamonae ata pevetsinexa daxitanacuapijivi, tocopatsianajë.

Pacuenia atsananito pefaratsicanalito toxobi-  
 axuabatsi, hierronaebota itsa conitaxuabatsi,  
 bajara pijinia itsanetsi pamonae Dioso apo  
 pejumecovënëtsivi. Tajajivi verebiabiana daxita  
 Dioso apo pejumecovënëtsivi. <sup>28</sup> Pamonae tajajivi,  
 rajutsianajë pexainaenexa papinijicotia xainajë  
 ayaijamatabëcuenevinexa. <sup>29</sup> Itsa pamuxuvo-  
 jorubename, panatojumetaema pacuenia Espíritu  
 Santo jumaitsi Dioso pejumecovënëtsivijavabelia,”  
 pejailivaisi toyaquinare Tiatira tomarata  
 peecaenë, Dioso pejumecovënëtavanapaevi  
 penamatacaitorobinëjavabelia, nejai Jesús,  
 siete xuabeje orota pexanaejavanë tuatuajëta  
 penucaenë.

### 3

*Pacuenia Juan vajatuxanenë Jesús itorobatsi  
 petoyaquinaenexa Sardis tomarata Dioso pejume-  
 covënëtavanapaevi penamatacaitorobinëjavabelia  
 yabara pelivaisi*

<sup>1</sup> Jesús icatsia nejumaitsi:

—Sardis tomarata peecaenë, Dioso pejume-  
 covënëtavanapaevi penamatacaitorobinëjavabelia,  
 toyaquinare pijajivi yajava peyapëtaenexa  
 mapalivaisije, nejai Jesús, ponë xaina  
 siete paespíritubeje, Dioso pijaespíritu, ponë  
 cobenanuca siete patuluputobeje.

Jesús nitoroba Sardis tomarata peecaenë,  
 Dioso pejumecovënëtavanapaevi penamat-  
 acaitorobinëjavabelia, tatoyaquinaenexa  
 mapejumaitsilivaisije: “Yapëtaniji daxita xua  
 paexanavanapame. Yapëtanijinua itsamonae  
 papecasivajamatabëjumai tsabiabijava:

‘Bajarapamonae bitso tonacuenebavanapa Dioso pijacuene,’ papecasivajamatabējai tsabiabijava. Itsiata baitsi jane xanē yapētaniiji pibisiacuene paneexanaejava. Yapētanijinua bēpēnēa panejamatabēcuenefaefaenaejava patanejumecovēnētsijavamē.<sup>2</sup> Nexata namataenetsia panajamatabēcuenesaēyaexanare. Pajamatabēcuenetsamonae papecasivajamatabējumai tsabiabijava: ‘Bajarapamonae bitso tonacuenebavanapa Dioso pijacuene,’ papecasivajamatabējai tsabiabijava. Itsiata baitsi jane xanē yapētaniiji pibisiacuesaēya exanaenamenua itsamonae ata, pamonae pijinia jamatabēcuenefaefaenapona tanejumecovēnētsijava. Tsipaji baja bajarapamonae imoxo pecopatsi tanejumecovēnētsijavami. Xua paexanavanapame, bajaraxua picanī paxamē pacatsitapexaniacuene. Itsiata baitsi jane bajaraxua Dioso apo tsitapexaniacuenetsi.<sup>3</sup> Panajamatabēnapire palivaisi baja copiaya itsamonae pacatsipaeba xanē patacacapanepaejavanexa yabara. Pacaasaēmēre tsavanapae bajarapalivaisi panejumecovēnētavanapaejava. Pacopabare pibisiacuene paneexanabiabijava. Panajamatabēcuenepēnēyorore Diosojavabelia. Namataenetsia itsa apo panajamatabēcuenesaēyaexanaemē tsane patanejumecovēnētsijavamē, nexata jemata patsiarecajē patacananeconitsiaexanaenexa. Apo payapētaemē tsane paepatota patsijitsianēreca. Tsipaji paepatota apo panejamatabēnajinaemē, jemata patsiarecajē. Pacuenia penacobetoxotsinēnexa jemata bapata,

paepatota apo jamatabënajinaetsi, bajara pijinia xanë ata itsinë tsane. <sup>4</sup> Paxamë Sardis tomarata panejinavanapaevi, itsamonae paxamëyajuvënëvi pibisiacuene apo exanae. Pacuenia itsi pamona apo toaxuiratsi penaxatabijavanë, bajara pijinia jamatabëcueneitsi tsavanapae bajarapamonae Dioso pitabarata aneconijibia pejinavanapaexae. Itsamatacabi bajarapamonae xanëjavata jinavanapaena. Bajarapamonae itsamatacabi xanëjavata itsa jinavanapaena, planeconijibixae, naxatabiana penioponaejavanë. <sup>5</sup> Pamona nejumecovënëtavanapaena ëpetëpaejavabelianexa, bajarapamonae naxatabiana penioponaejavanë. Bajarapamonae apo vënëiquinaenë tsane pabaxutota vënërubena pamona matacabi apo pevereverecaejava pexainaevinexa. Biji rajane pamona tajajivi, vënëyapëtaeyaexanaponaenajë taxajavabelia, taxa pijaängelevijavabelia ata. <sup>6</sup> Itsa pamuxuvojorubename, panatojumetaema pacuenia Espíritu Santo jumaitsi Dioso pejumecovënëtsivijavabelia,” pejailivaisi toyaquinare Sardis tomarata peecaenë, Dioso pejumecovënëtavanapaevi penamatacaitorobinëjavabelia, nejai Jesús, siete xuabeje orota pexanaejavanë tuatujëta penucaenë.

*Pacuenia Juan vajatuxanenë Jesús itorobatsi  
petoyaquinaenexa Filadelfia tomarata  
Dioso pejumecovënëtavanapaevi penamata-  
caitorobinëjavabelia yabara pelivaisi*

<sup>7</sup> Jesús icatsia nejumaitsi:

—Filadelfia tomarata peecaenë, Dioso pejumecovënëtavanapaevi penamatacaitorobinëjavabelia,

toyaquinare pijajivi yajava peyapëtaenexa mapali-  
vaisije, nejai Jesús, ponë pianeconijibinë, ponë  
copiaevetavanapatsi icatsia pepatsijavanexatsica  
vajanacacapanepaenexa.

Pacuenia bajayata Davidpijinë eveta  
Israelnacua, bajara pijinia pacuenia Jesús  
evetsiana mapanacuaje. Evetsiana athëbëtatsia  
ata, Dioso pijanacua. Nexata itsamatacabi  
Jesús pijajivi itorobiana daxitanacuanëjava  
jivi petsipaebanajetarubenaenexa Diosojav-  
abelia pecapanepaelivaisinexatsi. Nexata  
panacuanëjava Jesús pijajivi itorobiana,  
bajarapanacuanëjava pejinavanapaevi Jesús  
pijajivi tsipaebanajetarubenaena Diosojavabelia  
pecapanepaelivaisinexatsi. Nexata itsajivi  
ata apo caëjëpaetsi tsane Jesús pijajivi  
pitavetsinexa petsipaebanajetarubenaeyaniva  
bajarapanacuanëjava pejinavanapaevi.  
Panacuanëjava pijinia Jesús pijajivi apo tocopatsi  
tsane Diosojavabelia jivi pecapanepaeliv-  
aisinexatsi petsipaebanajetarubenaenexa,  
bajarapanacuanëjava pejinavanapaevi Jesús  
pijajivi apo tsipaebanajetarubena tsane. Nexata  
itsajivi ata apo caëjëpaetsi tsane Jesús pijajivi  
pitorobinexa petsipaebanajetarubenaenexa  
bajarapanacuanëjava pejinavanapaevi. Jesús  
nitoroba Filadelfia tomarata peecaenë,  
Dioso pejumecovënëtavanapaevi penamat-  
acaitorobinëjavabelia, tatoyaquinaenexa  
mapejumaitsilivaisije: <sup>8</sup> “Yapëtaniji daxita  
xua paexanavanapame. Apo pasaëmë.  
Itsiaata panejumecovënëtavanapame. Apo  
panayavajunuaxainaemë patajajivicuenemë.

Bajaraxuata pacatocopatatsi talivaisi jivi panetsipaebaponaenexa panevajënaeyabelia. Nexata itsajivi ata apo caējëpaetsi tsane papecacopatsiaexanaenexa talivaisi jivi panetsipaebaponaejava. <sup>9</sup> Panejumetaema. Itsamonae rabaja judíovi ata, dovathi pijajivi. Tshipaji apo nejumecovënëtsi. Bajarapamonae jamatabëcuenenavëxaniabiaya jumai tsabiabi: ‘Paxanë raja pajudíovinë, Dioso papijajivinë,’ jai tsabiabi. Itsiata baitsi jane Dioso apo pijajivi. Tshipaji apo nejumecovënëtsi. Bajarapamonae itsamatacabi paneitabarata pematabacabëta pacatonubenaeyaexanaenatsi. Nexata bajarapamonae yapëtaena paxamë patacaasivacuene. <sup>10</sup> Pacaitorobatsi patanejumecovënëtsijavamë bajayajebi panecasaëtsavanapaenexa. Nexata baja bajarapacuenia panejumecovënëtavanapame. Bajaraxuata nexata pamatacabi daxitanacuapijivi piayaicuene taeponaena, paxamë pacavevetsianatsi. Nexata paxamë apo pacaitsacueniabi tsane. <sup>11</sup> Naxanitsiayo rabaja ponaenajë paxamëjavabereca. Xaniavaetsia baja pacaasaëmëre tsavanapae patanejumecovënëtavanapaejavamë. Nexata itsajivi ata apo pacavecuapitsi tsane xua taxa Dioso pacarajutsiana athëbëtatsia. <sup>12</sup> Pamona nejumecovënëtavanapaena ëpetëpaejavabelianexa, bajarapamonae taxa Dioso bepijatemplobonaesiturutonë taenatsi athëbëtatsia. Bajarapacuenia taxa Dioso bepijatemplobonaesiturutonë taenatsi bitso piamatabëcuenesaë tsavanapaexae tsane tanejumecovënëtavanapaejava. Bajarapamonae taxa Dioso athëbëtatsia yajavajinavanapaena

daxitamatacabijavabelianexa. Nexata taxa Dioso pevenë yaquinarutsianajë bajarapamonaeyavabelia. Yajavayaquinarutsianajë taxa Dioso pijatomara pevenë. Bajarapatomara, pejana Jerusaléntomara. Bajarapatomara athëbëvetsica patsianica, taxa Diosojavavetsica. Tavënë ata, pejanavënë, yaquinarutsianajë bajarapamonaejavabelia. <sup>13</sup> Itsa pamuxuvojorubename, panatojumetaema pacuenia Espíritu Santo jumaitsi Dioso pejumecovënëtsivijavabelia,” pejailivaisi toyaquinare Filadelfia tomarata peecaenë, Dioso pejumecovënëtavanapaevi penamatacaitorobinëjavabelia, nejai Jesús, siete xuabeje orota pexanaeyavanë tuatujëta penucaenë.

*Pacuenia Juan vajatuxanenë Jesús itorobatsi  
petoyaquinaenexa Laodicea tomarata  
Diosos pejumecovënëtavanapaevi penamata-  
caitorobinëjavabelia yabara pelivaisi*

<sup>14</sup> Jesús icatsia nejumaitsi:

—Laodicea tomarata peecaenë, Dioso pejumecovënëtavanapaevi penamatacaitorobinëjavabelia, toyaquinare pijajivi yajava peyapëtaenexa mapalivaisije, nejai Jesús, ponë copiaeve-tavanapatsi icatsia pepatsijavanexatsica vajanacacapanepaenexa.

Bajaraponë pexaniajailivaisi jivi tsipaebabiaba. Pexanaenënuaxa daxitacuene, xua Dioso exana mapanacuataje. Jesús nitoroba Laodicea tomarata peecaenë, Dioso pejumecovënëtavanapaevi penamatacaitorobinëjavabelia, tatoyaquinaenexa mapejumaitsilivaisije:

15 “Yapētaniji daxita xua paexanavana-pame. Yapētanijinua patanejumecovēnētsivi atamē, panejamatabēcuenēvetsina bevelia patanejitsipaejavamē. Yapētanijinua bevelia patanetonacuenēbavanapaejavamē. Pacuenia apo tanejumecovēnētsivi jamatabēcuenētsi xanējavaberena, itsiata picani bitso apo pajamatabēcuenētsimē. Pacuenia pijinia xani-avaetsia tanejumecovēnētsivi jamatabēcuenētsi xanējavaberena, itsiata apo pajamatabēcuenētsimē. Pacuenia jamatabēcuenētsi pamonae apo tanejumecovēnētsivi, itsa pajamatabēcuenētsimē tsipae, nexata xanepanaejitsipa. Itsa jume, pacuenia jamatabēcuenētsi pamonae xaniavaetsia tanejumecovēnētsivi, itsa pajamatabēcuenētsimē tsipae, nexata xanepanaejitsipa. Tsipaji roviaia panajamatabēcuenē yapētaejitsipame pacuenia pajamatabēcuenētsimē tsavanapae xanējavaberena. 16 Nexata pacuenia mera perēbēnaera apo cainejebi, bitso apo atajunua, bajara pajamatabēcuenētsimē xanējavaberena. Bajarapitsira apo jitsipaetsi vajaapaenexa. Nexata vajaapaeyaniva, navecuaepatajarabatsi penaxuabinexa. Bajara pijinia pacuenia pacanavecuaxuabianatsi. Tsipaji apo jitsipaenē pacuenia bēpēnēa panejamatabēcuenēvetsina pajamatabēcuenētsimē tsavanapae. Baitsi apo jitsipaenē bevelia patanejitsipaejavamē. Bajaraxuata pacanavecuaxuabianatsi. 17 Paxamē pajamatabējumaitsimē tsabiabi: ‘Xanē baja cajena bitso daxitacuene taxainaenē. Daxita xua nacuenēbaponaponajē taxinaejavanexa, netocapitsapapona. Nexata itsacuenējava

ata apo namatavenonaenë,' pajamatabëjamë tsabiabi. Itsiata baitsi jane Diosojavabelia apo panejamatabëcuenexanepanaexae, pepacuene apo pajamatabëcuenebarëyamë tsavanapae. Apo payapëtaemënua bitso bepanejiobicuene Dioso pitabarata. Paxamë cajena Dioso pacatane bepaneitaxutotsëcënaevi bitso, bepanejumasajinaevinua. <sup>18</sup> Bajaraxuata pacamuxujiobijitsiatsi. Panevecuapire bitso penamatamotsijava paricovinexamë jane baja Diosojavatatsia. Panevecuapirenua penioponaenaxatatsijava panenaxatatsinexa, panenaperabëcaranatsinexa Dioso pitabarata paneaurajavavecua. Panevecuapirenua paneitaxutotsëcënaevaë panetaenexa jane baja xaniavaetsia. Nexata dovathi pijacuene panayajivitaename papecayamaxëitojorobiyaniva. <sup>19</sup> Daxita pamonae tasivavi, muxujiobajë peyapëtaenexa. Naneconitsiaexanajënua pecopatsinexa apo tajitsipaecuene pexanaejava. Nexata asaëyata panejumecovënëre. Pacopabare pibisiacuene paneexanabiabijava. Panajamatabëcuenepënëyorore Diosojavabelia. <sup>20</sup> Panejumetaema. Itsajivi itsa pata panijabota, nexata itsa pacajunata, patobaupatame pejonenexa. Bajara pijinia pacuenia xanë ata panejamatabëëthëto itsa panetobaupatsianame, pacatsijamatabëjionenatsi. Nexata pacayajavaponaponaenatsi daxitamatacabijavabelianexa. <sup>21</sup> Xanë baja cajena taxa Dioso taneitorobicuena jumecovënëtaponaponajë ëtatëpaejavabelianexa. Nexata baja aeconoxae yajavaecajë taxa peecaejavata, pijatronovënëjavata. Pa-

monae pijinia nejumecovënētavanapaena  
 ëpetëpaejavabelianexa, bajarapamonae  
 pijinia tocopatsianajë tayajavaecaenexa  
 tronovënëjavata. <sup>22</sup> Itsa pamuxuvojorubename,  
 panatojumetaema pacuenia Espíritu Santo  
 jumaitsi Dioso pejumecovënëtsivijavabelia,”  
 pejailivaisi toyaquinare Laodicea tomarata  
 peecaenë, Dioso pejumecovënētavanapaevi  
 penamatacaitorobinëjavabelia, nejai Jesús,  
 siete xuabeje orota pexanaejavanë tuatuajëta  
 penucaenë.

## 4

*Pacuenia Juan tane Dioso pijajivi Dioso pi-  
 janacuatatsia yabara pelivaisi*

<sup>1</sup> Icatsia taniji baupa penabaupatanucaejava  
 athëbëtatsia. Ponë baja copiaya jumetaniji  
 pecuaicuaijajava betrompetajume, bajaraponë  
 icatsia pecuaicuaijajava jumetaniji. Nejumaitsi  
 mapacueniaje:

—Junaimina xanëjavabetsina. Catsitajëtsianatsi  
 majotatsinaje pacuenia pevajënaeyabelia itsi  
 tsaponaiejitsia bajarapanacuatareca, nejai ponë  
 jumetaniji pecuaicuaijajava.

<sup>2</sup> Nexata bajarapaepatota nayapëtaniji  
 athëbëtatsia Espíritu Santo pesaë tayajavapon-  
 aponaejava. Athëbëtatsia taniji tronovënëjava.  
 Bajarapatronota Dioso taeyetajë. <sup>3</sup> Dioso,  
 ponë eca bajarapatronota, itabaracotiabatsi.  
 Pacuenia cotiaitsi penamatamotsiibotonë, bajara  
 itabaracotiatsi. Pacuenia cotiaitsi jaspevënëiboto,  
 pacuenia cotiaitsi cornalinvënëiboto ata,

bajaraitabaracotia itsi. Bajarapatrono matatoyorotsia aravalibo taenutajë. Pacuenia esmeraldavënëiboto cotiaitsi, bajaracotia itsanucæ bajarapaaravalibo. <sup>4</sup> Bajarapatrono matatoyorotsia taenubajënuua veinticuatro patronobeje. Caetronota canacujitsia ecapona ancianonëanë. Bajarapaancianovi naxatabena penioponaejavanë. Orota pexanaecoronanë mataena. <sup>5</sup> Patronota eca Dioso, bajarapatronojavaverena yamaxë binebinejai. Najumetajunujunua. Siete xuabeje pitayotanubenaejavanë taenubajë bajarapatronoitabarata. Bajarapaitayotanubenaejavanë mapajamatabëcuenelivaisi xainaje. Siete rabaja pijinia patomarabejepijivi, Dioso pejume-covënëtavanapævi, Espíritu Santo peyavenon-abiabijavanexatsi. <sup>6</sup> Bajarapatronoitabarata taeyetajë bemanuamene picani. Itsiata baitsi jane piatajajava. Pacuenia vidriojava nasaba, bajarapitsijava.

Bajarapatronojavata taenubajë cuatro ponëbeje piaitothiavi, ayainëanë. Trono matatoyorotsia nubena. Bajarapamonæ pitabarayareca, pejumareca ata, itaxutorubenaponareca. <sup>7</sup> Copiaya ponë, benevëthë petsobianë. Bajaraxuacujinae cotocævinë, betoro. Bajaraxuacujinae acueyabinë, bejiviitabaranë. Bajaraxuacujinae cuatronë, pacuenia cotsala itsa punanajetaruca baitsi, bajaraitsi. <sup>8</sup> Ponëanë, cuatro ponëbeje piaitothiavi taniji, xainapona seis pacorofetobeje caenë canacujitsia. Bajarapamonæ daxitanëanëreca itaxutorubenaponareca. Bëpënëaverena ata

bajarapacuenia itaxutorubenaponareca.  
Matacabijebi, meravijebi ata, apo copatanubena  
pejumaitsanubena Java Diosojavabelia.

Bitso nianeconijibinë. Bitso ayaija-  
matabēcuenenēmē. Nexata cacaējēpa  
daxitacuene nexanaenexa. Ajena, mapa-  
matabitaje, ponaponame. Mapanacua  
naxanaevajēnaeya ata, ponaponame.  
Daxitamatacabijavabelianexa ata  
ponaponame,

jai tsanubena bajarapamonae Diosojavabelia.

<sup>9</sup> Pamona cuatro ponēbeje piaithiavi, pexa-  
niajamatabēcuenenua rajutabiaba Diosojavabelia.  
Bajarapamonae pexaniajamatabēcuenen ita  
rajutabiaba Diosojavabelia, jumai tsabiabi  
mapacueniaje:

—¡Diosomē, nenivenivenaecotia bitso  
pinijicuene! ¡Ayaijamatabēcuenenēmē bitso! jai  
tsabiabi.

Bajarapacuenia jumai tsabiabi tronota  
peecaenējavabelia, daxitamatacabijavabelianexa  
peponaponaenējavabelia. <sup>10</sup> Pamona cuatro  
ponēbeje piaithiavi, bajarapacuenia ita jumai  
tsanubena Diosojavabelia, nexata pijinia  
bajarapaepatota pamona veinticuatro ponēbeje  
ancianovi pematabacabēta tonubenajunua  
Dioso pitabarata, daxitamatacabijavabelianexa  
peponaponaenē pitabarata. Bajarapacuenia  
tonubenajunua Dioso pitabarata peyaiyataexae.  
Bajarapaancianovi Dioso pijatronojavabelia  
topenelia pijacoronanē. Bajarapaancianovi  
Diosojavabelia jumai tsanubena:

11 Patajatuxanenëmë, patajaDiosonëmë.  
 Xanepana  
 itsamonaefavabelia patacavajunupaebaponaefava  
 nenivenivenaecotia pexainaejava.  
 “Diosomë, bitso ayaijamatabëcuenenëmë,”  
 pacajai tsaponaetsinua. Xanepananua  
 patajumaitsaponaefava: “Dioso cajena  
 bitso piasaënë,” patajaitsaponaefava.  
 Tsipaji baja daxitacuene nexanaenë.  
 Nejitsipaecuenia daxitacuene exaname.  
 Mapamatacabijavaberena ata abaxë  
 tsiteca daxitacuene nexanaefava  
 nexanaecujinae. Bajarapacuenia abaxë  
 tsiteca daxitacuene nexanaefava xamë  
 nejamatabëcueneta,  
 jai tsanubenae ancianovi Diosojavabelia.

## 5

*Pacuenia Juan athëbëtatsia cobetaeyeta Dioso pe-  
 quionaecuyalatobaxuto pecobenaecaejava yabara  
 pelivaisi*

<sup>1</sup> Athëbëtatsia taeyetajë Dioso. Tronota  
 eca. Pequionaecuyalatobaxuto cobenaeca  
 pecujuanenia. Bajarapacuyalatobaxuto  
 peboxoverena, pejumavelia ata, xaina pitane.  
 Bajarapacuyalatobaxuto siete pasellotabeje  
 upicatsanaruba. <sup>2</sup> Nexata taenutajë bitso  
 piasaëángelnë. Bajarapaángelnë pinijijumeta  
 jumaitsi mapacueniaje:

—¿Jipatsa nexata jamatabëcuenecaējēpatsi  
 Dioso petocopatsinexatsi pesaracaenexa  
 sellovënëjavaxi, bajarapacuyalatobaxuto  
 piupicatsanarubiseloxi? jai.

3 Itsiata baitsi jane ajibi pejamatabëcuenecaëjëpaejivitsi bajarapacuyalato-baxuto piupicatsanarubiselloxi pesaracaenexa. Athëbëpijivi ata, mapanacuapijivi ataje, petëpaevimi ata, apo jamatabëcuenecaëjëpaetsi cajena. Nexata itsajivi ata Dioso apo tocopatsi pesaracaenexa bajarapacuyalato-baxuto piupicatsanarubiselloxi bëpënëa paitane rubena petaenexa. 4 Nexata xanë bajaraxua itsa taniji, bitso cajena nuajë. Bitso nuajë tsipaji baja ajibi pejamatabëcuenecaëjëpaejivitsi bajarapacuyalato-baxuto pequionaejava pebaxuisinaenexa pelebnexa. 5 Nexata itsanë ancianoviyajuvënënë nejumaitsi:

—Pëtsa baja nuame. Caenë raja jamatabëcuenecaëjëpatsi bajarapacuyalato-baxuto pequionaejava pebaxuisinaenexa. Bajaraponë Judápijinë pemomoxiyajuvënënë. Piasaënë bitso. Nexata bajaraponë yabara itsamonae jumai tsabiabi: “León,” jai tsabiabi. Bajaraponë nacuaevetsinëmi Davidpijinë pemomoxiyajuvënënë. Bajaraponë jamatabëcueneamoneyaba baja dovathi. Nexata bajaraponë jamatabëcuenecaëjëpatsi pesaracaenexa bajarapacuyalato-baxuto piupicatsanarubiselloxi, nejai ancianoviyajuvënënë Jesucristo yabara.

6 Nexata jane baja taenutajë Corderonë. Nuca veinticuatro ponëbeje ancianovi pitabarata. Nucanua trono pitabarata. Nucanua pamonaе cuatro ponëbeje piaithiavi pitabarata. Cordero nayapëtane pebeyaxuabinëmitsicuene. Tsipaji cruzajavabelia pecobematabiabarut-

sivajënëmitsi ruca pecobeta. Corderonë xaina siete pamataetobeje, siete pijinia paitaxutobeje. Xuanë, siete paitaxutobeje, mapajamatabëcuenelivaisi xainaje. Siete rabaja pijinia paespíritubeje, Dioso pijaespírituanë. Bajarapasiete paespíritubeje Dioso baja itoroba daxitanacuanëjava. <sup>7</sup> Nexata jane baja Dioso, ponë eca tronota, ponë pequionaecuyalatobaxuto cobenaeca pecujanenia. Corderonë cujitalalia. Corderonë jane baja vecuapita bajara-pacuyalatobaxuto. <sup>8</sup> Corderonë baja itsa pita bajarapacuyalatobaxuto, nexata pamonae cuatro ponëbeje piaithiavi, Corderonë pitabarata pematabacabëta tonubenajunua. Bajara pijinia pacuenia pamonae veinticuatro ponëbeje ancianovi, Corderonë pitabarata pematabacabëta tonubenajunua. Caeanciano canacujitsia saicaya xainapona pijaarpa. Bajarapaancianovi capona orota pexanaecopanë. Bajarapacopanë vënëca petuxujuvijava. Bajarapatuxujuvijava xaina mapajamatabëcuenelivaisije. Dioso pijajivi pevajëtaaponaejavami Diosojavabelia, Dioso tane bajarabepitsituxujuvijava. <sup>9</sup> Nexata pamonae cuatro ponëbeje piaithiavi, pamonae pijinia veinticuatro ponëbeje ancianovi, daxita bajarapamonae, naxëana Corderojavabelia mapapejanavajije. Penaxëanaejavata vajita jumaitsi Corderojavabelia mapacueniaje:

Cajamatabëcuenecaëjëpa rabaja Dioso  
 pecatocopatsixae nepitsinexa ma-  
 pacuyalatobaxutoje. Nexata baja  
 cajamatabëcuenecaëjëpanua bajara-  
 pacuyalatobaxuto piupicatsanarubiseloxi

ata nesaracaenexa. Bajarapacuenia  
 cajamatabēcuenecaējēpa baja tsipaji  
 baja cabeyaxuaba pataneneconimata-  
 motsinexamē. Nexata padaxitaviriajumevi  
 atanē, padaxitanacuanēpijivi atanēnua,  
 nijanata baja panecomuatame  
 Diosonexa. <sup>10</sup> Paneexanamenua baja  
 Dioso papijajivinē itsamatacabi Dioso  
 patanebarēevetsinexa daxitacuene.  
 Paneexanamenua baja pasacerdotevinē  
 jivi patatocuaicuajitsabiabivinexa  
 Diosojavabelia. Paneexanamenua baja  
 nacuanē pataevetsivinexa,  
 jai ancianovi Corderonējavabelia penaxēanaejavata  
 mapapejanavajije.

<sup>11</sup> Trono matatoyorotsia nubena cuatro  
 ponēbeje piaithiavi. Nexata piaithiavi  
 pepēnēvelia matatoyorotsia nubena ancianovi.  
 Bajaraxuacujinae jane baja ancianovi  
 matatoyorotsia nubenatsi ángelevi. Angelevi bitso  
 ayaibitsaēto, millones paángelbeje nubena. Nexata  
 bajarapaángelevi pecuaicuajijaijava jumetani.

<sup>12</sup> Angelevi ayaijumeta jumaitsi mapacueniaje:  
 Corderonē, ponē picani beyaxuabatsi, bitso  
 ayaijamatabēcuenenē. Bajaraxuata Dioso  
 tocopatsi pevetsinexa daxitacuene ma-  
 panacuatajē. Tocopatatsinua daxitacuene  
 pexainaenexa. Tocopatatsinua daxi-  
 tacuene peyapētaenexa. Tocopatatsinua  
 pinijisaē pexainaenexa. Tocopatatsinua  
 itsamonae pejumaitsinexatsi: “Xamē bitso  
 ayaijamatabēcuenenēmē,” pejainexatsi.  
 Tocopatatsinua pevajunupaebinexatsi

penivenivenaecotia pexainaejava.  
 Tocopatatsinua daxita pamona  
 jumecovënētatsi, pexaniajamatabëcuene  
 perajutsinexatsi bajaraponëjavabelia.  
 Bajarapacuenia tocopatatsi tsipaji  
 ayaijamatabëcuenenë bitso,  
 jai tsanubenae mapacueniaje ángelevi Jesús  
 yabara.

<sup>13</sup> Jumetanijinua icatsia daxita Dioso pexanaevi  
 pecuaicuaijajava. Athëbëpijivi cuaicuaijai. Ma-  
 panacuapijivi ata cuaicuaijai. Petëpaevimi ata  
 cuaicuaijai. Manuamenianëpijivi ata cuaicuaijai.  
 Nexata daxita bajarapamona Diosobeje Jesúsbeje  
 yabara jumaitsi mapacueniaje:

Diosomë, tronota neecaenë. Xamë pijinia  
 Corderonëmë. Paxamëbejejavabelia pexani-  
 ajamatabëcuene pacarajutatsi. Paxamëbeje  
 bitso ayaijamatabëcuene panexainaenëbeje.  
 Panenivenivenaecotiabeje paxainame-  
 beje. Nexata panenivenivenaecotiabeje  
 panexainaejavabeje itsamonaevjavabelia  
 pacavajunupaebaponatsi. Pinijisaë bitso  
 panexainaenëbeje. Bajarapajamatabëcuene  
 panejamatabëcuenetsitecaenëbeje daxita  
 matabijavabelianexa,

jai daxita Dioso pexanaevi Diosobeje Jesúsbeje  
 yabara.

<sup>14</sup> Pamona pijinia cuatro ponëbeje piaithiavi  
 jumaitsi tsaponae mapacueniaje:

—¡Bajara itsi tsane! jai bajarapamona.

Nexata pamona veinticuatro ponëbeje  
 ancianovi, pematabacabëta tonubenajunua Dioso  
 pitabarata. Pexaniajamatabëcuene rajutanubena

Diosojavabelia, daxitamatacabijavabelianexa  
peponaponaenëjavabelia.

## 6

### *Siete pasellobeje yabara pelivaisi*

<sup>1</sup> Corderonë taenutajë. Penamataxainaesello  
sarananuca. Nexata pamonaе cuatro ponëbeje  
piaithiaviyajuvënënë, caenë pecuaicuaijajava  
ayaijumeta, jumetani. Pecuaicuaijajava, beya-  
maxëjume najumeta. Nexata jumetani: “¡Naxanit-  
sia!” pejaijava caballojumata peponaenëjavabelia.

<sup>2</sup> Nexata bajaraxuacujinae icatsia tani  
perenajava penioponaecaballota peyanajetaru-  
caenë. Caballojumata peecaenë, cobenaeca  
bitsabi. Rajutatsi corona penamataxatatsinexa.  
Bajaraxuacujinae pona pijavajabitsaë  
pebarënenexa. Nexata pijavajabitsaë  
cueneamoneyabanajetaruca pepacuene  
ëpecopiarucaeya exanaejavabelianexa.

<sup>3</sup> Bajaraxuacujinae icatsia Corderonë  
sarananuca itsasello, pecotocaevijava. Nexata  
pamonaе cuatro ponëbeje piaithiaviyajuvënënë,  
icatsia itsanë: “¡Naxanitsia!” pejaijava, jumetani.

<sup>4</sup> Nexata bajaraxuacujinae icatsia tani  
enajava petsobiacaballota peyanajetarucaenë.  
Caballojumata peecaenë, piapiaespada rajutatsi.  
Tocopatatsi pecopiarucaeyaexanaenexa  
mapanacuata jivi xaniavaetsia pejinavana-  
paecuenemi. Jivi jane baja namataenetsia  
nabeyaexanaejitsia daxita nacuanëjava.

<sup>5</sup> Bajaraxuacujinae icatsia Corderonë  
sarananuca itsasello, acueyabijava. Nexata

pamonaē cuatro ponēbeje piaithiaviyajuvenēnē, acueyabinē icatsia: “¡Naxanitsia!” pejajava, jumetaniji.

Nexata bajaraxuacujinae icatsia taniji perenajava petsaebiacaballota peyanajetarucaenē. Caballojumata peecaenē, cobenaeca pepesabaponaejava. <sup>6</sup> Icatsia jumetaniji pamonaē cuatro ponēbeje piaithiavijavata pejumaitsijava mapacueniaje: “Janibomatacabixae, caedenariota pecomuatsinexa caējēpa saya caekilo trigoxu. Itsa pijinia cebadaxu, caējēpa saya acueyabi pakilobeje. Nexata caedenariota pecomuatsinexa aceitera, itsa jume, vinora, apo caējēpae. Tsipaji bajara-paranē bitso namatamota,” pejajava, jumetaniji.

<sup>7</sup> Bajaraxuacujinae icatsia Corderonē sarananuca itsasello, cuatrojava. Nexata pamonaē cuatro ponēbeje piaithiavi, pecopiarucaenē jane baja: “¡Naxanitsia!” pejajava, jumetaniji.

<sup>8</sup> Nexata bajaraxuacujinae icatsia taniji perenajava pevayanaecaballota peyanajetarucaenē. Caballojumata peecaenē, pevēnē Jivi Petēpaeyaexanaponaenē. Itsanē pēnaponatsi. Bajaraponē pijinia ponē pevēnē Infiernonē. Bajaraponēbeje Dioso tocopatsianatsibeje jivi ayaibitsaēto pebeponaenexabeje. Pitsibitsaētovajēto beponaenabeje, bajarapitsibitsaētovajēto matatoxenetsia nacopatsiana mapanacuataje. Daxita mapanacuajavaje bajarapacuenia exanaponaenabeje. Bajaraponēbeje pejamatabēcueneta beyaexanaponaenabeje jivi vajabitsaēcuenia, janibocuenia ata, piavitanecuenia ata. Unupijinēanē piayainēanē

pitsapaena. Nexata bajarapapiayainēanē  
jivi beponaenatsi. Bajarapacuenia itsi  
tsane mapanacuataje pamatacabi Dioso  
jivi nananeconitsiaexanaena pibisiacuene  
pexanaeneconi yabara.

<sup>9</sup> Bajaraxuacujinae icatsia Corderonē  
sarananuca itsasello, cincojava. Nexata  
daxita pamonaemi bajayata beyejebatsi Dioso  
pejumelivaisi yabara, taeyejebajē pebobenaesjava  
altarjavabēxēpanata. Bajarapamonaemi bajayata  
beyejebatsi apo pecopatsixae Dioso pejumelivaisi  
jivi petsipaebaponaesjava. <sup>10</sup> Daxita pamonaemi  
bajayata beyejebatsi, Diosojavabelia pinijijumeta  
jumai tsanubenaes:

—Diosomē, pepo pexaniajamatabēcuenenēmē.  
Pacuenia najumecapanepaeya jumaitsimē,  
bajarapacuenia exanabiabame. ¿Detsa  
pamatacabibeje abaxē saica nenaneconitsi-  
aexanaenexa mapanacuata pejinavanapaevije,  
pamonaes panebeyejeba? jai tsanubenaes  
altarjavabēxēpanata pebobenaevi.

<sup>11</sup> Nexata jane baja bajarapamonaes Dioso ra-  
jutatsi penioponaenaxatabijavanē. Abaxē Dioso  
itorobatsi bajarapamonaes penacueraevetanube-  
naenexa. Tsipaji abaxē saica itsamonaes Dioso  
pijajivi, Jesucristo ata petonacuenebivi, pebye-  
jebinexatsi. Bajaraxuata bajarapamonaes abaxē  
nacueraevetsiaexanejebatsi Dioso.

<sup>12</sup> Bajaraxuacujinae icatsia Corderonē  
sarananuca itsasello, seisjava. Nexata icatsia  
taniji bitso ira penajēabijava. Matacabipijijuameto  
bitso itaxutotsaebia. Pacuenia meravi bitso itsa  
aitaquiri, bitso batsaebia, bajara itaxutoitsi.

Meravipijjuameto pijinia bitso itaxutotsobia. Pacuenia pijana batsobia, bajara itaxutoitsi. <sup>13</sup> Nexata tulupu irabetsica othopaica. Pacuenia naejavacuai baothopaica, naejava itsa najëaba pinijijovibota, bajarapacuenia othopaica tulupu. <sup>14</sup> Pacuenia cuyalato baquiona, bajarapacuenia quiona daxita itaboxomi. Ajibi baja nexata itaboxo. Daxita petsutonëmi, petunaetonëmi ata, najëaba. <sup>15</sup> Nexata daxita mapanacuanëjavaje jivi pevetsivi, namatayaba ibovajuanëjava. Namatayaba ibotoxanetonë tuatuajëjava ata. Daxita ayaijamatabëcuenenëanë, bitso riconëanë ata, namatayaba. Vajabitsaë penamatacaitorobinëanë ata, piasaënëanë ata, namatayaba. Dajubicuenia pecana-jetsivitsi ata itsamonaejavabelia amoneya petonacuenebavanapaenexa, namatayaba. Apo pecanajetsivitsi ata itsamonaejavabelia amoneya petonacuenebavanapaenexa, namatayaba. Bajarapacuenia daxita namatayaba. <sup>16</sup> Nexata penamatayabivi jumaitsi ibotsutonëjavabelia, ibotoxanetonëjavabelia ata:

—Panetsimataothopare. Dioso, ponë eca tronota, bajaraponëvecua panematayatsianame. Pinijicuenia raeta panenaneconitsiaexanaena Corderonë. Bajaraxuavecua panematayatsianame, jai picani pamonaen penamatayabivi.

<sup>17</sup> Tocopiapatatsi jane baja pinijicuenia Dioso penaneconitsiaexanaematacabitsi. Itsajivi ata cajena apo caëjëpaetsi pevecuapanepaenexa Dioso penaneconitsiaexanaecuenetsi.

## 7

*Pacuenia Juan tane athëbëtatsia pacuenia it-samatacabi itapaitanerubijitsiatsi Israel nacuapi-jivi Dioso pijajivixae yabara pelivaissi*

<sup>1</sup> Icatsia taniji cuatro ponëbeje ángelevi. Bajara-paángellevi nacua matatoyorotsia nubena. Caenë canacujitsia ángelevi caranatanubena jovibo. Irajava jovibo peponaeyaniva, caranatanubena. Manuamene atavecua caranatanubena. Caenae ata naejava penajëabiyaniya jovibota, caranatanubena ángelevi. <sup>2</sup> Tanijinua icatsia itsaángelnë penajetarucaenë orientejavavetsina. Bajarapaángelnë caponapona piasaënë Dioso pijasello. Bajarapasellota Dioso pijajivi pitapaitanerubaponaenexa. Bajarapaángelnë vavajai ayaijumeta cuatro paángelnëbejejavabelia. Pamonaе cuatro ponëbeje, ángelevi, Dioso tocopatatsi pebijianaenexa ira, manuamene ata. Nexata orientejavavetsina paángelnë najetaruca, cuatro paángelnëbejejavabelia jumaitsi mapacueniaje:

<sup>3</sup> —Dioso pijajivi yajava peitsacueneyaniva, pëtsa abaxë pabijianame ira, naejavanë ata, manuamene ata. Matapania baja Dioso pijajivi Dioso pijasellota vaxaitsi itapaitanerubianatsi, bajara jane pabijianaename, jai ángelnë orientejavavetsina penajetarucaenë.

<sup>4</sup> Bajaraxuacujinae jumetaniji jivi ayaibit-saëtoxaneto Dioso pijasellota pitapaitanerubijavatsi. Ciento cuarenta y cuatro mil pina pajivibeje itapaitanerubatsi Dioso pijasellota. Pamonaе itapaitanerubatsi Dioso pijasellota,

daxita bajarapamonae Israelpijinēmi pexi doce ponēmibeje pemomoxiyajuvēnēvi. <sup>5</sup> Nexata Dioso pijasellota itapaitanerubatsi doce mil pajivibeje, Judápijinēmi pemomoxiyajuvēnēvi. Doce mil pijinia pajivibeje, Rubénpijinēmi pemomoxiyajuvēnēvi. Doce mil pijinia pajivibeje, Gadpijinēmi pemomoxiyajuvēnēvi. <sup>6</sup> Doce mil pijinia pajivibeje, Aserpijinēmi pemomoxiyajuvēnēvi. Doce mil pijinia pajivibeje, Neftalípijinēmi pemomoxiyajuvēnēvi. Doce mil pijinia pajivibeje, Manasépijinēmi pemomoxiyajuvēnēvi. <sup>7</sup> Doce mil pijinia pajivibeje, Simeónpijinēmi pemomoxiyajuvēnēvi. Doce mil pijinia pajivibeje, Levípijinēmi pemomoxiyajuvēnēvi. Doce mil pijinia pajivibeje, Isacarpijinēmi pemomoxiyajuvēnēvi. <sup>8</sup> Doce mil pijinia pajivibeje, Zabulónpijinēmi pemomoxiyajuvēnēvi. Doce mil pijinia pajivibeje, Josépijinēmi pemomoxiyajuvēnēvi. Doce mil pijinia pajivibeje, Benjamínpijinēmi pemomoxiyajuvēnēvi. Nexata bajarapacuenia caejavata Dioso pijasellota itapaitanerubatsi ciento cuarenta y cuatro mil pajivibeje, Israelpijinēmi pexi doce ponēmibeje pemomoxiyajuvēnēvi.

*Pacuenia Juan athëbëtatsia tane jivi ayaibitsaëttoxanetonë, penioponaejavanë penaxatabivi, yabara pelivaisi*

<sup>9</sup> Icatsia taniji jivi ayaibitsaëttoxanetonë. Bajarapamonae daxitanacuanëpijiviyajuvēnēvi, daxitaviriajumeviyajuvēnēvi. Bajarapamonae nubena Dioso peecaetrone pitabarata, Corderonë ata pitabarata. Jivi cajena

ayaibitsaëtoxanetonë bitso. Itsajivi ata cajena apo caëjëpaetsi penamataëjësicapanepaenexa bajarapajivibitsaëtoxanetonë. Daxita bajarapamonae ëpenioponaejavanë penaxatabivi. Cobenanubena benaxarebobaxutonë. <sup>10</sup> Daxita bajarapajivibitsaëtoxanetonë vavajai tsanubenae ayaijumeta. Jumaitsi tsanubenae mapacueniaje: VajaDioso, ponë Corderonë yajavaeca tronota, bajaraponë nacacapanepa pibisiacuene vajaexanaeneconimivecua. Bajarapacuenia nacacapanepa Corderonë pejamatabëcueneta, jai tsanubenae bajarapajivibitsaëtoxanetonë.

<sup>11</sup> Trono matatoyorotsia nubena cuatro ponëbeje piaithiavi. Nexata piaithiavi pepënëvelia matatoyorotsia nubena ancianovi. Bajaraxuacujinae jane baja ancianovi matatoyorotsia nubenatsi ángelevi. Daxita ángelevi ira taenubenaeya bobena irata Dioso peecaetrono pitabarata. Bobenaeya pexaniajamatabëcuene rajutanubena Diosojavabelia. <sup>12</sup> Bajarapaángelevi ira taenubenaeya jumai tsanubenae mapacueniaje:

¡Bajara itsi tsane! PatajaDiosomë, pexaniajamatabëcuene pacarajutabiabi-anatsi daxitamatacabijavabelianexa. Nenivenivenaecotia nexainaejava, daxitacuene neyapëtaenëcuene ata, pacavajunupaebaponaenatsi daxitajivijavabelia. Daxitajivi casivajamatabëcuenebarëya tsabiabi tsane itsa yavenonabiabi-aname bajarapamonae. Daxitajivi cayaiyataeyabiabiana. Bitso cajena

niasaenē daxitamatacabijavabelianexa.  
 Cajamatabēcuenecaējēpa nexanaenexa dax-  
 itacuene ata daxitamatacabijavabelianexa.  
 Bajara itsi tsane,

jai tsanubenae irataeya daxita bajarapaánglevi  
 Diosojavabelia.

<sup>13</sup> Nexata itsanē ancianonē nejumaitsi:

—¿Detsa mapamonae penioponaejava penax-  
 atabivije? ¿Detsa verena pata bajarapamonae?  
 nejai ancianonē.

<sup>14</sup> Xanē nexata jumaitsinē:

—Xamē raeta jane yapētaneme, janē  
 ancianonējavabelia.

Nexata ancianonē nejumaitsi:

—Mara pamonaeye nacua pecopiaruca-  
 vajēnaeya, piyaijunavixaneto pecanicabanube-  
 naevimije. Corderonē pesivatēpaexaetsi,  
 bajarapamonae pibisiacuene pexanaeconimi  
 vecuaajibiaexanatsi baja. Bajaraxuata  
 penioponaejavanē naxataba. <sup>15</sup> Bajaraxuata  
 baja bajarapamonae nubena Dioso peecaetrone  
 pitabarata. Copatsinejeva Dioso petonacuenebi-  
 java, tonacuenebavanapa Dioso pijatemplobota.  
 Dioso, ponē eca tronota, bajaraponē evetsianatsi  
 peyajavajinavanapaexae. <sup>16</sup> Bajarapamonae

baja apo namatavenonae tsane pexaejava.  
 Apo namatavenonae tsane mera ata. Icotia  
 ata apo tsajavi tsanetsi. Icotia piatajujava  
 ata apo jamatabēitonotsi tsanetsi. <sup>17</sup> Bajara  
 itsane tsipaji Corderonē, ponē nuca trono  
 pitabarata, evetsianatsi bajarapamonae.  
 Evetsianatsi xaniavaetsia. Pacuenia pijaoveja  
 pevetsinē xaniavaetsia baeveta pijaoveja,

bajarapacuenia evetsianatsi. Bajaraponë  
 matacaponabiabianatsi itsabelia rubena  
 iravetsina pepitsaparubenaemeranë, jivi  
 piaitavayaexanaemeranëjavabelia. Daxita  
 bajarapamonae Dioso pijanacuatatsia  
 jamatabëcuenebarëya tsavanapae tsane. Tsipaji  
 ajibi tsane peyabaranuejavanexa, nejai  
 ancianonë mapacueniaje.

## 8

### *Sietejava sello yabara pelivaisi*

<sup>1</sup> Icatsia Corderonë sarananuca cuyalatobaxuto  
 piupicatsatarutsisello, sietejava. Nexata jane  
 baja athëbëatsia ajumejibi. Bajayaepatovajëto  
 ajumejibi. <sup>2</sup> Bajaraxuacujinae icatsia taniji  
 siete ponëbeje ángelevi. Dioso pitabarata  
 nubena. Nexata bajarapaángelevi rajutatsi  
 siete patrompetabeje. <sup>3</sup> Icatsia xuacujinae  
 itsanë ángelnë najetaruca. Cobenanajetaruca  
 orota pexanaevaxi. Bajarapavaxita  
 pecaponaenexa pitatsajaviitaire. Nexata  
 nucojopa altarvënëjava pitabarata. Nexata  
 jane baja rajutatsi ayaijava petuxujuvijava.  
 Nexata bajarapatuxujuvijava Dioso tane  
 daxita Dioso pijajivi pevajëtaponaejumemi  
 Diosojavabelia bepematajërëabijava. Nexata  
 bajarapatuxujuvijava ángelnë buata altarjumata.  
 Bajarapaaltar, orota pexanaealtar, nuca  
 Dioso peecaetrono pitabarata. <sup>4</sup> Nexata  
 jane baja bajarapatuxujuvijavami ángelnë  
 tajuita. Nexata petsëxë athëbëabetsia junaya.  
 Patsëxë athëbëabetsia junaya altarjavavetsia,

ángelenē pecobejavavetsia junaya Diosojav-abetsia. Bajarapatsēxē yajavajunaya Dioso pijajivi pevajētaponaejumemi Diosojavabelia.  
<sup>5</sup> Bajaraxuacujinae ángelnē altarjumavecua nota pitatsajaviitaire. Bajarapaitatsajaviitaire vēnēta pijavaxi. Bajaraxuacujinae ángelnē bajarapaitatsajaviitaire bajarapavaxi ēnētuaajēvecua othotajarabareca irabereca. Nexata yamaxē iratareca najumeta. Yamaxē binebinejai iratareca. Iranē jane baja ayaicuenia najēaba.

*Siete patrompetabeje yabara pelivaisi*

<sup>6</sup> Siete paángelbeje canaveretanubena pijatrompetanē piobinexa.

<sup>7</sup> Nexata jane baja penamataxainaeángelnē oba pijatrompeta. Nexata bitso pecainejebimatarejetonē othopareca irabereca. Bajara pacainejebimatarejetonē matajērēaba isoto. Matajērēabanua pijana yajava. Nexata jane baja ira tajuepona daxita nacuanējava. Panacuanējava ira tajuepona, pairavajēto tajuepona matatoxenetsia itsiata yajuvēnēnacopataponā. Daxitaira apo veriajavaponae. Nexata panacuanējava ira tajuepona, daxita naejavanēmi, pejuvijavanēmi ata, yajavatajuepona.

<sup>8</sup> Bajaraxuacujinae icatsia pecotocaeviángelnē oba pijatrompeta. Taniji bepinijitsutoxaneto petajueyecaejava. Bajaraxua jopareca manuameniareca. Manuamenemi nexata pijana. Pamenevajēto ēpijanamene tsarucae, bajarapamenevajēto matatoxenetsia itsiata pijananejeva yajuvēnēnacopata. <sup>9</sup> Pamanuamene

ëpijanamene tsarucæ, bajara pamanuamenepi-  
jidujuaimi tēpa baja. Pamanuamene pijinia  
pijananejeva nacopata, bajara pamanu-  
amenepijidujuai apo tēpæ. Pamanuamene  
ëpijanamene tsarucæ, bajarapamanuameneta  
perubenaebarcoxanetonēmi ata napeneta.  
Pamanuamene pijinia pijananejeva nacopata,  
bajarapamanuameneta perubenaebarcoxane-  
tonē apo napenetsi.

<sup>10</sup> Bajaraxuacujinae icatsia acueyabiángelnē  
oba pijatrompeta. Nexata pinijituluputoxaneto  
jopareca irabereca. Bajarapatuluputoxaneto  
tajuerucaponareca. Pacuenia bepinijiiso-  
tocotiaxaneto bacotia itsi, bajaracotia itsi  
tsarunaereca. Panacuata jopa bajarapatuluputo,  
bajarapanacuata daxita perubenaemenianēmi,  
bijiana baja. Iravetsina mera pepitsaparube-  
naejavanēmi ata, bijiana baja. Nexata baja  
abeje daxita bajarapameranēmi. Panacuata  
apo jopæ bajarapatuluputo, bajarapanacuata  
perubenaemenianē, apo bijianæ. Nexata  
xanepana daxita bajarapameranē. Mera  
iravetsina pepitsaparubenaejavanējava ata,  
xanepanarubena.

<sup>11</sup> Bajarapatuluputo  
pevēnē Ajenjo. Pamerajavareca jopareca  
bajarapatuluputo, bajarapamera atsaxa baja.  
Jivi ayaibitsaētoxanetonē tēpa penatsiapaexæ  
bajarapamera.

<sup>12</sup> Bajaraxuacujinae icatsia cuatroángelnē oba  
pijatrompeta. Nexata jane baja itaxutobijiana  
matabipijijuameto. Itaxutobijiana meravipiji-  
juameto ata. Itaxutobijiana tuluputonē ata. Nex-  
ata matabipijijuameto bijiaya naitayota. Mer-

avipijijuameto ata bijiaya naitayota.

<sup>13</sup> Bajaraxuacujinae icatsia taniji itsanē ángelnē pepunanajetarucaenē. Pepunanajetarucaenē ángelnē jumai tsanajetarucaē ayaijumeta:

—¡Toabejetsi baja tsaponae tsane mapanacuapijivije itsa obiana trompeta acueyabi paángelnēbeje penacopabivi! ¡ai tsanajetarucaē ángelnē pepunanajetarucaenē.

## 9

<sup>1</sup> Bajaraxuacujinae icatsia cincoángelnē oba pijatrompeta. Nexata taniji athēbēvereca ángelnē perunaejavareca irabereca. Nexata bajarapaángelnē Dioso rajutatsi llave, iravetsina pepitsapaemēthēxaneto pijallave.

<sup>2</sup> Nexata jane baja bajarapallaveta ángelnē mēthēxaneto vēpacasarana. Ángelnē jane baja vēpata mēthēxaneto. Nexata bajarapamēthēxanetojavatsina pitsapaina ētsēxēxaneto. Pitsitsēxēxaneto bapitsapa pinijipabixaneto itsa tajuita, bajarapitsitsēxēxaneto pitsapaina bajarapamēthēxanetojavatsina.

Nexata bajarapatsēxēta matabipijijuametomi itaxutoaitaquiriayaexana. Itaboxo ata aitaquiriayaexana.

<sup>3</sup> Bajarapatsēxējavaverena pitsapa bosesē. Bajarapabosesē daxitanacuanējava punanajetarubena. Bajarapabosesē caējēpaeyaexanatsi jivi pecacuatsinexa pebosotota. Pacuenia aqueto cacuata pebosotota, bajarapacuenia jivi pecacuataponaenexa.

<sup>4</sup> Bajarapabosesē apo itorobitsi pebijianaenexa itsacuenējava ata xua pejuvijava. Nexata bajarapabosesē apo bijianaponae pona.

Apo bijianaponae naejavanë ata. Tsipaji itorobatsi pecacuatsinexa saya ëjivi. Nexata pamonaе Dioso pijasellota apo itapaitanerutsitsi, bajarapamonaе pecacuatsinexa. <sup>5</sup> Itsiata baitsi jane apo tocopatsitsi caecuenia pebeyaxuabaponaenexa. Tocopatatsi saya jivi itsa cacuata, penavixaetaeyaexanaenexa cinco pajuametobeje. Nexata bajarapabosese jivi itsa cacuatsianatsi, bitso jivi navixaetaena. Pavixaevajëto aqueto itsa cacuata, baatane, bajarapavixaevajëto jivi navixaetaena. <sup>6</sup> Nexata pamonaе cacuatsianatsi bajarapabosese, jitsipaena picani petëpaenexa bajayajebi penavixaetaeyaniva. Itsiata baitsi jane bajarapamonaе Dioso abaxë apo tocopatsi tsane petëpaenexa. Penabeyaxuabinexa ata, Dioso apo tocopatsi tsane.

<sup>7</sup> Bajarapabosese ajumabocotaja. Pacuenia vajabitsaë itsa nabejitsia, pijacaballo bajumaxataba hierropananë pijavajabitsaë petojororonaeyanivatsi, bajara itsanubenae bajarapabosese. Beorota pexanaecoronanë namataxatabanubena. Pacuenia pebi itabaraitsi, bajaraitabaraitsi. <sup>8</sup> Pematana xaina. Pacuenia petiriva matanaitsi, bajara matanaitsi. Pevonotonë pijinia benevëthëvonotonë.

<sup>9</sup> Bajarapamonaе pejumabocotonë yajavanaexana baja cajena behierrojumabocotonë pejorororonaeyanivatsi itsajivi ata. Pecorofe najumeta. Pacuenia vajabitsaë penabenexa itsa pona pijavajabitsaëjavabelia, caballo itsa roboboca carrozavënëmonë banajumeta, bajarapacuenia najumeta bosese pecorofe.

<sup>10</sup> Bajarapabosese pebosotonēcopiata xaina peetonē jivi pecacuatsinexa. Pacuenia aqueto pebosotocopiata xaina peeto, bajnia benevēthēvonotara itsi. Tocopatatsi peetota pecacuatsinexa jivi, jivi penavixaetaenexa cinco pajuametobeje. <sup>11</sup> Bosese cajena xaina ángelnē pitorobinēnexatsi, pinijimēthēxaneto pevetsinē. Bajarapaángelnē hebreojumeta pevēnē Abadón. Griegojumeta pijinia Apolión, “Peverebiabinē,” pejajume.

<sup>12</sup> Bajarapapiayaicuene penamataxainaejava. Itsiata baitsi jane abaxē saica anijavabeje.

<sup>13</sup> Bajaraxuacujinae icatsia seisángelnē oba pijatrompeta. Paaltar nuca Dioso pitabarata, bajarapaaltarjavaverena penajumetsijava, ayajume, jumetaniji. Bajarapaaltar orota pexanaealtar. Bajarapaaltar cuatro pamataetobeje xaina. Caeupi canacujitsia mataerucapona. Bajarapamataetonē tuatuaĵeta jumepitsapa. <sup>14</sup> Bajarapaaltarjavaverena jumaitsi seisángelnē trompeta pexainaenējavabelia mapacueniaje:

—Isicare cuatro ponēbeje ángelevi, pamonaē cēbejebatsi pinijimenejavata, Eufratesvēnē menejavata, jai bajarapaaltarjavaverena.

<sup>15</sup> Nexata jane baja pecēbejebiángelēvimitsi isicatsi. Isicatsi bajarapaángelēvi pebenexa jivi. Bajarapaángelēvi jivi ayaibitsaētonē beponaejitsia daxitanacuanējava. Bajara saya cajena ěxuanexa, paángelēvi Dioso jamatabēcueta pexainaenējavabelia mapacueniaje:

—Isicare cuatro ponēbeje ángelevi, pamonaē eneevetanubena Dioso pitorobinexatsi jivi pebe-

ponaenexa paepatota tocaējētatsi. <sup>16</sup> Nexata icatsia jumetaniji bajarapaánglevi pijajivi, vajabitsaēvi, pitorobijava peponaenexa caballota. Doscientos millones ponēbeje vajabitsaēvi pona jivi pebeponaenexa daxitanacuanējava.

<sup>17</sup> Bemajitsinaebota taniji bajarapamonae caballota peponaejava. Vajabitsaēvi namēpabēxataba hierropananē pejorojoronaeyanivatsi pijavajabitsaē. Vajabitsaēvi penamēpabēxatabijavanē itabēta acueyabi paviriabejejavata. Itabēta mapaviriabejejavataje. Itabēta petsobiajavata. Itabēta perajenaejavata. Itabēta pevayanaejavata. Bajarapaviriabejejavata itabēta. Pacuenia nevēthēmatabocoto itsi, bajaramataboco itsi bajarapacaballuanē. Pecuibovojotonējavavetsina pitsapa pitarunutsicotia, ētsēxē yajava, azufre ata yajava.

<sup>18</sup> Xuanē caballuanē pecuibovojotonējavavetsina pitsapa, bajaraxuanē jivi ayaibitsaētoxanetonē yatēpaponaxitanacuanējava. Pabitsaētovajēto tēpa, bajarapabitsaētovajēto matatoxenetsia nacopata mapanacuataje. <sup>19</sup> Bajarapacaballuanē caējēpatsi jivi pebeponaenexa pecuibovojotonēta, pebosotonēta ata. Bajarapacaballuanē pebosotonēupianē bejomomatabocotonē. Pacuenia jomo pematobocotota caējēpatsi jivi pesininexa pebeyaxuabinexa, bajara itsi bajarapacaballuanē pebosotonēupianē.

<sup>20</sup> Itsiata baitsi jane pamonae peyajuvenētēpaevi, pamonae penacopabivi, bajaramonae tsiteca pibisiacuene exanavanapa. Apocopatsi dovathivijavabelia penavajēcabiabijava. Apocopatsinua pecobeta jumapecataeya

pexanaenëanëjavabelia ata penavajëcabiabijava. Bajaraxuanë saya pexanaenëanë oronanitonëta, platananitonëta ata, bronzejavanëta ata, ibotonëta ata, naejavanëta ata. Nexata bajaraxuanë apo caëjëpaetsi petaenexa. Apo caëjëpaetsi pejumetaenexa ata. Apo caëjëpaetsi peponaenexa ata. <sup>21</sup> Pamonaë peyajuvënëtëpaevi, pamonaë penacopabivi, bajarapamonaë apo copatsi jivi pebejava. Apo copatsi penajorobijava ata. Apo copatsi pevitota pibisiacuene pexanaejava ata. Apo copatsi penacobetoxotsijava ata.

## 10

*Pacuenia Juan tane ángelenë pecobenanucaejava cuyalatobaxutoyo yabara pelivaisi*

<sup>1</sup> Icatsia taniji itsaángelnë athëbëvetsica perunaëjavatsica. Runaica mapanacuayabetsicaje. Bajarapaángelnë bitso piasaëángelnë. Itarërëbo tuatujëta najetaruca. Natsimatatsënërutanaajetaruca aravalibo. Itabaranaitayotanajetaruca. Pacuenia matabipijijumeto baitayota, bajarapacuenia itabaranaitayotanajetaruca. Petopabeje pijinia pacuenia isotocotia tsobia, bajarapacuenia cotiatsobia. <sup>2</sup> Cuyalatobaxutoyo baxupatanuca. Pecujanenia pataxu nataxunutanuca manuameneboxovereca. Petsavenonenia pijinia pataxu nataxunutanuca irajumavereca. <sup>3</sup> Nexata vavajai tsaxuabi ayaijumeta. Pacuenia nevëthë itsa fiaba ayaijume, bajarapacuenia ayaijume. Pevavajaicujinae siete payamaxëbeje najumeta athëbëtatsia. <sup>4</sup> Yamaxë penajumetsicujinae,

yaquinaeijitsianē picani pajamatabēcuenē yabara  
yamaxē penajumetsijava neyapētaeyaexana.  
Itacarajeta athēbēvetsica tanejumaitsijava,  
jumetani. Nejumaitsi athēbēvetsica  
mapacueniaje:

—Muetsia saya xainare pajamatabēcuenē  
yabara yamaxē penajumetsijava,  
cayapētaeyaexana. Pētsa yaquiname bajarapali-  
vaisi, nejai athēbēvetsica.

<sup>5</sup> Bajaraxuacujinae ángelnē, ponē  
nataxunutanuca manuameneboxovereca,  
irajumavereca ata, bajaraponē nacobey-  
otanuca athēbēabetsia pecujanenia pacobe.

<sup>6</sup> Bajarapaángelnē nacobeyotsiaya jumai  
tsanuca:

—Dioso, daxitamatacabijavabelianexa  
peponaponaenē, caecuenia exana mapanacuaje,  
itaboxo yajava. Nexata caecuenia yajavaexana  
mapanacuapijicueneje, itaboxopijicuene ata  
yajava. Caecuenia yajavaexana manuamene  
ata, manuamenepijicuene ata yajava.  
Bajaraponē pitabarata najumecapanepaeya  
cajumaitsijitsiatsi mapacueniaje. Copiapatsijitsia  
rabaja pacuenia Dioso tajēvelia najamatabēxaina  
pexanaenexa. <sup>7</sup>Itsa rabaja paepatota siete ángelnē  
obiana pijatrompeta, bajarapaepatota Dioso  
jane baja taxuxuabiana pexanaejava pacuenia  
baja cajena tajēvelia Dioso najamatabēxaina  
pexanaponaenexa jivijavabelia. Muetsia  
pexainabuatsilivaisimi itajētsiana. Copiapatsiana  
jane baja pacuenia bajayata Dioso tajēvelia na-  
jumecapanepaeya jumaitsi profetavimijavabelia,  
jai tsanuca nacobeyotsiaya ángelnē.

<sup>8</sup> Copiaya pajume jumetaniji athëbëvetsica tanejumaitsijava, bajarapajume icatsia jumetaniji. Nejumaitsi icatsia athëbëvetsica mapacueniaje:

—Ponë ángelnë nataxunutanuca man-uameneboxovereca, irajumavereca ata, bajarapaángelnë cujiremelia. Vecuapire pacuyalatobaxutoyo bajarapaángelnë baxupatanuca, nejai athëbëvetsica.

<sup>9</sup> Nexata cujiliajë ángelnë. Vajëtajë nexata tanagerajutsinexa bajarapacuyalatobaxutoyo. Bajara-paángelnë nejumaitsi mapacueniaje:

—Ăjă, pire baja. Xaema necuiboxaicaenexa. Pacuenia jabëra xaica, bajara itsi mapacuyalatobaxutoyoje. Itsiata baitsi jane necotsorotuaabereca atsaxa tsane, nejai ángelnë.

<sup>10</sup> Nexata baja ángelnë bajarapacuyalatobaxutoyo vecuapitajë. Xaniji jane baja. Nexata jane baja cuiboxaicajë. Pacuenia jabëra xaica, bajara itsi. Itsiata baitsi jane taquijonicujinae tacotsorotuaabereca atsaxa. <sup>11</sup> Nexata icatsia ángelnë nejumaitsi:

—Tsipaebare pacuenia Dioso sivanajamatabëxaina daxitanacuanëpijivi. Tsipaebare pacuenia Dioso sivanajamatabëxaina daxitavirijamevi ata. Tsipaebare pacuenia Dioso sivanajamatabëxaina caenacua canacujitsia pevetsinëanë ata, nejai ángelnë.

## 11

*Pacuenia itsamatacabi anijanëbeje  
jivi tsipaebaponaenabeje palivaisi Dioso*

*yapëtaeyaexanaenatsibeje yabara pelivaisi*

<sup>1</sup> Icatsia taniiji ángelnë. Nerajuta piapianaebo. Nejumaitsi mapacueniaje:

—Nonotapunare. Caponare mapanaeboje neçaëjëbinexa Dioso pijatemplobo, neçaëjëbinexa altavënëjava ata. Namataëjëtsianamenua pajivibeje bajarapatemplobota navajëca Diosojavabelia. <sup>2</sup> Itsiata pëtsa caëjëtame templobopanabo. Tsipaji bajarapapanabo tocopata baja Dioso apo pejumecovënëtsivinexa, pamonaë saicayanacuaverena pepatsivi pejinavanapaenexa. Bajarapamonae jinavanapaena Jerusalén tomarata cuarenta y dos pajuametobeje. Saicayanacuaverena pepatsivi, apo yaiyatae tsane judíovi pijatomara. <sup>3-4</sup> Bajayata profetanëmi peyaquinaebaxutota, comparacióncuenia tajëvelia jumaitsi mapacueniaje: “Anijanaebeje, olivonaebeje, anijajavabeje pijinia pitayotanucaejavabeje, nubenaena mapanacuapijivi pijatuxanenë Dioso pitabarata,” jai. Bajarapacuenia comparacióncuenia tajëvelia itsa jumaitsi, tajëvelia vajunupaeba anijanëbeje jivi petsipaebanajetarucæjavanexabeje palivaisi Dioso yapëtaeyaexanaenatsibeje. Nexata anijanëbeje Dioso itorobiana jivi petsipaebanajetarucaenexabeje palivaisi Dioso yapëtaeyaexanaenatsibeje. Palivaisi bajaraponëbeje Dioso yapëtaeyaexanaenatsibeje, bajarapalivaisi mil doscientos sesenta pamatacabibeje jivi tsipaebanajetarucaenabeje. Naxatatsianabeje piayopapaëbërëjava. Bajarapacuenia naxatatsianabeje bitso pesivajamatabëcuenebëjaixabeje tsane

pamonaē apo peyaiyataēvi Jerusaléntomara, nejai ángelnē.

<sup>5</sup> Itsajivi itsa jamatabēitsacueniabianatsibeje, bajaraponēbeje nayajivitajuitsianabeje pecuibovojotovetsina pepitsapaecotiata, pitarunut-sicotiata. <sup>6</sup> Bajaraponebanajetarucaenabeje.

Naxatatsianabeje piayopapaēbērēja.

Bajēbeje caējēpaenatsibeje pitavetsinexabeje ema pejopaeyaniva. Pamatacabibeje jivi

tsipaebanajetarucaenabeje palivaisi Dioso yapētaēyaexanaenatsibeje, bajarapamatacabibeje abaxē ema apo jopaēyaexanaēbeje tsane.

Caējēpaenatsibejenua mera ata pijanara pexanaenexabeje. Caējēpaenatsibejenua dexitaviria

piayaicuene pecapitsapaenexabeje pamatacabita jitsipaenabeje. <sup>7</sup> Bajaraponēbeje itsa veretsian-

abeje palivaisi Dioso yapētaēyaexanaenatsibeje jivi petsipaebanajetarucājavabeje, bitso piayainē pitsapaenina pinijimēthēxanetojavatsina. Bitso

piayainē pitsapaenina pebenexatsibeje bajaraponēbeje. Nexata amoneyabianatsibeje. Nexata

baja beyaxuabianatsibeje. <sup>8</sup> Nexata petēpaenēbeje bocaenabeje Jerusalén tomaraxaneto callejavata.

Bajarapatomarata bajayatami vajatuxanenē ata cobematabiabarutatsi cruzajavabelia.

Bajarapatomara yabara jivi itsajavata: “Sodomatomara raja,” jai tsabiabi. Itsajavata:

“Egiptotomara raja,” jai tsabiabi. Bajarapacuenia jumai tsabiabi Jerusaléntomara yabara tsipaji bajarapatomarapijivi bitso pibisiacuene exana.

<sup>9</sup> Nexata bajaraponēbeje, Jerusaléntomara callejavata petēpaenēbeje, bocaenabeje acueyabi pamatacabibeje epatua. Tsipaji

Jerusaléntomara pevetsivi apo tocopatsi tsane itsajivi ata pemëthëtsinexatsibeje bajaraponëbeje. Nexata daxitaviriajumevi, daxitanacuanëpijivi ata, taeyabuatsianatsibeje. <sup>10</sup> Dioso apo pejumecovënëtsivi sivajamatabëcuenebarëyatsibeje tsane petëpanucaejavabeje. Bitso cajena barëya tsane Dioso apo pejumecovënëtsivi. Nexata pebarëyajamatabëcuene fiesta exanaena. Namataenetsia narajutsiana amoneya itsacuene-javanë. Bajarapacuenia exanaena Dioso apo pejumecovënëtsivi bajaraponëbeje petëpaejavabeje yabara. Tsi paji Dioso apo pejumecovënëtsivi jumaitsi tsane: “Copiaruca rabaja maponëbeje livaisi vajanacatsipaebabiabijavaje. Copiaruca baja vajanacajamatabëitonotabiabijava,” jai tsane. <sup>11</sup> Itsiata baitsi jane petëpaecujinae beje, acueyabi pamatacabibecujinae itsamatacabi epatua, icatsia Dioso piasaëjumali rajutsianatsibeje. Nexata petëpaejavabejevecua namatacotsianabeje. Daxita cajena pamona taeyabuatsianatsibeje petëpanucaejavabeje, bitso cujunavianatsibeje. <sup>12</sup> Bajaraxuacujinae bajaraponëbeje jumetaenabeje athëbëvetsica pinijijumeta pejumaitsijavatsibeje: “Pajunaiminabeje,” pejaijavatsibeje. Nexata bajaraponëbeje junaeniabeje athëbëabetsia itarërëbo tuatuajëjavabetsia. Daxita pitoyavitsibeje pëtaenubenaenatsibeje. <sup>13</sup> Bajara jane paepatota ira najëabiana. Nexata Jerusalén tomarata, itsajota diez pabobeje najuaenaena, caebo yajuvënëjopaponaena. Nueve nexata pabobeje nacopataponaena. Nexata Jerusalén tomarata ayaijava bo othopaena. Siete mil pijinia pajivibeje bajarapairanajëabita tēpaena. Jerusalén

tomarapijivi, pamonaē nacopabiana, bitso cajena junaviana. Nexata bajarapamonaē pecajunavi, Diosojavabelia jumaitsi tsane:

—Diosomē, ayaijamatabēcuenenēmē bitso, jai tsane pecajunavi Diosojavabelia, athēbētatsia peecaenējavabelia.

<sup>14</sup> Anijapiayaicuenebeje rabaja panepaena. It-siata baitsi jane icatsia itsajava piayaicuenejava bepija najetarucaena, acueyabijava.

*Sietenē baja ángelnē pijatrompetā piobijava yabara pelivaīsi*

<sup>15</sup> Sietenē jane baja ángelnē oba pijatrompetā. Nexata athēbēvētsica pinijijumeta pejumaitsijava, jumetaniji. Jumaitsi mapacueniaje:

Daxitanacuanēpijivi rajane baja vajatuxanenē Cristobeje, Diosobeje, evetaponaponaen-abeje. Bajaraponēbeje evetaponaponaen-abeje daxitamatacabijavabelianexa, pejaijava athēbēvētsica, jumetaniji.

<sup>16</sup> Nexata pamonaē veinticuatro ponēbeje ancianovi, pamonaē ena pijatronota Dioso pitabarata, daxita bajarapamonaē irataeya bobena. <sup>17</sup> Bajarapamonaē ancianovi irataeya jumai tsanubenae Diosojavabelia:

Xamē Diosonēmē, niajamatabēcuenesaēnē daxita mapanacuanē pevetsivivecuaje. Ajena, pamatacabi, ponaponame. Bajayata mapanacuae nexanaevajēnaeya ata, ponaponame. Daxitamatacabijavabelianexa ata ponaponame. Pexaniajamatabēcue ne pacarajutatsi. Tsipaji baja taxuxuabame pinijisaēta nevetaponaponaenexa

daxita mapanacuanëpijivije. <sup>18</sup> Daxita mapanacuanëpijivije cabaraanaepana bitso. Bajaraxuata tocopiapatatsi baja nenaneconitsiaexanaenexa daxita bajarapamonae. Tocopiapatatsinua baja petëpaevimi ata nenaneconitsiaexanaenexa. Tocopiapatatsinua baja nijajivi, xuavajëto catonacuenebavanapa, bajarapitsijavavajëto nerajutsinexa pecatonacuenebavanapaematamo. Pamonaë catotsipaebavanapa nijumelivaisi itsamonaëjavabelia, bajarapamonae jane baja rajutsianame xua toxainame bajarapamonae nerajutsinexa. Pamonaë ayaijamatabëcuene pexainaevi ata, cavënëlivaisiyaiyatane. Pamonaë beveliajamatabëcuene pexainaevi ata, cavënëlivaisiyaiyatane. Bajarapamonae ata jane baja rajutsianame xua toxainame bajarapamonae nerajutsinexa. Tocopiapatatsinua baja pijinia neverebiabinexa daxita pamonaë bijiana mapanacuaje, pamonaë ata jamatabëcuenebijiana pecajumecovënëtsivi,

jai tsanubenae irataeya ancianovi Diosojavabelia.

<sup>19</sup> Nexata athëbëtatsia Dioso pijatemplobo nabaupata. Bajarapatemplobo ënëtatsia taeyabuatsiajë baula. Bajarapabaulaënëta jeba Dioso pejumelivaisi peyaquinajebijava. Bajarapaitane jumai tsarubenae pacuenia Dioso najumecapanepaeya jumaitsi pijajivi pecapanepaenexa pijaneconivecua. Yamaxë binebinejai. Najumetanua. Ira najëabanua. Bitso

pecainejebimatarejetonë irabetsica othopaica  
pinijicuenia.

## 12

*Pacuenia Juan athëbëtatsia tane dragón bitso pi-  
anaepanaejava yabara pelivaisi*

<sup>1</sup> Athëbëtatsia ayaicuene naitajëta  
vajanacayapëtaeyaexanaenexa pacuenia  
itsamatacabi pevajënaeyabelia itsi tsaponaejitsia  
mapanacuataje. Athëbëtatsia petiriva taenutajë.  
Petiriva jumanava naitayotanuca. Pacuenia  
matababipijijuameto baitayota, bajarapacuenia  
jumanava naitayotanuca. Meravipijijuameto-  
javavelia nataxunutanuca. Namataxatatatanuca  
doce patuluputobeje pexainaecorona.

<sup>2</sup> Bajarapova petiriva penacueto peyacotajinaeva.  
Pevixaenotsijavatatsi bitso yaaëaëjai. <sup>3</sup> Nexata  
bajarajotatsia naitajëta piayainë, petsobianë,  
pinijinëxaneto dragón, baitsi dovathi. Xaina  
siete pamatabocotobeje, diez pamataetobeje.  
Caematabocoto canacujitsia namataxatatapona  
corona. <sup>4</sup> Bajaraponë, dragón, nabosovebabia.  
Nexata penabosovebabejavata tulupu ayaijava  
penetsica irabetsica. Xuavajëto tulupu othopaica  
irabetsica, bajaraxuavajëto matatoxenetsia  
nacopabarubenaya athëbëtatsia. Bajaraponë,  
dragón, nucojopa penacueto pevixaenotsivatsi  
pitabarata, bajarapova itsa vecuanaexanatsi  
penacueto, pecoxixaenexatsi picani. <sup>5</sup> Nexata  
jane baja petiriva vecuanaexanatsi pebinëyo.  
Bajaraponëyo caponatsi Diosojavabetsia  
Dioso pijatronota peecaenexa. Nexata baja

bajaraponēyo apo xaetsi dragón. Bajaraponē itsamatacabi mapanacuata jivi pepo pevetsinē tsane. Itsa evetsiana, ajumesaēya itorobabiabiana pejumecovēnētsinexatsi. <sup>6</sup> Nexata petiriva penacuetonēyo pevecuanaexanaecujinaetsi, najetabajirava petusato nacuayabelia, itsabelia Dioso tsivajēnaexaniavaetatsi peponaponaenexa. Bajarajota pexaejava baja Dioso rajutatsi mil doscientos sesenta pamatacabibeje.

<sup>7</sup> Bajaraxuacujinae athēbētatsia vajabitsaē exana. Angelevi penamatacaitorobinē, Miguelvēnēnē, pijaängelevi yajava, barēnabia dragónjavabelia. Dragón pijinia, pijaängelevi yajava, barēnabia Migueljavabelia. <sup>8</sup> Itsiata baitsi jane dragón cujiruamoneyabatsi. Nexata apo tocopatsitsi caenē ata dragón pijajivitonē penacopatsinexa athēbētatsia. <sup>9</sup> Dragón cajena ayainēxaneto. Itsiata baitsi jane xuabocatsi athēbēvetsica daxita pijajivi yajava. Nexata bajaraponē pevēnē Dovathi. Itsavēnē Satanás. Bajaraponē bajayata itsa naitajēta jivijavabelia, naitajēta bejomocuenia. Bajaraponē jivi yamaxēitojorobabiaba daxitanacuanējava.

<sup>10</sup> Nexata jumetaniji pinijijumeta athēbēvetsica pejumaitsijava. Jumaitsi mapacueniaje:

—Copiapata rabaja Dioso vajanacacapanepae-javanexa vajanekonivecua. Copiapata rabaja Dioso pesaēta jivi pevetaponaponaenexa. Copiapata rabaja Dioso pijajivi pitorobaponaenexa. Copiapata rabaja Cristo ata pitorobaponaenexa mapanacuajavaje. Bajarapacuenia copiapata baja daxita bajarapacuenē tsipaji baja ponē neconitabiaba Diosojavabelia Dioso

vajanajuajumecovënëtavanapaevi, bajaraponë  
baja xuabocatsi athëbëvetsica. Baitsi dovathi.  
Bajaraponë picani Dioso pitabaratatsia nuca.  
Nexata bajaraponë daxita matababijebi,  
daxitameravijebi ata, Diosojavabelia neconitabi-  
aba Dioso vajanajuajumecovënëtavanapaevi.

<sup>11</sup> Dioso vajanajuajumecovënëtavanapaevi  
pejumecovënëtsixae Cristo pesivatëpaejavatsi  
cruzata, cueneamoneyabapona dovathi.  
Bajarapacuenia cueneamoneyabapona tsipaji  
navajunupaebaponanua itsamonaejavabelia  
Cristo pecapanepaejavanexatsi pijaneconive-  
cua. Dioso vajanajuacovënëtavanapaevi

jamatabëjumai tsabiabi: “Itsa nebeyaxuabiana  
Dioso pejumelivaisi yabara, jema baja  
nebeyaxuabiana,” jamatabëjai tsabiabi.

<sup>12</sup> Athëbënacuatatsia panejinavanapaevi, pasi-  
vajanatabëcuenebarëyamëre Dioso mapanacuaya-  
betsicaje papecavecuaxuabijavatsica dovathi.  
Mapanacuataje panejinavanapaevi, bitso cajena  
bepajibimë tsane. Paxamë ata, manuameneta  
panejinavanapaevi, bitso cajena bepajibimë  
tsane. Bajarapacuenia bitso bepajibimë tsane  
tsipaji baja panetuatuajëatsica dovathi xuabocatsi.  
Nexata baja aeconoxae bitso bajaraponë  
anaepanaponapona. Tsipaji baja yapëtane  
caematabibeje saya petonacopatsijavatsi  
pexuabinexatsi infiernojavabelia, pejaijume  
athëbëvetsica pinijijumeta, jumetani.

<sup>13</sup> Nexata dragón, ponë dovathi, itsa  
yapëtane athëbëvetsica pexuabijavatsitsica  
irabetsica, nexata barajinapona pova  
vecuanaexanatsi pebinëyo. <sup>14</sup> Itsiata baitsi

jane bajarapova rajutatsi anijacorofetobeje, becotsalacorofetobeje. Bajarapova nexata dragón vecuapuna tajëbelia, petusato nacuayabelia, bajarajotalia peponaponaenexa. Nexata bajarajotalia Dioso rajutabiabatsi pexaejava acueyabi pavaibeje epatua.<sup>15</sup> Dragón pecuibovojotuatsina capitsapa mera, ayaira. Pecuibovojotuatsina pepitsapaemera naexana pepamene pecaponaenexatsi picanì petiriva.<sup>16</sup> Itsiata bairi jane petiriva Dioso yavenonatsi. Ira nexata navoconareca ayaijava. Nexata pamerami dragón pecuibovojotuatsina pitsapaina, bajarapamëthëareca joneca.<sup>17</sup> Bajaraxuata nexata dragón bitso anaepana petirivajavabelia. Nexata baja icatsia dragón pona petiriva pexi penacopabivi pebeyejebinexa. Bajarapamonae jumecovënëtavanapa Dioso pejumelivaisi pitorobicueniatsi. Bajarapamonae caasaë tsavanapaenua penavajunupaebijava Jesucristo pejumecovënëtavanapaejava. Nexata bajarapamonae dragón tsimaxëponatsi pebeyejebinexatsi.

## 13

*Pacuenia piayainëbeje pelivaisi Juan yaquina yabara pelivaisi*

<sup>1</sup> Nucajë manumene tajetabota. Nexata taenucajë manumenejavatsina pepitsapaejavatsina piayainë. Siete pamatabocotobeje diez pamataetobeje pexainaenë. Caemataeto canacujitsia xainapona corona. Caematabocoto canacujitsia Dioso apo pejitsipaevënëanë

itanerubena. <sup>2</sup> Ponë piayainë taenucajē pepit-sapaejavatsina, benevēthē picani. Itsiata petaxu betsonētaxu. Pecuibovojoto pijinia benevēthē petsobianēcuibovojoto. Bajaraponē nasaērajutatsi dragón. Pijatrono ata rajutatsi. Jamatabēcuenē caējēpaeyaexanatsinua ayaicuenia pitorobinexa daxitajivi mapanacuajavaje. <sup>3</sup>

Piayainē caematabocoto matabocovajēnēbatsi apo bepeyaasaēvajēnēnexa itajara. Itsiata baja bajarapavajēnē matanacēta. Nexata daxitanacuanēpijivi itsa tane bajaraponē pematavajēnēnacētsijava, bitso jamatabēcuenenabenajaca. Nexata bajarapamonae jumecovēnēta bajaraponē.

<sup>4</sup> Dragón tocopatatsi pitorobinexa daxitajivi mapanacuajavaje. Bajaraxuata daxitajivi pematabacabēta navajēcabiaba dragónjavabelia. Pematabacabēta navajēcabiabanua piayainējavabelia ata. Bajarapamonae najumaitsi mapacueniaje:

—Ajibi cajena itsanē ata pejamatabēcuenecaējēpaenētsi pacuenia itsi mapapiayainēje. Ajibi cajena itsanē ata pecaējēpaenētsi pebarēnabenexa maponēje pecueneamoneyabinexa, najai bajarapamonae piayainē yabara.

<sup>5</sup> Piayainē tocopatatsinua pibisiacuenia Dioso pebaracuaicuaijainexa. Tocopatatsinua pejumaitsabiabinexa: “Xanē cajena bitso ayaijamatabēcuenenēnē Dioso matatoxenetsia,” pejaitsabiabinexa. Tocopatatsinua pitorobinexa jivi mapanacuajavaje cuarenta y dos pajuametobeje, baitsi acueyabi pavaibeje epatua.

<sup>6</sup> Bajaraponē exanapona pacuenia tocopatatsi. Bitso pibisiacuenia Dioso baracuaicuaijai

tsabiabi. Dioso pijatemplobo ata pibisiacuenia baracuaicuaijai tsabiabi. Athëbëtatsia pejinavana-paevi ata pibisiacuenia baracuaicuaijai tsabiabi. <sup>7</sup> Tocopatatsinua vajabitsaë pexanaenexa Dioso pijajivijavabelia. Tocopatatsinua pecueneamoneyabinexa vajabitsaë itsa exana Dioso pijajivijavabelia. Tocopatatsinua pitorobinexa daxitaviriajumevi ata. Tocopatatsinua pitorobinexa daxita nacuanëpijivi ata. <sup>8</sup> Nexata daxita mapanacuapijivije pematabacabëta navajëcabiaba piayainëjavabelia. Dioso nacua pexanaevajënaeya, Dioso nacua pexanaecujinae ata, bajarapamonae apo vënërubena Corderonë pijacuyalatobaxutota. Corderonë jivi rajuta matabi apo pevereverecaejava pesivatëpaexae cruzata.

<sup>9</sup> Itsa pamuxuvojorubename, panatojumetaema mapalivaisije. <sup>10</sup> Pamona Dioso pijajivi naneconitsiaexanaena, nexata penaneconitsivi pejebabiabibojavabelia jebiana, bajarapamonae juya itsamonae naneconitsiaexanaenatsi. Pamona pijinia Dioso pijajivi espadata bena, bajarapamonae juya itsamonae bajarapitsiespadata benatsi. Bajaraxuata itsamonae Dioso pijajivi bejiobiaexanabiabi atatsi, xanepana xaniavaetsia penajamatabëcuenecopatsinexa Diosojavabelia epatua copatsinejeva.

<sup>11</sup> Bajaraxuacujinae icatsia taenucajë iravetsina pepitsapaejava itsanë piayainë. Anijamataetobeje pexainaenë. Pacuenia oveja pebito mataeitsi, bajara pemataeitsinë. Itsiata baitsi jane pecuaicuaijajava, pacuenia dragón pecuaicuai-

jaijava jumeitsi, bajarajumeitsi. <sup>12</sup> Papiayainē  
 copiaya pitsapaina manuamenejavatsina,  
 bajaraponē yajavaponapona. Nexata papiayainē  
 copiaya pitsapaina manuamenejavatsina,  
 nasaërajuta iravetsina papiayainē cotocaevi  
 pitsapainajavabelia. Nexata papiayainē  
 cotocaevi iravetsina pitsapaina, daxita  
 mapanacuapijivi itoroba papiayainē copiaya  
 manuamenejavatsina pitsapainajavabelia  
 pematabacabëta penavajëcaenexa. Baitsi  
 ponē apo bepeyaasaëvajënënexa itajara  
 matavajënënacëta baja, bajaraponëjavabelia  
 daxita mapanacuapijivije pematabacabëta  
 penavajëcaenexa. <sup>13</sup> Nexata papiayainē iravetsina  
 cotocaevi pitsapaina, ayaicuene pexanaejava jivi  
 tsitaexanapona. Pitatsajaviitaire ata athëbëvetsica  
 othopaeyaexana irabetsica daxitajivi  
 petaenubenaejavata. <sup>14</sup> Bajarapacuenia  
 ayaicuene pexanaejava pexanaponaexae,  
 yamaxëitojoroba mapanacuajava pejin-  
 vanapaevi. Bajarapaayaicuene exanapona,  
 papiayainē copiaya manuamenejavatsina  
 pitsapaina, pitabarata. Bajaraxuacujinae,  
 papiayainē cotocaevi iravetsina pitsapaina,  
 itorobapona Dioso apo pejumecovënëtsivi  
 pexanaenexa pejumapecataenë. Nexata Dioso  
 apo pejumecovënëtsivi, papiayainē copiaya  
 manuamenejavatsina pitsapaina, bajaraponē  
 jumapecataeya exana jane baja. <sup>15</sup> Nexata papi-  
 ayainē cotocaevi iravetsina pitsapaina, caëjëpatsi  
 piasaëyaexanaenexa Dioso apo pejumecovënëtsivi  
 jumapecataeya pexanaenë. Nexata asaëyaexana.  
 Bajarapacuenia asaëyaexana papiayainē copiaya

manuamenejavatsina pitsapaina Dioso apo pejumecovënëtsivi jumapecataeya pexanaenë pecuaicuaijainexa. Pamonaē pematabacabēta apo nanavajēcae bajarapajumapecataenējavabelia, beyaxuabiaexanapona. <sup>16</sup> Papiayainē cotocaēvi iravetsina pitsapaina, bajaraponē jane baja pejamatabēcueneta, daxitajivi mapanacuata pejinavanapaēvi, cobejumaitanerubaponatsi, pecujanenia pacobe. Itsa jume, pitapathaitota ata itapaitanerubaponatsi. Nexata bajaraponē pejamatabēcueneta itanerubaponatsi daxitajivi. Itanerubaponatsi beveliajamatabēcuenēvi. Itanerubaponatsi ayaijamatabēcuenēvi ata. Itanerubaponatsi ricovi ata. Itanerubaponatsi bepejiobivi ata. Itanerubaponatsi pamonaē ata dajubicuenia canajetatsi itsamonaējavabelia amoneya petonacuenebabiabinexa. Itanerubaponatsi pamonaē ata dajubicuenia apo canajetsitsi itsamonaējavabelia amoneya petonacuenebabiabinexa. <sup>17</sup> Nexata pajivi aitanejibi, apo tocopatsitsi itsacuenejavayo ata pecomuatsinexa. Apo tocopatsitsinua itsacuenejavayo ata pecanajetsinexa. Paitanetota jivi itanerubaponatsi, papiayainē copiaya manuamenejavatsina pitsapaina, bajaraponē pevënē. Itsa apo pevënē, nexata pijanúmero. <sup>18</sup> Mapajamatabēcuenelivaisi bepacanaējētameje xaniavaetsia paneyapētaenexa. Pajivi yapētane, canaējētsi piayainē pijanúmero. Tsipaji bajaraponē panúmero xaina pevënēnexa. Panúmero bajaraponē xaina seiscientos sesenta y seis.

# 14

*Pacuenia Juan tane 144.000 pajivibeje Dioso pijajivi penaxëanaejava yabara pelivaisi*

<sup>1</sup> Taenutajë Corderonë penucaejava Siónvënë tsutojumata. Barënuca ciento cuarenta y cuatro mil pajivibeje. Bajarapamonae pitapathaitota itanerubena Corderonë pevënë, Corderonë paxa ata pevënë. <sup>2</sup> Bajaraxuacujinae jumetaniiji athëbëvetsica pecuaicuaijajava. Pecuaicuaijajava najumeta pacuenia bitso banajumeta pinijijonca. Najumetanua beyamaxë penajumetsijume ata. Pecuaicuaijajava najumetanua pacuenia arpa banajumeta, ayaibitsaëtoxaneto itsa najuaracata. <sup>3</sup> Corderonë pijajivi naxëananubena pejanavaji trono pitabarata, cuatro ponëbeje piaithiavi pitabarata ata, ancianovi ata pitabarata. Itsajivi ata cajena apo caëjëpaetsi pecujaninexatsi bajarapavaji. Pamonaе ciento cuarenta y cuatro mil pajivibeje, ëbajarapamonae, caëjëpatsi penaxëanaenexa bajarapavaji. Bajarapamonae neconimatamotatsi Corderonë pijanata. Nexata baja bajarapamonae Dioso capanepatsi mapanacuavecuaje. <sup>4</sup> Bajarapapebijivi penaexanaejavaverenacujinae apo naperabëquenetsiatæ petirivajavabelia. Apo jamatabëcuenebijianaetsi itsajivi ata. Bajarapamonae pënajinavanapa Corderonë itsaxuayo ponapona. Bajarapamonae Corderonë pijanata neconimatamotatsi. Nexata baja bajarapamonae capanepatsi Diosojavabelia mapanacuavecuaje. Bajarapamonae baja namataxainaeya capanepatsi Dioso pijajivinexa,

Corderonē ata pijajivinexa. <sup>5</sup> Bajarapamonae caeto ata apo najumetsēnētsi. Aneconijibi tsavanapae Diosojavabelia.

*Pacuenia acueyabi ponēbeje ángelevi vajunupaeba pacuenia itsamatacabi itsijitsia mapanacuataje yabara pelivaisi*

<sup>6</sup> Icatsia ángelnē taniji pepunanajetarucaejava. Canajetaruca pexanialivaisi, apo peverevere-caelivaisi. Tsipaebijitsia bajarapalivaisi mapanacuajava pejinavanapaevi. Tsipaebijitsia daxitanacuanēpijivi, daxitaviriajumevi ata.

<sup>7</sup> Angelnē pinijijumeta jumai tsanajetaruca:

—Dioso cujunaviaya pajinavanapare. “Xamē bitso ayaijamatabēcuenenēmē,” pajamēre tsabiabi Diosojavabelia. Copiapata rabaja Dioso penaneconitsiaexanaponaenexa daxitajivi. Ponē itaboxo exana, ira ata, manumene ata, mera pepitsaparubenaejavanē ata, bajaraponējavabelia panematabacabēta panavajētabiabare, jai tsanajetaruca ángelnē pinijijumeta.

<sup>8</sup> Icatsia cotocaevi taniji itsanē ángelnē pepunanajetarucaejava. Jumai tsanajetaruca bajarapaángelnē:

—Verebiabatsi rabaja Babilonia tomarax-anetomita pejinavanapaevimi. Tsipaji Babilonia tomarapijivimi navajēcabiaba jumapecataeya pexanaenēanējavabelia. Nexata belia daxita nacuanēpijivi ata navajēcabiaba jumapecataeya pexanaenēanējavabelia. Babilonia tomarapijivimi jumapecataeya pexanaenēanējavabelia penavajēcajamatabēcueneta, jamatabēcuenebijianapona daxitanacuanēpijivi.

Nexata pacuenia pevitota pibisiacuen  
 pexanabiabiva pejamatabēcueneta, daxitajivi  
 jamatabēcuenebijianapona, bajara pijinia  
 pacuenia Babilonia tomarapijivimi ata  
 jumapecataeya pexanaenēanējavabelia  
 penavajēcabiabijamatabēcueneta, ja-  
 matabēcuenebijianapona daxitanacuanēpijivi.  
 Bajaraxuata bajarapacuenia verebiabatsi, jai  
 tsanajetaruae ángelnē, ponē cotocaevi taniji  
 pepunanajetaruaejava.

<sup>9</sup> Bajaraxuacujinae icatsia taniji  
 acueyabiángelnē pepunanajetaruaejava. Ba-  
 jarapaángelnē pinijijumeta jumai tsanajetaruae:

—Pajivi pematabacabēta navajēcabiaba  
 piayainējavabelia, bajaraponē jumapecataeya  
 pexanaenētsijavabelia ata, bajarapajivi  
 naneconitsiana Diosojavabelia. Bajarapajivi  
 itsa nacopatanua piayainē pevēnēta pitapai-  
 tanerutsinexatsi, itsa jume, pecobejumata  
 ata pecobejumaitanerutsinexatsi, nexata  
 bajarapajivi naneconitsiana Diosojavabelia.

<sup>10</sup> Dioso bitso pebaraanaepanaexaetsi,  
 bajarapajivi bevelia apo naneconitsiaexanaetsi  
 tsane. Ayaicuenia naneconitsiaexanaenatsi  
 isotojavabelia, azufre petajueisotojavabelia.  
 Nexata bajarapajivi isoto petajuta bitso  
 jamatabēfaenaena Dioso pijaánglevi pitabarata,  
 Corderonē ata pitabarata.

<sup>11</sup> Athēbēabetsia  
 bajarapaisototsēxē junaenia daxitamata-  
 cabijavabelianexa. Ayaicuenia bajarapajivi  
 Dioso penaneconitsiaexanaejavatsi, tsitecaena  
 daxitamatacabijavabelianexa. Bajarapajivi isoto  
 petajuta bitso pejamatabēfaenaejava, caepatoyo

ata apo copatsi tsane. Bajarapacuenia Dioso naneconitsiaexanaenatsi pajivi pematabacabëta navajëcabiaba piayainëjavabelia, bajaraponë jumapecataeya pexanaenëtsijavabelia ata. Bajarapajivi itsa nacopatanua piayainë pevenëta pitanerutsinexatsi, bajarapacuenia Dioso naneconitsiaexanaenatsi. <sup>12</sup> Bajaraxuata Dioso pijajivi xaniavaetsia bejumecovënëtavanapa Dioso pitorobilivaisitsi. Becaasaënua tsavanapae Jesúsjavabelia penajamatabëcuenecopatsijava, jai tsanajetaruae acueyabi ángelnë pepunanajetaruaejavata.

<sup>13</sup> Bajaraxuacujinae jumetaniiji athëbëvetsica tanejumaitsijava. Nejumaitsi athëbëvetsica mapacueniaje:

—Yaquinarure mapacuenia pejumaitsi-itaneje: “Mapamatacabijavaveliacujinaeje, pevajënaeyabelia ata, jamatabëcuenenarëya baja tsavanapae tsane pamonaë tēpaponä Dioso pepua pejumecovënëtsivi,” pejaiitane, yaquinarure, nejai athëbëvetsica.

Espíritu Santo ata nejumaitsi bajarapamonae yabara mapacueniaje:

—Xaniajai rabaja tsane. Bajarapamonae nacueraevetsiana penacuenebijava. Pamatacabi abaxë bajarapamonae asaë tsavanapae mapanacuataje, daxita xua pexaniacune exanavanapa, bajaraxuajamatabëcuene Dioso athëbëtatsia matamotsianatsi. Bajaraxuata jamatabëcuenenarëya tsavanapae tsane bajarapamonae, nejai Espíritu Santo.

*Pacuenia itsamatacabi Dioso naneconitsiaex-  
anaejitsia daxita pamonaē pijaneconi pexainaēvi  
yabara pelivaisi*

<sup>14</sup> Icatsia taniji penioponaēitarērēbo. Bajara-  
paitarērēbo tuatujēta jivitonē eca. Itarērēbo tuat-  
ujēta peecaenē yabara jamatabējumaitsinē:

—Jesús raeta, Daxitajivi Pematapijinē,  
jamatabējanē.

Namataxatateca orocorona. Cobenaeca  
bemasete pexiujaijava pecaucubinexa  
penaveretsiruanē. <sup>15</sup> Nexata icatsia itsanē  
ángelnē pitsaparena temploboēnēverena.  
Bajarapaángelnē asaēyata vavajai itarērēbo  
tuatujēta peecaenējavabelia. Jumaitsi  
bajarapaángelnē:

—Caucubare jane baja penaveretsiruanē ma-  
panacuayaberecaje. Copiapata rabaja pecaetu-  
atsinexa penaveretsixu mapanacuatarecaje, jai  
ángelnē, ponē pitsaparena temploboēnēverena.

<sup>16</sup> Nexata bajaraxuacujinae ponē eca  
itarērēbo tuatujēta, bemasete pexiujaijava  
yota irajumabereca. Caucuba jane baja  
penotsinexa penaveretsiruanē. Pecaucubijava  
penaveretsiruanē penotsinexa, mapaja-  
matabēcuenelivaisi xainaje. Pacuenia caucuba  
penaveretsiruanē penotsinexa, bajara pijinia  
pacuenia itsamatacabi daxita Jesús pijajivi  
pitsiana.

<sup>17</sup> Bajaraxuacujinae icatsia athēbētatsia  
itsaángelnē pitsaparena temploboēnēverena.  
Bajaraponē ata capona bemasete pexiujaijava  
pecaucubinexa penaveretsiruanē. <sup>18</sup> Icatsia  
itsaángelnē pitsaparena altarjavaverena.

Bajarapaángelnë altarpijiisoto pevetsinë. Junata pinijijumeta itsaángelnë, bemasete pexiujaijava pecaponaenëjavabelia. Jumaitsi bajarapaángelnëjavabelia mapacueniaje:

—Mapanacuayaberecaje caucubaremeca daxita uvaruanë, penaveretsiruanë, jai.

<sup>19-20</sup> Nexata jane baja bajarapaángelnë bemasete pexiujaijava yota irajumabereca. Caucuba jane baja uvaruanë, penaveretsiruanë. Nexata bajarapauvaruanë othotajarabaxuaba pinijivaxixaneto ënëabelia, bajarapavaxixanetoënëta pemarëbeneyujubataxuabinexa. Nexata jane baja uvacuaimarëbene yujubataxuaba tomara jumav-erena. Nexata pemarëbeneyujubataxuabijavata, pinijijanaraxaneto pitsapapona. Nexata bajarapajanaraxaneto navotanucapona. Bajarapajanaraxaneto penavotanucaponaejala, piapiajava xaina trescientos pakilómetrobeje. Piavajubuajava pijinia xaina bejamatabëcuene caemetro epatua. Xua taniji, uvaruanë penaveretsiruanë pecaucubijava, xua ata taniji, pinijivaxixaneto ënëabelia piothotajarabijava pemarëbeneyujubataxuabinexa, xaina mapajamatabëcuenelivaisije. Itsamatacabi ángelnë caetuatsiana daxita pibisiacuene pexanaevi penaneconitsiaexanaenexa. Nexata pibisiacuene pexanaevi ayaibitsaëtoxanetonë tēpaena. Nexata bajarapacuenia ayaijana xuabiana.

## 15

*Pacuenia Juan tane athëbëtatsia siete ponëbeje ángelevi, siete xuabeje piayaijavanë pecaponaevi*

*peverebiabinexa mapanacuaje, yabara pelivaisi*

<sup>1</sup> Icatsia taniji athëbëtatsia pinijicuene pitajëtsijava pacuenia itsamatacabi itsijitsia mapanacuataje. Pinijicuene pitajëtsijava itsa taniji, nabenajacajë bitso. Siete paángelnëbeje capona siete xuabeje piayaijavanë peverebiabinexa mapanacuaje. Bajarapapi-ayaicuene pepanepaecujinae, Dioso bitso jivi pebaraanaepanaejava, copiarucaena baja.

<sup>2</sup> Nexata icatsia taeyetajë bemanuamene picani. Itsiata baitsi jane piatajajava. Pacuenia vidriojava nasaba, bajarapitsijava. Itsiata bajarapaboxoya pitarunutsicotia xaina. Tanijinua jivi bajarapamene boxojumavereca penubenaevi. Bajarapamonae cueneamoneyaba piayainë. Cueneamoneyabanua bajaraponë jumapecataeya pexanaenëtsi ata. Tsipaji pamonaе nubena bajarapamene boxojumavereca, itorobi atatsi bajaraponëbejejavabelia pematabacabëta pevajëcaenexa, apo jume-covënëtsi. Apo nacopatsinua pitanerubinexatsi piayainë pijanúmerota, panúmero xaina piayainë pevënënexa. Bajaraxuata bajarapamonae canubena arpa, Dioso perajutsiarpatsi.

<sup>3</sup> Bajarapamonae naxëananubena Moiséspijinë, Dioso pijajivitonë, pevaji. Bajarapavaji Corderonë ata pevaji. Penaxëanaejavata, bajarapamonae vajita jumai tsanubenae mapacueniaje:

Xamë Diosomë, niajamatabëcuenesaënë daxita mapanacuata jivi pevetsivi matatoxenetsia. Xua pinijicuene exaname, bitso pexaniacuene. Xamë daxitanacuanë

nevetsinë. Daxita xua pexaniacuene, nexanaenë. Penajumetsënëtsicuene jivi neyamaxëitojorobinexa, apo nexanaenë. <sup>4</sup> Daxitajivi xamë pecacujunavinë tsane. “Dioso cajena bitso ayaijamatabëcuenenë,” cagai tsane. Xamë rabaja cajena caenëmë nianeconijibinë, caeto ata pibisiacuene apo nexanaenë. Daxita nacuanëpijivi xamëjavaberena patsiana pematabacabëta xamëjavabelia penavajëcaenexa. Bajara-pacuenia catoitsane tsipaji baja daxitajivi tane ëpexaniacuene nexanaponaponaejava, jai tsanubenae Diosojavabelia bajarapamonae penaxëanaejavata.

<sup>5</sup> Bajaraxuacujinae icatsia taniji athëbëtatsia templobo ënëtuatuajëalia peyatuucutsipana penapatsijava. Bajara paënëyatuucutsijavaënëta bajayatami Dioso Moiséspijinëta penajumecopat-silivaisi peyaquinaeibopananë xaniavaetejeba.

<sup>6</sup> Bajarapatemploboënëverena pitsaparena siete paángelnëbeje. Bajarapamonae capona siete xu-abeje piayaijavanë, bajaraxuanëta mapanacuafe peverebiabinexa. Bajarapaángelevi naxataba pexaniaviriapapaëbërëjavanë, piaxuirajibijavanë. Peniojaijavanë bitso. Nacorobëcëbanubena oropananë.

<sup>7</sup> Bajaraxuacujinae pamonaе cuatro ponëbeje piaithiaviyajuvënënë, ángelevijavabelia rajuta copanë. Piayainë caeángelnë canacujitsia rajutapona caecopa. Bajarapacopanë orocopanë. Dioso, ponë daxitamatacabijavabelianexa peponaponaenë, ayaicuenia anaeya naneconitsiaexanaena pamonaе naneconita bajaraponëjavabelia.

Xuanë vënëba bajarapacopanë, bajaraxuanëta Dioso naneconitsiaexanaena bajarapamonae.  
 8 Bajarapatemplobo tuatuajëmi bitso vënëca ètsëxë. Bajarapatsëxë pitsapa Dioso ayaijamatabëcuenenëjavaverena. Itsajivi ata cajena apo caējëpaetsi pejonenexa bajarapatemplobo ënëtuatuajëabelia. Xuanë siete paängelnëbeje capona, piayaijavanë, itsa baja panepaena, matapania jivi caējëpaenatsi pejonenexa bajarapatemplobo ënëtuatuajëabelia.

## 16

*Pacuenia Juan tane athëbëtatsia pacuenia it-samatacabi Dioso naneconitsiaexanaejitsia daxita pijaneconi pexainaevi yabara pelivaisi*

1 Icatsia jumetaniji templobojavaverena pinijijumeta pejumaitsijava. Siete paängelnëbejejavabelia jumaitsi mapacueniaje:

—Paponare baja iranëjavabereca paneepacapon-aenexa jane baja xuanë siete pacopabeje vënëca, piayaijavanë. Dioso jane baja anaeya ayaicuenia penaneconitsiaexanaenexa, daxita pamonaenaneconita bajaraponëjavabelia, pejaijava, templobojavaverena jumetaniji.

2 Nexata jane baja pona penamatax-ainaeängelnë. Pecaponaera epatajaraba iranëjavabereca. Nexata daxita pamonaepiayainë pevënëitanetota itanerubatsi, daxita bajarapamonae bajarapaepatota bitso perabëtsabanareca. Nexata bitso aperabëtane

bajarapamonae. Bajarapamonae bajarapapi-ayainē jumapecataeya pexanaenētsijavabelia ata pematabacabēta penavajēcaevi.

<sup>3</sup> Bajaraxuacujinae icatsia pecotocaeviāngelnē pijacopapijira epatajaraba manuamenejav-abereca. Manuamenemi nexata naexana bepetēpaenē pijanara. Daxita baja tēpa manuameneta pejinavanapaevimi.

<sup>4</sup> Bajaraxuacujinae icatsia acueyabiāngelnē pijacopapijira epatajaraba menianējavabereca mera, iravetsina pepitsaparubenaējavanējavabereca ata. Nexata daxita bajarapameranēmi naexana ēpijanaranē. <sup>5</sup> Bajaraxuacujinae jumetaniji mera pevetsiāngelnē pejumaitsijava Diosojavabelia. Jumaitsi mapacueniaje:

—Diosomē, caeto ata pibisiacuene apo nexanaenē. Ajena, pamatacabi, ponaponame. Bajayata mapanacuaaje nexanaevajēnaeya ata, ponaponame. Pibisiacuene pexanaevi, paneconivajēto xaina, bajarapaneconivajētota naneconitsiaexaname. Bajaraxuata meranēmi pijanaranē naexanaeyaexaname. Tobijianame meranē piayainē pijajivi bajarapameranē penatsiapaenexa. <sup>6</sup> Bajarapamonae bajayata beyejeba nijajivimi. Pamonaē ata cavajunupaebapona, beyejeba. Bajaraxuata bajarapacuenia meranē pijanaranē naexanayaexaname penatsiapaenexa bajarapamonae, jai Diosojavabelia mera pevetsiāngelnē.

<sup>7</sup> Icatsia jumetaniji itsaāngelnē altarjavaverena pejumaitsijava. Jumaitsi mapacueniaje:

—Xamē Diosomē, niajamatabēcuenesaēnē daxita mapanacuata jivi pevetsivi mata-

toxenetsia. Itsa naneconitsiaexaname jivi, paneconivajëto xaina, bajarapaneconivajëtota bananeconitsiaexaname. Itsa aneconijibi tsipae, nexata cajena apo naneconitsiaexanaemë tsipae, pejaijava itsaángelnë altarjavaverena jumetaniji.

<sup>8</sup> Bajaraxuacujinae icatsia cuatroángelnë pijacopapijira epatajaraba. Epatajaraba matabipijijuametojavabetsica. Nexata matabipijijuameto pecotiata jivi bitso ayaicuena tsjavatsi. <sup>9</sup> Itsiata bajarapamonae apo copabi pibisiacuene pexanabiabijava. Apo najamatabëcuenepënëyorotsi Diosojavabelia. “Xamë bitso ayaijamatabëcuenenëmë,” apo jai ata cajena Diosojavabelia. Biji rajane Dioso, ponë cajëpatsi daxitacuene pexanaenexa, bajaraponë caranata pibisiacuena baracuaicuaijai.

<sup>10</sup> Bajaraxuacujinae icatsia cincoángelnë pijacopapijira epatajaraba. Epatajaraba piayainë pijatronojavabereca. Piayainë jane baja pevetsinacuami aitaquiri tsanucae. Piayainë jane baja pijajivi bitso penavixae-taexae, navonosine. <sup>11</sup> Itsiata baitsi jane bajarapamonae apo copabi papibisiacuene exanavanapa. Apo najamatabëcuenepënëyorotsi Diosojavabelia. Biji rajane Dioso, ponë athëbëtsia peecaenë, bajaraponë caranata bajarapamonae pibisiacuena baracuaicuaijai. Bajarapacuenia bajarapamonae Dioso pibisiacuena baracuaicuaijai penavixaetaexae, bitso peperabëtsabanaexaenua.

<sup>12</sup> Bajaraxuacujinae icatsia seisángelnë pijacopapijira epatajaraba. Epatajaraba pinijimenexanetojavabetsica, Eufratesmenejavabetsica. Nex-

ata Eufratesmenexaneto tsevajunua. Nexata bajarapacuenia namuto torucarenatsi iranë pevet-sivi penicabinexa, penajetarubenaevi oriente-javavetsina.

<sup>13</sup> Bajaraxuacujinae taniji acueyabi padovathibeje. Bajarapadovathivi be-cuaitoxicuenia pitsapa. Itsanë pitsapa dragón pecuibovojotuatsina. Itsanë pitsapa piayainë pecuibovojotuatsina. Itsanë pitsapa peyamaxëitojorobiprofetanë pecuibovojotuatsina.

<sup>14</sup> Bajarapadovathivi pinijicuene pexanaejava, exanapona. Pona baja pecaetuatsinexa daxitanacuanë pevetsivi. Bajarapadovathivi caetuatapona jivi vajabitsaë pebarëexanaenexa Diosojavabelia. Dioso piamatabëcuenesaënë daxitanacuanë pevetsivi matatoxenetsia. Bajarapamatacabi Dioso exanaena daxita pacuenia tajëvelia najumecapanepaeya jumaitsi. <sup>15</sup> Bajaraxuacujinae jumetaniji Jesús pejumaitsijava: “Panenamuxunaevere. Itsajota apo panejamatabënajinaemë, bajarajota jemata patsianicajë. Pacuenia penacobetoxotsinë jemata bapata itsajota apo jamatabënajinaetsi, bajara itsinë tsane. Nexata pajivi jamatabëcueneaitavaya ponaponaena tanecopiapitsinexa, bajarapajivi barëya tsane. Pacuenia itsajavabelia peponaejivinexa, baxaniavaeta penaxatatsijava pecaponaenexa pejumasajinaeyaniva, bajara itsi tsane bajarapajivi. Nexata pamatacabi patsianicajë, apo aura tsane,” pejaijava Jesús, jumetaniji. <sup>16</sup> Nexata jane baja dovathi pijajivi caetuataksi daxitanacuanë pevetsivi. Caetuataksi caejavata penacaetuatsinexa. Itsajota nacaetuata

daxitanacuanë pevetsivi hebreojumeta pevënë Armagedón.

<sup>17</sup> Bajaraxuacujinae icatsia sieteaángelnë pijacopapijira epatajaraba. Epatajaraba itaboxojavabetsia. Nexata athëbëtatsia templobo ënëtuatuajëta Dioso peecaetronojavaverena pinijijumeta jumaitsi:

—Daxita rajane baja vereta, jai athëbëtatsia templobo ënëtuatuajëta.

<sup>18</sup> Nexata jane baja binebinejai yamaxë. Pinijijovibo bitso najumeta. Yamaxë ata najumeta. Iranë ata najëaba pinijicuenia. Jivi pejinavanapaejavaveliacujinae mapanacuataje, caeto ata bajarapacuenia ira penajëabijava pinijicuenia apo tae. <sup>19</sup> Pinijitomaraxanetomi, Babilonia tomarami, acueyabi xuabeje natsanaeya othopa. Bajarapacuenia itsanacuanëpijitaranëmi ata othopa irata. Dioso nexata najamatabënapita pinijitomaraxanetopijivimi, Babilonia tomarapijivimi. Ayaicuenia Dioso baraanaepana Babilonia tomarapijivimijavabelia pibisiacuene bitso pexanaexae. Bajaraxuata pinijicuenia Dioso naneconitsiaexana Babilonia tomarapijivimi.

<sup>20</sup> Itsa ira najëaba, daxitatunaetonëmi, daxitatutonëmi ata, ajibi baja. Ira namatajëpa baja.

<sup>21</sup> Athëbëvetsica othopaica jivijavabetsica bitso pecainejebimatarejetonë. Bajarapamatarejetonë xaina piarevejave cuarenta pakilobeje. Nexata mapanacuapijivi pibisiacuenia Dioso baracuaicuaijai. Tsipaji athëbëvetsica piothopaejava, bitso pecainejebimatarejetonë, bitso piayaicuene.

## 17

*Pacuenia itsamatacabi Dioso naneconitsiaex-  
anaena pamonaenavajēcabiabajumapecataeya pex-  
anaenēanējavabelia yabara pelivaisi*

<sup>1</sup> Pamonaeniete paāngelnēbeje, sietepacopabeje pecaponaevi, bajarapaāngeleviyajuvēnēnē, caenē rena xanējavaberena. Bajarapaāngelnē nejumaitsi:

—Naxanitsia. Catsitajētsianatsi pacuenia Dioso naneconitsiaexanaejitsia Babilonia tomarapijivi, patomaraxaneto eca menexanetonē imoxoyojavata. Bajarapatomarapijivi Diosojavabelia apo navajēcabiabi. Caranata saya navajēcabiaba jumapecataeya pexanaenēanējavabelia. Nexata pacuenia petiriva pevitota bitso pibisiacuene pexanabiabiva jamatabēcuenetsi, bajarajamatabēcuenetsi Babilonia tomara-pijivi. Pova petiriva pibisiacuene pevitota exanabiaba, bajarapova pejamatabēcueneta jamatabēcuenebijiana itsamonaenata. Bajara pijinia pacuenia Babilonia tomarapijivi ata pexanabiabijava pejamatabēcueneta, jamatabēcuenebijiana ayaibitsaētoxaneto itsanacuanēpijivi ata. <sup>2</sup> Tsipaji itsanacuanē pevet-sivi patabiaba Babilonia tomaraberena. Nexata bajarapamonaenata copaba Diosojavabelia penavajēcabiabijava. Caranata saya Babilonia tomarapijivi cuenejēpaeya navajēcabiaba jumapecataeya pexanaenēanējavabelia. Nexata jamatabēcuenebijanatsi bajarapamonaenata, nejai bajarapaāngelnē.

<sup>3</sup> Bajaraxuacujinae Espíritu Santo netsi-jamatabēvēnēca. Nexata bemajitsinaebota

ángelnē nebarēpona petusato nacuayabelia. Bajarajotalia taeyetajē petiriva. Bajarapova eca piayainē, petsobianē, pejumata. Bajaraponē peperabētuareca, Dioso apo pejitsipaevēnēanē, itanerubena. Bajarapapiayainē xaina siete pamatabocotobeje diez pamataetobeje.

<sup>4</sup> Nexata bajarapova penaxatatsijavareca itsajava pabanaeya saējai. Itsajava tsobia. Naitabēteca orojavanēta, perlavēnējavanēta ata, penamatamotsiibotonēta ata. Cobenaeca orocopa. Pibisiacuene bitso pexanaejava pevitota, bajarapajamatabēcuenelivaisi vēnēca bajarapacopata. <sup>5</sup> Bajarapova pitapathaitota vēnēyaquinarutatsi. Pajamatabēcuenelivaisi yabara bajarapova pitapathaitota vēnēyaquinarutatsi, itsajivi ata apo yapētae. Pejumaitsijume picani mapacueniaje:

“Pinijitomaraxaneto Babiloniatomara. Bajarapatomaraverena pitsapa jivi pejamatabēcuenebijianaejavatsi, jumapecataeya pexanaenēanējavabelia penavajēcabiabinexa. Bajarapatomaraverena pitsapanua jivi pejamatabēcuenebijianaejavatsi, daxitaxua pibisiacuene pexanaenexa mapanacuataje,” pejaijume, picani bajarapova pitapathaitota vēnēyaquinarutatsi. <sup>6</sup> Taeyetajē icatsia bajarapova.

Aitajibi tsecae Dioso pijajivimi pijanarata. Pamonaē ata beyejebatsi pevajunupaebixae Jesús, bajarapamonaemi ata pijanarata aitajibi tsecae bajarapova. Bajarapitsecaejava itsa taniji, bitso baja cajena jamatabēcuenenajunaviacajē.

<sup>7</sup> Nexata ángelnē nejumaitsi:

—¿Detsa xuajitsia jamatabēcuenenajunaviacame? Cayapētaeyaexanaenatsi pajamatabēcuenelivaisi

xaina mapovaje. Ponē piayainē siete  
 pamatabocotobeje diez pamataetobeje  
 pexainaenē, ponējumata bajarapova eca,  
 bajaraponē ata pajamatabēcuenelivaisi xaina,  
 cayapētayaexanaenatsi. <sup>8</sup> Mapapiayainē  
 tanemeje, bajaraponē picani bajayata ponapona  
 mapanacuataje. Itsiata baja aeconoxae  
 bajaraponē ajibi. Itsiata baitsi jane itsamatacabi  
 pinijimēthēxanetojavatsina pitsapaenina  
 icatsia peponaponaenexa mapanacuataje.  
 Bajaraxuacujinae bajaraponēmi beyaxuabianatsi  
 pepacuene jane baja bajaraponē pecopiaru-  
 caenexa. Daxita mapanacuapijivije, pamonae  
 Corderonē pijacuyalatobaxutota apo vënērubenae  
 Dioso nacua pexanaevajēnaeya, Dioso nacua  
 pexanaecujinae ata, bajarapamonae matacabi  
 apo pevereverecaejava apo xinae tsane. Bajara-  
 pamonae jamatabēcuenenajunaviacaena piayainē  
 itsa pitsapaenina pinijimēthēxanetojavatsina, nejai  
 ángelnē.

<sup>9</sup> Icatsia ángelnē nejumaitsi:

—Pamonae baja peyapētaevi, pamonae baja  
 caējēpatsi pejumeyapētaenexa, bajarapamonae  
 pejumeyapētaenexa mapalivaisije. Papiayainē  
 xaina siete pamatabocotobeje, ponējumata  
 taeyetame petiriva, anijajamatabēcuenelivaisibeje  
 itajēta. Bajaraponē pematabocotonē, siete  
 pamatabocotobeje, mapajamatabēcuenelivaisi  
 xainaje. Siete rabaja pijinia patsutobeje  
 eca Babilonia tomarata. Bajarapasiete  
 pamatabocotobeje mapajamatabēcuenelivaisi  
 yajavaxainaje. <sup>10</sup> Siete rabaja pijinia  
 ponēbeje Babiloniatomara pevetsivi. Nexata

Babiloniatomara pevetsiviyajuvēnēvi cinco baja ponēbeje pitsapa. Seisnē abaxē aeconoxae eveta Babiloniatomara. Sietenē abaxē apo taxuxuabi pevetsinexa. Itsiata sietenē itsa evetsiana, bajayajebi apo evetsi tsane. <sup>11</sup> Papiayainē, petsobianē, taneme, mapajamatabēcuenelivaisi xainaje. Bajaraponē picani bajayata eveta Babiloniatomara. Itsiata baja aeconoxae bajaraponē apo evetsi. Tsipaji baja tēpa. Itsiata baitsi jane icatsia bajaraponē pinijimēthēxanetojavavetsina pitsapaenina Babiloniatomara icatsia pevetsinexa. Nexata icatsia bajaraponē itsa evetsiana, ochonē baja evetsiana Babiloniatomara. Bajaraponē abaxē bajayata itsa ponapona, siete ponēbeje Babiloniatomara pevetsiviyajuvēnēnēmi baja cajena. Bajaraponē icatsia Babiloniatomara itsa evetsiana, pevetsicujinae bajaraponēmi beyaxuabianatsi pepacuene jane baja bajaraponē pecopiarucaenexa, nejai ángelnē.

<sup>12</sup> Icatsia ángelnē nejumaitsi:

—Ponē piayainē pemataetonē taneme diez pamataetobeje, mapajamatabēcuenelivaisi xainaje. Diez rabaja pijinia ponēbeje, itsamatacabi nacuanē evetsiana. Nexata bajarapamonae itsamatacabi nacuanē itsa evetsiana, evetsiana diez panacuabeje. Tsipaji caenē canacujitsia evetaponaena caenacua. Bajarapamonae abaxē apo taxuxuabi bajarapanacuanē pevetavanapaenexa. Itsiata baitsi jane itsa taxuxuabijitsia nacuanē jane baja pevetavanapaenexa, copatsianatsi pijanacuanējava pevetsinexa

saya caeepatoyovajëto. Bajarapamonae  
itsa evetsiana pijanacuanëjava, piayainë  
barëevetsianatsi. <sup>13</sup> Pamonae diez ponëbeje,  
diez pijinia panacuabeje itsamatacabi itsa  
evetsiana, barënajamatabëcuenejëpaenatsi piayainë.  
Nexata bajarapadiez ponëbeje jumaitsi tsane  
piayainëjavabelia:

—Xamë pacatocopatsianatsi patanemata-  
caitorobinëexamë, jai tsane.

<sup>14</sup> Pamatacabi bajarapadiez ponëbeje  
evetavanapaena pijanacuanë, piayainë  
vajabitsaë barëexanaenatsi Corderonëjavabelia.  
Daxita pamonae Corderonë pijajivi, pamonae  
Dioso pejunatsivi, bajarapamonae pijinia  
Corderonë barëbena piayainëjavabelia. Nexata  
Corderonë cueneamoneyabiana piayainëjavabelia.  
Cueneamoneyabiana tsipaji Corderonë  
daxita petuxanevi pijatuxanenë baja cajena.  
Nexata Corderonë daxita nacuanë pevetsivi  
matatoxenetsia pepo pevetsinë, nejai ángelnë.

<sup>15</sup> Angelnë icatsia nejumaitsi:

—Pamanuameneboxovereca taeyetame  
pibisiacuene pexanaeva, bajarapamanu-  
amene mapajamatabëcuenelivaisi xainaje.  
Mapanacuata jinavanapa jivibitsaëtoxanetonë  
daxitaviriajumevi, daxitanacuanëpijivinua.  
Bajarapajamatabëcuene yabara taneme bajara-  
pamanuamene. <sup>16</sup> Pamonae diez panacuabeje  
pevetsivinexa, bajarapamonae piayainë barëitoa  
tsane pibisiacuene pexanaevajavabelia. Nexata  
bajarapamonae beyaxuabiana bajarapova.  
Jumasa xuababuatsiana. Xaeyabuatsiananua.  
Bajaraxuacujinae tajuitsiana isotota.

17 Pamonaē diez ponēbeje itsamatacabi  
 nacuanē itsa evetsiana, bajarapamonaē  
 najamatabēcuenējēpaena petocopatsinexa  
 piayainē pijanacuanē petoevetsinexatsi.  
 Bajarapacuenia najamatabēcuenējēpaena tsipaji  
 baja cajena Dioso jamatabēcuenēitorobatsi  
 bajarapacuenia pexanaenexa bajarapamonaē.  
 Nexata piayainē bajarapamonaē pijanacuanē  
 bajayajebi toevetsianatsi matapania  
 pecopiapatsijavabelianexa daxita pacuenia  
 Dioso tajēvelia najumecapanepaeya jumaitsi.  
 18 Pova pibisiacuene pexanaeva taeyetame  
 manuameneboxovereca, bajarapova mapaja-  
 matabēcuenelivaisi xainaje. Pinijitomaraxaneto  
 Babiloniatomara. Bajarapatomarapijivi  
 pejamatabēcueneta mapanacuanē pevetsivi  
 pibisiacuene exanapona, nejai ángelnē.

## 18

*Pacuenia Babilonia tomaraxanetomi copiaruca  
 yabara pelivaisi*

<sup>1</sup> Icatsia itsaángelnē taniji perunaejavatsica  
 athēbēvetsica. Caējēpatsi pinijicuenia piayaicuene  
 pitorobinexa. Bajarapaángelnē pinijicotia  
 yajavarunaica. Ira itayota daxitanacuanējáva.

<sup>2</sup> Ayajumeta vavajai. Jumaitsi mapacueniaje:

—Verebiabijitsiatsi rabaja Babilonia  
 tomaraxanetota pejinavanapaevi. Nexata  
 baja ējoriminacua tsarucae tsane. Daxita xua  
 pibisiacuene pexanaedovathivi, juya bajarap-  
 atomarata jinavanapaena. Bitso pibisiaviriavi  
 pepunaevi, pamonaē daxitajivi apo itajitsipae

petaenexa, juya bajarapatomarata jinavana-paena. <sup>3</sup> Babilonia tomarapijivi navajēcabiaba jumapecataeya pexanaenēanējavabelia. Nexata belia daxitanacuanē pevetsivi ata, pijajivi yajava, navajēcapona jumapecataeya pexanaenēanējavabelia. Nexata Babilonia tomarapijivi jumapecataeya pexanaenēanējavabelia penavajēcabiabijamatabēcueneta, daxita xua pibisiacuene pexanaejamatabēcuenetanua, jamatabēcuenebijianapona daxitanacuanēpijivi. Babilonia tomarapijivi bitso xainapona ayaijava palata pibisiacuene pexanaejamatabēcueneta. Nexata pijinia pamona Babilonia tomaraberena capatabiaba daxitacuene pecanajetsinexa Babilonia tomarapijivijavabelia, bajarapamonae ata baja bitso ayaijava palata xainapona. Bajarapacuenia Babilonia tomarapijivimi pibisiacuene pexanabiabixae, ayaicuenia naneconita Diosojavabelia. Bajaraxuata Babilonia tomarapijivi Dioso baja verebiabijitsiatsi, jai ángelnē.

<sup>4</sup> Bajaraxuacujinae icatsia athēbēvetsica jumetaniji itsajume. Jumaitsi mapacueniaje:

—Paxamē patajajivimē, papitsapare baja Babilonia tomaravecua. Papitsapare baja pibisiacuene paxamē ata paneexanaeyaniva, bajarapatomarapijivi yajava Dioso papecananeconitsiaexanaeyaniva.

<sup>5</sup> Babilonia tomarapijivi pijaneconi baja bitso ayaijava xaina. Pijaneconi itsa napebetsipa, itsa najumaetaponaejitsipa, nexata copiapatsipa itaboxojavabetsia. Dioso cajena yapētane daxita Babilonia tomarapijivi

pibisiacuene pexanaejava. <sup>6</sup> Bajarapamonae bejiobiaexanabiaba itsamonae. Nexata Dioso itsa naneconitsiaexanaena, bajarapamonae bitso ayaicuenia bejiobiaexanaena. <sup>7-8</sup> Babilonia tomarapijivi bitso beayaijamatabëcuenevi natane. Natocomuacabiaba ayaijava penamatamotsijavanë pibisiacuene pexanabiabimatomata. Bajarapamonae pejamatabëëthëtota jamatabëjumaitsi tsabiabi: “Xanë raja majota ecajë nacua betaevetsinë. Nexata apo jamatabëcuenebëjanë tsane itsacuenejavayo ata yabara. Apo namatavenonaenë tsane itsacuenejavayo ata,” jamatabëjai tsabiabi bajarapamonae pejamatabëëthëtota. Bajarapacuenia Babilonia tomarapijivi pejamatabëjumaitsixae, ayaicuenia Dioso bejiobiaexanaenatsi. Babilonia tomarapijivi caecuenia caematacabita Dioso tocopiapatsiaexanaenatsi petëpaecuene, pematanueyabicuene ata, janibocuene ata. Tajuenatsi isotota bajarapatomarapijivimi. Bajarapacuenia Dioso naneconitsiaexanaenatsi bajarapamonae tsipaji vajatuxanenë Dioso bitso piasaënë.

<sup>9</sup> Babilonia tomarapijivi pejamatabëcueneta daxitanacuanë pevetsivi jamatabëcuenebijianapona. Nexata daxitanacuanë pevetsivi copaba Dioso pejumecovënëtsijavami. Natocomuacabiabanua ayaijava penamatamotsijavanë. Nexata bajarapamonae itsa tsëxëtaena Babilonia tomarapijivimi petajuejavatsi, yaitaxutonueya vavajai tsane. <sup>10</sup> Bajarapamonae pecajunavi, tajë vecuanubenaena Babilonia tomarapijivimi itsa tajuenatsi. Bajarapamonae

najumai tsane:

—¡Bitso baja rovia bejiobi mapamonaeye! ¡Pini-jitomaraxanetota, Babilonia tomaraxanetota, peji-navanapaevimi peyaiyataevimitsi! Caepatoy-ocujinae baja veriajavatsi Dioso penaneconitsi-aexanaexaetsi, najai tsane bajarapamona.

<sup>11</sup> Daxitanacuanēja, pamona pecana-jetabiabavanapaevi, yaitaxutonueya vavajai tsane. Bajarapacuenia yaitaxutonueya vavajai tsane tsipaji baja xua capatabiaba pecanajetsinexa, ajibi baja pecomuacaevitsi tsane. <sup>12</sup> Bajarapamona capatabiaba oronanita pexanaejavanē, platananita pexanaejavanē ata, perlavēnjavanē ata, penamatamotsiibotonē ata. Capatabiabanua pexaniaviriapapaēbērē ata. Itsapapaēbērē linovēnjavanē. Itsajava sedajavanē. Bajarapapaēbērē itsajavanē peraēnaejavanē. Itsajavanē petsobiajavanē. Capatabiabanua daxitavirianaēja petuxujuvinaejavanē. Capatabiabanua pexaniajavanē, marfilvēnjavata pexanaejavanē, penamatamotsinaejavanē ata, bronceñani ata, hierroñani ata, mármolvēñeibo ata. <sup>13</sup> Capatabiabanua canelavēnjavanē, especiavēnjavanē ata, inciensovēnjavanē ata, mirravēnjavanē ata. Capatabiabanua petuxujuviranē, vinoranē ata, aceiteranē ata, pexaniaviriatrigobenonē ata, trigobultonē ata. Capatabiabanua baca, oveja ata, caballo ata, perobobocaemonē ata, carrozavēñemonē. Jivi ata capatabiaba dajubicuenia pecanajetsinexa itsamonaejavabelia amoneya petonacuenebabi-abivinexa. <sup>14</sup> Nexata daxita bajaraxua pecanajetabiabavanapaevi, yaitaxutonueya

najumai tsane Babilonia tomarapijivi yabara:

—¡Daxitacuene pejitsipaecuenemi tovereverecatsi baja! ¡Tovereverecatsi baja bitso pexainaejavami, xua picani mapanacuapijivi tane penamatamotsijava! najai tsane bajarapamonae yaitaxutonueya.

<sup>15</sup> Babilonia tomarapijivimi abaxë itsa apo tajuetsi, pamonaе pecanajetabiabavanapaevi, ayaijava palata xainapona, xua capata, pecanajetabiabixae Babilonia tomarapijivimi-javabelia. Bajarapamonae itsa taena Babilonia tomarapijivimi petajuejavatsi, yaitaxutonueya vavajai tsane. Tajë vecuanubenaena pecajunavi.

<sup>16</sup> Bajarapamonae daxita najumai tsanubenaе tsane:

—¡Bejiobitatsi bitso pinijitomaraxanetota pejinavanapaevimi! Bajarapatomarapijivimi naxatababiaba pexaniaviriapapaëbërë, linovënëjavanë. Itsajava peraënaejava. Itsajava petsobiajava. Naitabëtabiaba orojavaenëta, perlavënëjavanëta ata, penamatamotsiibotonëta ata. <sup>17</sup> ¡Caepatoyocujinae saya verevereca baja bitso pexainaejavami! najai tsanubenaе tsane daxita bajarapamonae.

Daxita pamonaе barcoxanetonë pevetsivi, bajarapamonëta penaponaevi ata, bajarapamonëta penacuenebivi ata, bajarapamonëta pecaponaejavanë pecanajetaponaevi ata, daxita bajarapamonae tajë vecuanubenaena pecajunavi Babilonia tomarapijivimi itsa tajuenatsi.

<sup>18</sup> Bajarapabarcxanetonëta peponaevi, tsëxëtaenubenaena Babilonia tomarami

itsa tajuenatsi. Nexata vavajaiya najumai tsanubena tsane bajarapamonae:

—¡Itsanacuanëjava ata baja ajibi itsatomara mapitsipinijitomaraxanetoje! ¡Caetomarami baja maje pinijitomaraxanetomi, tajuatsije! najai tsanubena tsane.

<sup>19</sup> Pamonae tsëxëtaenubenaena, natsi-mataothocaena atsabenonë, bitso pesivana-jamatabëxainaexae Babilonia tomarapijivimi. Yaitaxutonueya najumai tsanubena tsane:

—¡Bitso pinijicuenia bejiobitatsi pinijitomaraxanetomita pejinavanapaevimi! Babilonia tomarapijivimi ayaijava palata pexainaexae, bitso pexainaevi naexana daxita pamonae barco pexainaevi, pecanajetabiabixae xua capata bajarapatomaraberena. ¡Caepatoyocujinae saya bajarapatomarami verevereca baja! najai tsanubena tsane bajarapamonae.

<sup>20</sup> Dioso baja cajena itsamatacabi naneconitsiaexanaena Babilonia tomarapijivi pebejiobiaexanabiabijamatabëcuene Dioso pijajivi. Nexata itsamatacabi, Babilonia tomarami itsa vereverecaena, pevereverecaejava yabara, sivajamatabëcuenebarëya tsane daxita athëbëtatsia pejinavanapaevi. Daxita Dioso pijajivi, mapanacuata pejinavanapaevi ata, sivajamatabëcuenebarëya tsane. Apóstolevi ata, Diosojumelivaisi pepaebivi ata, sivajamatabëcuenebarëya tsane Babilonia tomarami itsamatacabi itsa vereverecaena.

<sup>21</sup> Bajaraxuacujinae piasaëángelnë yotaxuaba ibotoxaneto. Bajarapaiboto pinijiibotoxaneto bitso. Nexata ángelnë manuameniabereca

asaëyata xuabareca bajarapaibotoxaneto. Angelnë jumaitsi mapacueniaje:

—Pacuenia asaëyata xuarecajë mapaibotoxanetoje, bajara pijinia pacuenia pinijitomaraxaneto, Babiloniatomara, itsamatacabi pinijicuenia xuabianatsi. Apo taetsi baja tsane icatsia matavëjëa. <sup>22</sup> Ajumejibi baja tsane pijacallejava arpa peracatabiabijava. Ajumejibi baja tsane flauta ata piobabiabijava. Ajumejibi baja tsane trompeta ata piobabiabijava. Itsajivi ata baja apo nacuenebi tsane bajarajota. Apo najumetsi baja tsane icatsia matavëjëa trigoxu pecaquiatabiabijava pecaquiatabiabiibotoxanetota. <sup>23</sup> Itsalámpara ata baja apo naitayotsi tsane bajarajota. Ajumejibi baja tsane jivi penabarëcuaicuajitsabiabijava. Penacasabifiesta ata baja pexanabiabijava, ajibi tsane. Bajarapatomarapijivi pexainaejava pecanajetabiabavanapaevi, daxitanacuanëjava pevënëjoneyabiabivimi, ajibi baja tsane. Ajibinua baja tsane bajarapatomarapijivi daxitanacuanëjava yamaxëitojorobiaya penajorobabiabijava, jai bajarapaángelnë.

<sup>24</sup> Dioso yapëtane pacuenia Babilonia tomarapijivi pejamatabëcueneta, Diosojumepaebivimi profetavi beyejebiabatsi. Babilonia tomarapijivi pejamatabëcueneta, Dioso pijajivimi ata beyejebiabatsi. Bajaraxuata juya Dioso ayaicuenia naneconitsiaexanaena Babilonia tomarapijivi.

## 19

<sup>1</sup> Bajaraxuacujinae jumetaniji jivi ayaibitsaëtoxaneto athëbëtatsia. Pinijijumeta jumai

tsaponae mapacueniaje:

“Diosomē, jayaijamatabēcuenenēmē bitso!” jaitsi  
 vaxaitsi Diosojavabelia. Bajaraponē  
 nacacapanepa vajaneconivecua.  
 Penivenivenaecotia pexainaenē.  
 Piajamatabēcuenesaēnē bitso. Daxitacuene  
 pexanaenexa pecaējēpaenētsi.<sup>2</sup> Itsa  
 naneconitsiaexana jivi, paneconivajēto  
 jivi xaina bajaraponējavabelia, bajara-  
 paneconivajētota bananeconitsiaexana.  
 Pajivi aneconijibi, apo naneconitsi-  
 aexanae cajena. Nexata baja Dioso  
 naneconitsiaexana pibisiacuene bitso  
 pexanaevi, Babilonia tomarapijivimi.  
 Bajarapamonaemi pibisiacuene pexanae-  
 jamatabēcueneta jamatabēcuenebijianapona  
 daxitanacuanēpijivi. Bajarapamonaemi  
 pejamatabēcueneta Dioso pijajivimi  
 beyejebatsi. Bajaraxuata Dioso juya  
 naneconitsiaexana bajarapamonaē,  
 jai jivi ayaibitsaētōxaneto athēbētatsia.

<sup>3</sup> Bajaraxuacujinae bajarapamonaē icatsia ju-  
 maitsi:

—“¡Diosomē, ayaijamatabēcuenenēmē bitso!”  
 jaitsi vaxaitsi Diosojavabelia. Athēbēabetsia  
 petsēxējunaējavatsia Babilonia tomarapijivimi  
 petajuetsēxētsi, apo vereverecanucae  
 tsane daxitamatacabijavabelianexa, jai  
 bajarapamonaē.

<sup>4</sup> Pamonaē veinticuatro ponēbeje ancianovi,  
 pamonaē pijinia cuatro ponēbeje piatothiavi,  
 daxita bajarapamonaē Dioso yaiyataeya irata  
 bobena. Ira taenubena. Bajarapamonaē irata

jumai tsanubenae Diosojavabelia, tronota peecaenëjavabelia:

—¡Xanepana rabaja nexanaejava! ¡Bitso ayaijamatabëcuenenëmë! jai tsanubenae irata bajarapamonae Diosojavabelia.

<sup>5</sup> Bajaraxuacujinae icatsia tronojavaverena daxita Dioso pijajivijavabelia jumaitsi:

Dioso panecujunavivi, ayaijamatabëcuene  
panexainaevi, beveliajamatabëcuene  
panexainaevinua, pexaniajamatabëcuene  
parajutabiabare vajaDiosojavabelia,  
jai tronojavaverena.

*Corderonë penacasabifesta yabara pelivaissi*

<sup>6</sup> Icatsia jumetaniiji ayaibitsaëtoxaneto jivi pecuaicuaijajava. Bajarapamonae pecuaicuaijajava, jumetaniiji bepinijijoncajume. Beyamaxëjume ata, ayaijume, najumeta. Jumai tsaponae bajarapamonae mapacueniaje:

VajaDioso piajamatabëcuenesaënë daxita mapanacuata jivi pevetsivi mata-toxenetsia. Taxuxuaba rajane baja daxitanacuanëjava Dioso jivi pevetsinexa. Bajaraxuata vaxaitsi jumaitsitsi: “Diosomë, jayaijamatabëcuenenëmë bitso!” jaitsi vaxaitsi Diosojavabelia.

<sup>7</sup> Sivajamatabëcuenebarëyatsi Dioso. Nexata tsipaebatsi itsamonaejavabelia pacuenia sivajamatabëcuenebarëyatsi Dioso. “Diosomë, ¡bitso pinijicuene nexanaenë!” jaitsi vaxaitsi Diosojavabelia. Bajarapacuenia jumaitsitsi tsipaji baja copiapata fiesta pexanaematacabinexa,

Corderonē penacasabifiestanexa.  
 Petiriva rabaja naxaniavaeta Corderonē  
 penacasabivanexa. <sup>8</sup> Bajarapova  
 rajutatsi bitso pexaniaviriapapaëbërëjava  
 penaxatatsinexa, piaxuirajibijava, bitso  
 peniojaijava,  
 jai bajarapamonae.

“Bajarapova rajutatsi bitso pexaniaviri-  
 apapaëbërëjava penaxatatsinexa,” itsa jai,  
 comparacióncuenia pejumaitsinexa picani  
 mapacueniaje: “Dioso pijajivi aneconijibia  
 tane Cristo pesivatëpaexaetsi pijaneconi yabara,”  
 pejainexa picani. Bajarapajamatabëcuenelivaisi:  
 “Bajarapova rajutatsi bitso pexaniaviria-  
 papaëbërëjava penaxatatsinexa,” pejaijava  
 comparacióncuenia.

<sup>9</sup> Nexata bajaraxuacujinae ángelnē nejumaitsi:

—Yaquinare mapejumaitsilivaisije: “Ja-  
 matabëcuenebarëya pamonaē junatatsi Corderonē  
 penacasabifiestajavaberena,” pejailivaisi. Daxita  
 xua catsipaebatsi, bajaraxua pepacuene Dioso  
 taneitorobijava, nejai ángelnē.

<sup>10</sup> Nexata tamatabacabëta tonucajunuajë  
 ángelnē pitabarata. Pexaniajamatabëcuene picani  
 tarajutsinexa ángelnējavabelia. Itsiata baitsi jane  
 ángelnē nejumaitsi:

—Pëtsa bajaraxua exaname. Tsipaji saya  
 xanē ata Dioso pijajivitonënē. Pacuenia  
 xamē, pacuenia itsamonae ata, Dioso  
 panenajuajumecovënëtsivi xaniavaetsia  
 pajumecovënëtavanapame papexaniajailivaisi  
 Jesús pacatsipaeba, bajara saya xanē ata

taitsinē. Nexata pexaniajamatabēcuenē rajure Diosojavabelia, nejai ángelnē.

Papexaniajailivaisi Jesús pacatsipaeba, bajara-palivaisita jamatabēcuenēasaēyaexanatsi pamonaē jivijavabelia tsipaebapona Dioso pejumelivaisi.

*Pacuenia athēbētatsia Juan tane Cristo peniopon-aecaballojumata peecaejava yabara pelivaisi*

<sup>11</sup> Taniji itaboxo penapatsijava. Tanijinua penioponaecaballo. Bajarapacaballojumata jivitonē eca. Ponē bajarapacaballojumata eca, pevēnē Najumecapanepaya Pejumaitsicuenia Pexanaenē. Itsavēnē Pepo Pexaniajailivaisi Petsipaebinē. Bjaraponē jivi naneconitsiaexana paneconivajētota jivi naneconita. Vajabitsaē ata exana pibisiacuene pexanaevijavabelia.

<sup>12</sup> Pitaxutobeje naitayota. Pacuenia isoto bacotiatsobia, bajara itaxutocotiaitsi. Bjaraponē matapona ayaijava coronanē. Pitapata vēnēruca. Itsiata baitsi jane itsajivi ata apo vēnēyapētaetsi. Ēbjaraponē pijacuata navēnēyapētane.

<sup>13</sup> Penaxatatsijavareca tsobia. Pijanarata pejabutsijava. Bjaraponē pevēnē Diosojamatabēcuenelivaisi itajētsinē. <sup>14</sup> Bjaraponē pēnaponatsi vajabitsaē ayaibitsaētoخانeto, athēbēpijivi. Bjarapamonae naxataba bitso pexaniaviriapapaēbērējavanē, piaxuirajibijavanē, bitso peniojaijavanē. Bjarapamonae ata yapona penioponaecaballuanēta.

<sup>15</sup> Ponē vajabitsaē barēexana, bajaraponē pecuibuatsina pitsapa pexiujaiespada penaneconitsiaex-anaenēxa daxitanacuanēpijivi. Bjaraponē daxitanacuanējava jivi pevetsinēnexa. Itsa

evetsiana, ajumesaëya itorobabiabiana  
 pejumecovënëtsinexatsi. Pacuenia uvaruanë itsa  
 barëmeneyujubataxuaba, ayaibarëmene pitsapa  
 pexanaenexa vinoranë, bajara pijinia pacuenia  
 daxitanacuanëpijivi, pijaneconi pexainaevi, Dioso  
 itsa verebiabiana, ayaijana xuabiana. Dioso,  
 ponë piamatabëcuenesaënë daxitanacuanë  
 pevetsivi matatoxenetsia, ayaicuenia  
 naneconitsiaexanaena bajarapamonae  
 pebaraanaepanaexae. <sup>16</sup> Ponë vajabitsaë  
 barëexana, bajaraponë pijacamisajumavelia  
 penaxatatsijavata, pevënëitanebërëtoyo ruca.  
 Pethaëtojumata ata pevënëitanebërëtoyo ruca.  
 Jumai tsarucæ bajarapaitanebërëtoyo:  
 “Maponëje daxitanacuanë pevetsivi ata pepo  
 pevetsinë. Daxita petuxanevi ata pijatuxanenë,”  
 jai tsarucæ.

<sup>17</sup> Bajaraxuacujinae taenutajë ángelnë, icotiata  
 penucaenë. Pinijijumeta vavajai tsanucæ daxita  
 quequeremonaejavabelia. Jumai tsanucæ ma-  
 pacueniaje:

—Naxanitsia. Panacaetuanare payai-bit-  
 saëtoxanetomë ayaijava panenabaninexa Dioso  
 pejamatabëcueneta. <sup>18</sup> Naxanitsia. Daxita  
 petëpaevi pevi panexaenexa. Paponaremena  
 nacuanë pevetsivimi, vajabitsaë penamata-  
 caitorobivimi ata, vajabitsaë piatatsacavimi  
 ata, pevi panexaenexa. Caballuanëmi,  
 caballuanëjumata peponaevimi ata, pevi  
 panexaenexa. Pamonaemi dajubicuenia  
 pecanajetsivimitsi itsamonaejavabelia amoneya  
 petonacuenebinexa, apo pecanajetsivimitsi  
 ata, beveliajamatabëcuene pexainaevimi ata,

ayaijamatabëcuene pexainaevimi ata, daxita bajarapamonae pevi panexaenexa paponaremena, jai tsanucae ángelnë quequeremonaejavabelia.

19 Bajaraxuacujinae taniji piayainë. Tanijinua daxitanacuanë pevetsivi pijajivi, vajabitsaë, pecaetuatsijava ata. Daxita bajarapamonae nacaetuana vajabitsaë penaexanaenexa. Nexata barë nabia penioponaecaballota peponaenëjavabelia, bajaraponë pijajivijavabelia ata. 20 Nexata penioponaecaballota peponaenë vaetaba piayainë. Vaetaba peyamaxëitojorobiprofetanë ata. Ponë peyamaxëitojorobiprofetanë, jivi peyamaxëitojorobinexa, bajayata pinijicuene exanaponapona piayainë pitabarata. Bajarapacuenia bajayata pinijicuene pexanaexae, peyamaxëitojorobiprofetanë jivi yamaxëitojorobapona. Nexata jivi nacaeveta piayainë pevënëitanetota pitanerubaponaenexatsi. Bajarapacuenia bajayata peyamaxëitojorobiprofetanë jivi yamaxëitojorobapona piayainë jumapecataeya pexanaenëtsijavabelia ata jivi pematabacabëta penavajëcabinexa. Bajaraxuata nexata piayainëbeje, peyamaxëitojorobiprofetanëbeje, xuabaliatsibeje abaxë piasaënëbeje isotopucabelia. Bajarapapuca tajueyabiaba azufre yajava. 21 Nexata daxita bajaraponëbeje pijajivi, pamonae nacopaba, beyejebatsi. Beyejebatsi penioponaecaballota peponaenë, pecuibuatsina pepitsapaeespadata. Nexata jane baja daxita quequeremonae napeneyaba bajarapamonaemi pevi.

## 20

*Pacuenia Juan tane pacuenia itsamatacabi  
Cristo mil pavaibeje evetsijitsia mapanacuae  
yabara pelivaisi*

<sup>1</sup> Icatsia taniji ángelnē perunaejavatsica athēbēvetsica. Cobenarunaica pinijimēthēxaneto pijallave. Cobenarunaicanua ayaicadena-maētoxaneto. <sup>2</sup> Bajarapaángelnē vaetaba dragón, ponē pevēnē Dovathi. Itsavēnē Satanás. Bajaraponē dovathi bajayata itsa naitajēta jivijavabelia, naitajēta bejomocuenia. Nexata ángelnē cētabuata dovathi mil pavaibejenexa.

<sup>3</sup> Pinijimēthēxanetojavareca xuareca. Yavēpaxatatabuata bajarapamēthēxanetojavareca. Pematatsēnēa icatsia sellovēnējavata yamēthēvēpajumacatsata. Nexata dovathi apo caējēpaetsi tsane peyamaxēitojorobinexa mapanacuapijivi mil pavaibeje. Bajaraxuacujinae icatsia isinaenatsi caeepatoyo icatsia jivi peyamaxēitojorobaponaponaenexa.

<sup>4</sup> Bajaraxuacujinae icatsia taniji jivi tronojumata penaevi. Bajarapatronojumata penaevi, Dioso itorobatsi penaneconitsiaexanaenexa jivi, pijaneconi pexainaevi. Tanijinua itsamonae ata, pamonae bajayata vēsiucubejebatsi. Bajarapacuenia bajarapamonaemi bajayata vēsiucubejebatsi tsipaji jivi tsipaebapona Jesús pelivaisi. Tsipaebanajetarubenana Dioso pejumelivaisi. Bajarapamonae apo navajēcae pematatabacabēta piayainējavabelia, piayainē jumapecataeya pexanaenētsijavabelia ata. Apo nacopatsinua piayainē pevēnēitanetota

pitapaitanerubinexatsi. Apo nacopatsinua pecobejumaitanerubinexatsi. Nexata bajaramonaemi icatsia Dioso piasaëyaexanaejavatsi, taniji. Pacuenia ata bajarapamonae mil pavaibeje Cristo barëevetatsi mapanacuaje, taniji. <sup>5-6</sup> Bajarapamonae Dioso asaëyaexanatsi Dioso copiaya jivi piasaëyaexanaematacabita. Bajarapamonae Dioso asaëyaexanatsi caecuenia ayaibitsaëto. ¡Pamonae copiaya Dioso jivi piasaëyaexanaematacabita asaëyaexanatsi, bajarapamonae pejamatabëcuenebarëyavi, planeconijibivinua! Cotocaevi patëpaejavanexa, acuenebi baja itsacueni pexanaenexatsi bajarapamonae. Biji rajane bajarapamonae Dioso, Cristo ata, pijasacerdotevinexa, jivi petocuaicuaijatsabiabivinexa Diosojavabelia. Bajarapamonae Cristo barëevetsianatsi mapanacuaje mil pavaibeje. Itsamonae petëpaevimi, pamonae abaxë nacopabanubena, Dioso icatsia asaëyaexanaenatsi bajarapamil pavaibejecujinae.

<sup>7</sup> Ita baja panepaena mil pavaibeje, dovathi icatsia isinaenatsi mëthëvecua pepitsapaenexa.

<sup>8</sup> Pitsapaena icatsia jivi peyamaxëitojorobinexa daxitanacuanëjava. Bajarapacuenia yamaxëitojorobiana jivi ayaibitsaëtoخانetonë, Dioso apo pejumecovënëtsivi. Nexata bajarapacuenia dovathi vajabitsaë caetuatsiana. Dovathi pijajivi bitso ayaibitsaëtoخانeto tsane. Pacuenia tajetaboatsapërë navita, bajara itsi tsane dovathi pijajivi, vajabitsaë. <sup>9</sup> Bajarapamonae vajabitsaë copiata jivi benajetarubenaena daxitanacuanëjava. Bajaraxuacujinae

matatoyoronaena jane baja Jerusaléntomara peverebiabinexa picani Dioso pijajivi, Dioso piasivatomarata, Jerusalén tomarata, pejinavanapaevi. Itsiata baitsi jane dovathi pijajivi Dioso tsixuabianicatsi isoto athëbëvetsica. Nexata tajuenatsi daxita vajabitsaëmi, dovathi jane baja pijajivimi. <sup>10</sup> Nexata dovathi, ponë jivi yamaxëitojorobaponaena daxitanacuanëjava, xuabialiatsi isotopucalia, azufre yajava petajueyabiabipucalia. Bajarapapucalia baja cajena copiaya xuabatsibeje piayainëbeje peyamaxëitojorobiprofetanëbeje. Nexata bajarajota bajarapamonae Dioso nanekonitsiaexanaenatsi daxitamatacabijavabelianexa. Nexata bajarajota bajarapamonae isoto petajuta bitso jamatabëfaenaena. Bajarapamonae bitso pejamatabëfaenaejava isoto petajuta tsitecaena daxitamatacabijavabelianexa.

*Pacuenia Juan tane pacuenia itsamatacabi jivi nubenaejitsia penioponaetrone pitabarata Dioso penaneconitsiaexanaenexatsi yabara pelivaisi*

<sup>11</sup> Icatsia taniji penioponaetronoxaneto-jumata peecaenë. Bajaraponë nacua baja vereverecaeyaexana. Itaboxo ata baja vereverecaeyaexana. <sup>12</sup> Taenubajë daxita petëpaevimi penubenaexjava Dioso pitabarata. Nubena Dioso penaneconitsiaexanaenexatsi. Bajarapamonae ayaijamatabëcuene pexainaevimi. Itsamonae beveliajamatabëcuene pexainaevimi. Taeyejebajënuu cuyala-tobaxutonë. Bajarapacuyalatobaxutonë baxupanejeba. Bajarapacuyalatobaxutonëta

itanerubena daxita petēpaevimi pacuenia  
 exanavanapa petēpaevajēnaeya mapanacuataje.  
 Itsacuyalatobaxuto ata taeyabuatajē.  
 Bajarapacuyalatobaxuto ata baxupatabuata.  
 Bajarapabaxutota vënërubena pamonaē matababi  
 apo pevereveceajava pexainaevinexa. Nexata  
 caejivi canacujitsia Dioso pijaneconi petoru-  
 taponaeaxetsi, caejivi canacujitsia paneconi-  
 vajēto xaina. Bajarapaneconivajētota Dioso  
 naneconitsiaexanaponatsi. <sup>13</sup> Manuameneta  
 petēpaevimi ata, daxita pitsapaina. Jivi ata  
 petēpaecujinae, pejinavanapaenacuajavavetsina,  
 ira bēxēpanavetsina, daxita pitsapaina. Nexata  
 caejivi canacujitsia paneconivajēto xaina,  
 bajarapaneconivajētota Dioso naneconit-  
 siaexanaponatsi. <sup>14</sup> Bajaraxuacujinae jivi  
 petēpaeyaexanaejamatabēcuenemi, jivi petēpaecujinae  
 pejinavanapaenacuami ata yajava, Dioso xualia  
 isotopucalia. Bajarapapuca jivi cotocaevi  
 patēpaajava petēpaeyaexanaepuca. <sup>15</sup> Pamonaē  
 apo vënërubenaē, pabaxutota vënërubena  
 pamonaē matababi apo pevereveceajava  
 pexainaevinexa, bajarapamonaē peneliatsi  
 bajarapapucalia.

## 21

*Pacuenia Juan tane pacuenia itsamatababi  
 Dioso icatsia pejanaitaboxo, pejananacua yajava,  
 exanaejitsia yabara pelivaisi*

<sup>1</sup> Icatsia taniji pejanaitaboxo, pejananacua  
 yajava. Paitaboxo, panacua ata, Dioso copiaya  
 exana, ajibi baja. Manuamene ata ajibi. <sup>2</sup> Xanē

rabaja Juannē. Taniĵi Dioso pijatomara, pejana Jerusaléntomara. Athëbëvetsica, Diosoĵavavetsica, runaica bajarapatomara. Daxita rabaja Dioso xaniavaeta. Pacuenia petiriva pamonanexa itsa sivapatsijitsiatsi, pevajënae banaxaniavaeteca, bajara pijinia pacuenia Dioso xaniavaeta baja Jerusaléntomara pijajivi petojinavanapaenexatsi. <sup>3</sup> Nexata jumetanĵi pinijijume athëbëvetsica, tronoĵavavetsica. Jumaitsi mapacueniaĵe:

—Taema. Dioso rabaja jivijava ponapona. Dioso baja jivi yajavaponapona daxitamatabijavabelianexa. Bajarapamonae pepo Diosonë pijajivi tsane. Dioso pijinia bajarapamonae pijatuxanenë tsane. <sup>4</sup> Dioso itaxutobarëmeneiquinaponaena bajarapamonae. Ajibi baja tsane petëpaecuene, penuecuene ata, bitso penajamatabëxainaecuene ata, penavixaetaecuene ata. Daxita bajarapitsicuenemi copiarucaena jane baja, jai athëbëvetsica.

<sup>5</sup> Bajaraxuacujinae Dioso, tronojumata peecaenë, jumaitsi:

—Taema. Daxitacuene bajayata taexanae-ĵavami, xuami baja picani vereverecaeyaexanaĵë, pejanajava icatsia exanaĵë, jai.

Bajaraxuacujinae xanëĵavaberena icatsia nejumlahitsi:

—Yaquinare bajaraxuanë pelivaisi. Tsipaji baja palivaisi catsipaebatsi, bajarapalivaisi pexania-jailivaisi cajena. Xanepana nexata daxitajivi pejumecovënëtsinexa bajarapalivaisi, nejai.

<sup>6</sup> Bajaraxuacujinae icatsia nejumlahitsi Dioso, tronojumata peecaenë:

—Daxita rabaja icatsia pejanajava taexanaejava, veretajë. Xanë rajane baja daxitacuene tataxuxuabinë. Daxitacuene icatsia tacopiarucaeyaexanaenënexa. Pacuenia jivi pejamatabëëthëtojavavetsina bitso jitsipa mera piapaenexa, bajara pijinia pacuenia jivi bitso itsa jitsipaena tacapanepaejavanexa, nexata bajarapamonae rajutsianajë matakabi apo peverevereceajava. Tocopatsianajë bajarapamonae amoneya pexainaenexa matakabi apo peverevereceajava itsa jumecovënëta taxënato, Cristo, pesivatëpaejavatsi. Bajaraponë Cristo jivi pejamatabëcueneasaëyaexanaenë. <sup>7</sup> Pajivi tsiteca jumecovënëtaaponapona tajumelivaisi ëpetëpaejavabelianexa, bajarapajivi xanë pijaDiosonënë tsane. Bajarapajivi pijinia taxënatojiviyo tsane. <sup>8</sup> Itsiata baitsi jane pamonaë pejunavivi tajumelivaisi yabara itsamonae pebejiobiaexanaeyanivatsi, pamonaë ata apo tanejumecovënëtsivi, pamonaë ata pitoyavi itsamonae, pamonaë ata pevitota pibisiacuene pexanaevi, bajarapamonae ponaena petajueyabiabipucajavabelia. Pamonaë ata penajorobivi, pamonaë ata jumapecataeya pexanaenëanëjavabelia penavajëcaevi, pamonaë ata penajumetsënëtsivi, daxita bajarapamonae ponaena petajueyabiabipucajavabelia. Bajarapapuca tajueyabiaba azufre yajava. Bajarapatëpaejava cotocaevi jane baja petëpaejava tsane, nejai Dioso, tronojumata peecaenë.

*Pacuenia Juan tane pejana Jerusaléntomara  
pacuenia itsamatakabi itsijitsia yabara pelivaisi*

9 Nexata jane baja rena caenē ángelnē. Bajarapaángelnē siete paángelnēbeje siete pacopabeje piyaijavanē pevēnēcaecopanē pepacaeviyajuvēnēnē. Bajarapaángelnē nexata nejumaitsi:

—Naxanitsia. Catsitajētsianatsi pova Corderonē pijavanexa, nejai ángelnē.

10 Bajaraxuacujinae Espíritu Santo netsijamatabēvēnēca. Nexata bemajitsinaebota ángelnē nebarēpona pinijitsutoxanetojavabelia, piapiatsutoxanetojavabelia. Nexata bajara patsutoxanetojavatalia ángelnē netsitajēta Dioso pijatomara, pinijitomaraxaneto, Jerusaléntomara. Athēbēvetsica Diosojavavetsica runaica bajarapatomara. 11 Bajarapatomara cotianiveniveneca Dioso pijapenivenivena-naecotiata. Pacuenia penamatamotsiiboto jaspevēnēiboto cotianivenivena, bajarapacuenia cotianiveniveca. Nasabanua pacuenia nasaba vidriojava. 12 Bajarapatomara matatoyorotsia yacaranata piaitayaēibopanaxanetota. Bajara payacaranatsijavaxaneto mataropotsia catsanaruba ibopananē. Bajara payacaranatsijavaxaneto apia athēbēabetsia pacuenia pinijinaejavaxaneto apia. Bajara payacaranatsijavaxaneto matatoyorotsia xaina doce pabaupabeje. Nexata ángelevi, caenē canacujitsia, nucapona caebaupa canacujitsia. Bajarapabaupanējava Israelpijinē pexi, doce ponēmibeje, pevēnēanē vēnērubena. 13 Acueyabi pabaupabeje xainapona caeyenepana canacujitsia. Estevēnēnenia payenepana xaina acueyabi pabaupabeje. Nortevēnēnenia pijinia payenepana xaina acueyabi pabaupabeje.

Survënënenia pijinia payenepana xaina acueyabi pabaupabeje. Oestevënënenia pijinia payenepana xaina acueyabi pabaupabeje. <sup>14</sup> Jerusaléntomara matatoyorotsia peyacaranatsiibopanaxanetonexa, ibo penajumaetaponaejavata, copiaya pinijiibotoxanetonë sasavia jebapona, doce paibotoxanetobeje. Bajarapaibotoxanetonë, caeibotoxaneto canacujitsia pejumavelia, Corderonë pijajivi doce ponëbeje, apóstolevi, pevënëanë rubena.

<sup>15</sup> Paángelnë nebarëcuaicuaijai, cobenaponapona oronaebo. Bajarapaoronaebota pecaējëbinexa Jerusaléntomara, pecaējëbinexa baupanë ata, pecaējëbinexa Jerusaléntomara matatoyorotsia peyacaranatsiibopanaxaneto ata.

<sup>16</sup> Jerusaléntomara matatoyorotsia peyacaranatsiibopanaxaneto, daxitayenepananë namatajëpaeya apia. Pacuenia apiareca matonotsiareca payenepanabeje, bajara pijinia pacuenia apialia epatajërëtsialia ata payenepanabeje. Nexata jane baja ángelnë pecaējëbinaebota caējëba Jerusaléntomara. Nexata Jerusaléntomara matonotsiareca piapiajava xaina dos mil doscientos pakilómetrobeje. Epatajërëtsialia ata xaina bajarapacuenia, dos mil doscientos pakilómetrobeje. Athëbëabetsia ata piapiajava bajarapacuenia xaina, dos mil doscientos pakilómetrobeje. <sup>17</sup> Bajaraxuacujinae ángelnë caējëba Jerusalén tomara matatoyorotsia peyacaranatsiibopanaxaneto peyapëtaenexa paitayaëtovajëto xaina. Jerusaléntomara matatoyorotsia peyacaranatsiibopanaxaneto, paitayaëjava xaina sesenta y cuatro pametrobeje.

Pavirianaebota mapanacuapijivi bacaējēba, bajarapavirianaebota ángelnē caējēba.

<sup>18</sup> Jerusaléntomara matatoyorotsia peyacaranatsiibopanaxaneto, exana jaspevēnēibota. Jerusaléntomara ėorojavanēta pexanaetomara. Nexata Jerusaléntomara nasaba bitso. Pacuenia bitso nasaba piaxuirajibividriojava, bajara itsi.

<sup>19</sup> Jerusaléntomara matatoyorotsia peyacaranatsiibopanaxanetonexa, itsa taxuxuaba pexanaejava, copiaya pinijiibotoxanetonē sasavia tsivajēnaejeba. Bajarapaibotoxanetonē itabētsiaya jumacatsanaruba daxitaviria ibotonēta, bitso penamatamotsiibotonēta. Penamataxainaeibotoxaneto itabēta jaspevēnēibotonēta. Pecotocaeviibotoxaneto itabēta zafirovēnēibotonēta. Acueyabiibotoxaneto itabēta ágatavēnēibotonēta.

Cuatroibotoxaneto itabēta esmeraldavēnēibotonēta.

<sup>20</sup> Cincoibotoxaneto itabēta ónicevēnēibotonēta. Seisibotoxaneto itabēta cornalinavēnēibotonēta. Sieteibotoxaneto itabēta crisólitovēnēibotonēta. Ochoibotoxaneto itabēta berilovēnēibotonēta. Nueveibotoxaneto itabēta topaciovēnēibotonēta.

Diezibotoxaneto itabēta crisoprasavēnēibotonēta.

Onceibotoxaneto itabēta jacintovēnēibotonēta.

Doceibotoxaneto itabēta amatistavēnēibotonēta.

<sup>21</sup> Doce rabaja pabaupabeje. Doce rabaja pijinia paperlavēnējavatabeje, bitso penamatamotsijavanēta, exana caebaupa canacujitsia. Bajarapatomarata caecalle ruca daxitacallevecua bitso ayaicallexaneto. Bajarapacalle ėorojavanēta pexanaecalle. Nasaba bitso. Pacuenia nasaba vidriojava, bajara itsi.

<sup>22</sup> Bajarapatomarata apo taenē templobo.

Itsiata baitsi jane daxita bajarapatomara betemplo. Bajarapacuenia betemplobo tsipaji Dioso, daxita mapanacuata jivi pevetsivi matatoxenetsia piajamatabëcuenesaënë, Corderonëbeje, ponaponabeje bajarapatomarata. <sup>23</sup> Dioso ayaijamatabëcuenenë pijapenivenivenaecotiata itayota bajarapatomara. Corderonë ata itayota pijapenivenivenaecotiata bajarapatomara. Bajaraxuata apo namatavenonae bajarapatomarata pitayotsinexa matacabipijijuameto, meravipijijuameto ata. <sup>24-26</sup> Daxitanacuanëpijivi, pamonae baja Dioso capanepatsi pijaneconivecua, bajarapamonae itsamatacabi jinavanapaena Diosobeje Corderonëbeje pijapenivenivenaecotiata. Daxitanacuanë pevetsivi pijatomaranëjavaverena capatsiana bajarapatomaraberena bitso penamatamotsijavanë, Dioso yaiyataeya perajutsinexa. Daxitamatacabijavabelianexa, bajarapatomara baupatanutsiana. Bajarapatomarata ajibi tsane meravi. <sup>27</sup> Itsiata baitsi jane bajarapatomaraberena pibisiajamatabëcuene pexainaevi, apo jone tsane. Piauracuene pexanaevi, penajumetsënëtsivi ata, apo jone tsane. Jonena ëpamonae vënërubena Corderonë pijacuyalatobaxutota. Corderonë pijacuyalatobaxutota vënërubena pamonae matacabi apo peverevereceajava pexainaevinexa.

## 22

<sup>1</sup> Bajaraxuacujinae icatsia ángelnë netsitajëta pepamene, bitso pitaranaemene. Nasaba bitso. Pacuenia vidriojava nasaba, bajara itsi.

Bajarapamene jivi petëpaejavavecua piaitavayaex-  
 anaemene. Bajarapamene pitsaparena  
 Diosobeje Corderonëbeje pijatronojavaverena.  
<sup>2</sup> Bajarapamene bocapona ayaicallexaneto  
 tuatuajëareca. Bajarapamene itapayareca  
 anijamuxubërëneniabeje nubena naejavanë,  
 jivi petëpaejavavecua piaitavayaexanaenaenë.  
 Bajaraponaenë caevaita nacuaitapona doce  
 panacuaitisibeje. Caejuameto canacujitsia  
 nacuaitapona. Bajaraponaenë pebaxuta  
 xanepana daxitanacuanëpijivi penavaëbinexa,  
 pejamatejemanexa piavitanejavavecua.  
<sup>3</sup> Nexata bajarapatomarata ajibi tsane jivi  
 pejamatabëcuenebijianaejavanexatsi. Nexata jivi  
 pibisiacuene apo exanae tsane. Diosobeje  
 Corderonëbeje pijatronota ecaenabeje pijajivi  
 pitorobabiabinexabeje daxitamatacabijav-  
 abelianexa bajarapatomarata. Nexata daxita  
 pamonaе Dioso pijajivi, pexaniajamatabëcuene  
 rajutsiana Diosojavabelia. <sup>4</sup> Bajarapamonae  
 Dioso itabarataena. Dioso pevënë ata  
 rucaena bajarapamonae pitapathaitota.  
<sup>5</sup> Bajarapatomarata ajibi tsane meravi. Pepo  
 petuxanenë Dioso pijapenivenivenaecotia  
 itayotsiana. Nexata bajarapatomarata  
 pejinavanapaevi apo namatavenonae tsane  
 lámparacotia, matabipijijuametocotia ata.  
 Pamonaе jinavanapaena Dioso pijanacuata,  
 Dioso pijanacua barëevetsianatsi daxitamatacabi-  
 javabelianexa.

*Pacuenia baja imoxoyo pevajënae Jesucristo  
 pepatsijavanexatsica yabara pelivaisi*

<sup>6</sup> Icatsia ángelnë nejumlahtsi:

—Palivaisi baja yaquiname, pexaniajailivaisi cajena. Daxita xua yabara yaquiname, pepacuene copiapatsiana. Dioso baja cajena bajayata tajëvelia yapëtaeyaexana profetavimi peyapëtaenexa pacuenia itsamatacabi itsijitsia mapanacuataje. BajarapaDiosonë icatsia itoroba pijaángelnë. Nexata Dioso pijaángelnë tsitajëta Dioso pijajivijavabelia, Dioso pijajivi peyapëtaenexa pacuenia baja imoxoyo pevajënae pecopiapatsinexa xua copiapatsijitsia mapanacuataje, nejai ángelnë.

<sup>7</sup> Icatsia ángelnë nejumlahtsi:

—Jesús raja jumaitsi: “¡Bepijia patsianicajë!” jai. ¡Nexata pajivi jumecovënëta Dioso pejumelivaisi, neyaquinaelivaisi mapabaxutotaje, bajarapajivi jamatabëcuenebarëya tsane Jesús itsa patsianica! nejai ángelnë.

<sup>8</sup> Xanë rabaja Juannë, daxita baja palivaisi yaquinajë, jumetaniji. Tanijinua. Bajaraxuacujinae ángelnë, ponë netsitajëta daxita bajaraxua, pitabarata yaiyataeya picani tamatabacabëta tonucajë. <sup>9</sup> Itsiata baitsi jane ángelnë nejumlahtsi:

—Pëtsa bajaraxua exaname. Tsipaji saya xanë ata Dioso pijajivitonënë. Pacuenia xamë, pacuenia itsamonae ata, pamona Dioso jumepaebivi profetavi, pacuenia ata pamona jumecovënëtsiana mapabaxutotaje neyaquinaelivaisi, bajara saya xanë ata taitsinë. Nexata Dioso yaiyataeya nematabacabëta tonucare nevajëtsinexa Diosojavabelia, nejai ángelnë.

<sup>10</sup> Icatsia ángelnë nejumaitsi:

—Pëtsa nejumeyavajunuaxainame Dioso pejumelivaisi, neyaquinaelivaisi mapabaxutotaje. Tsipaebianame daxitajivijava daxitajivi peyapëtaenexa. Tsipaji rabaja imoxoyo pevajënae pecopiarucaenexa mapanacuaje. Pacuenia baja cajena Dioso tajëvelia najumecapanepaeya jumaitsi, bajarapacuenia Dioso exanaena.

<sup>11</sup> Neponaponaepato abaxë mapanacuataje, tocopare pibisiacuene pexanaponaevi, pibisiacuene pexanaejava pecatsitecaenexa. Ëpibisiacuene yabara penajamatabëxainaevi ata, tocopare pecatsitecaenexa penajamatabëxainaejava ëpibisiacuene yabara. Itsiata baitsi jane pijinia pamona pexaniacuene pexanavanapaevi, catsitecae pevajënaeyabelia pexaniacuene pexanavanapaejava. Pamona ata Dioso aneconijibia tanetsi pejumecovënëtsixae Jesucristo pesivatëpaejavatsi, casaë pevajënaeyabelia aneconijibia pejinavanapaenexa, nejai ángelnë.

<sup>12</sup> Icatsia ángelnë nejumaitsi:

—Jesús raja jumaitsi: “Panejumetaema. Bepijia patsianicajë. Capatsianicajë tajajivi tarajutsijavanexa. Bajaraxua rajutsianajë caejivi canacujitsia, pamona xaniavaetsia netonacuenebavanapa. Pamona pijinia pibisiacuene exanavanapa, naneconitsiaexanaenajë. <sup>13</sup> Xanë rajane baja daxitacuene tataxuxuabinë. Daxitacuene icatsia tacopiarucaeyaexanaenënexa,” jai raja Jesús, nejai ángelnë.

<sup>14</sup> Icatsia ángelnë nejumaitsi:

—Jamatabëcuenebarëya baja pamona  
pibisiacuene pexanaeconimi Dioso vecuaa-  
jibiaexanatsi, pejumecovënëtsixae Jesucristo  
pesivatëpaejavatsi. Bajarapamonaes itsamatacabi  
Dioso tocopatsianatsi penajonenexa Dioso  
pijatomara baupanëjava. Tocopatsianatsinua  
jivi petëpaejavavecua piaitavayaexanaenae  
pecuaixaenexa. <sup>15</sup> Itsiata baitsi jane daxita  
pamonaes Dioso apo pejumecovënëtsivi,  
nacopabanubenaena Dioso pijatomarajumavelia.  
Nacopabanubenaena pamonaes bitso  
ëpibisiacuene pexanaevi, penajorobivi ata,  
pevitota pibisiacuene pexanaevi ata, jivibevi  
ata, jumapecataeya pexanaenëanëjavabelia  
penavajëcabiabivi ata, bitso penajumetsënëtsivi  
ata. Daxita bajarapamonaes nacopabanubenaena  
Dioso pijatomarajumavelia, nejai ángelnë.

<sup>16</sup> Nexata Jesús nejumaitsi:

—Xanë rabaja Jesúsne. Itorobajë tajaángelnë  
pecatsipaebinexa palivaisi baja catsipaeba.  
Bajarapacuenia itorobajë daxita Dioso  
pejumecovënëtsivi peyapëtaenexa palivaisi  
baja tajaángelnë catsipaeba. Xanë rabaja  
nacuaevetsinëmi Davidpijinë pemomoxiya-  
juvënëne. Xanë rabaja tjamatabëcueneitayotsinë  
daxitajivi pexaniajailivaisita, nejai Jesús.

<sup>17</sup> Espíritu Santo jumaitsi. Petiriva ata, pova  
Corderonë pijavanexa, bajarapova ata jumaitsi.  
Jumaitsibeje Jesúsjavabelia mapacueniaje:

—Naxanitsiayo patsianimica, jaibeje.

Pamonaes jumetane bajarapacuenia pejumaitsi-  
javabeje Jesúsjavabelia, bajarapamonaes ata beju-  
maitsi Jesúsjavabelia:

—Naxanitsiayo patsianimica, bejai bajarapamonae ata.

Pacuenia jivi pejamatabëëthëtojavavetsina bitso jitsipa mera piapaenexa, bajara pijinia pacuenia jivi bitso itsa jitsipaena Dioso pecapanepaejavanexatsi, nexata bajarapamonae Dioso rajutsianatsi matabi apo pevereverecaejava. Tocopatsianatsi bajarapamonae amoneya pexainaenexa matabi apo pevereverecaejava itsa jumecovënëta Cristo pesivatëpaejavatsi. Tsipaji Cristo jivi petëpaejavavecua piaitavayaexanaenë.

<sup>18</sup> Daxita pamonae leba Dioso pejumelivaisi, tayaquinaelivaisi mapabaxutotaje, jamatabëcuenereviaya tsipaebijitsianë roviaia mapacueniaje. Mapabaxutotaje tayaquinaelivaisi itsajivi icatsia saicayalivaisi mataropotsia itsa yaquinaena, bajarapajivi naneconitsiana Diosojavabelia. Nexata Dioso naneconitsiaexanaenatsi. Papiayaicue yabara jumaitsi mapabaxutotaje, bajarapacue Dioso taeyaexanaenatsi bajarapajivi.

<sup>19</sup> Mapabaxutotaje tayaquinaelivaisi, itsajivi itsa xuabiana itsalivaisiyo, nexata bajarapajivi naneconitsiana Diosojavabelia. Nexata bajarapaneconijamatabëcueneta bajarapajivi vënëyaquinae atatsi pabaxutota vënërubena daxita pamonae matabi apo pevereverecaejava pexainaevinexa, matabi apo pevereverecaejava apo xinae tsane. Dioso pijatomarabetsia ata pejonenexa, apo tocopatsi tsanetsi. Pabaxutota vënërubena matabi apo pevereverecaejava pexainaevinexa pelivaisi, Dioso pijatomara ata pelivaisi, jumaitsi mapabaxutotaje.

<sup>20</sup> Jesús, ponë itoroba pijaángelnë tanetsi-  
paebínexa pacuenia itsamatacabi itsijitsia  
mapanacuataje, bajaraponë nejumaitsi  
mapacueniaje:

—Bepijia patsianicajë, jai.

Nexata xanë jumaitsinë:

—Je. Xanepana rabaja. Jesús pepo petuxa-  
nenëmë, ¡naxanitsiayo patsianimica! janë.

<sup>21</sup> Pacatovajëtatsi daxita paxamë vajatuxanenë  
Jesucristo papecayavenonaenexa. Bajara itsi  
tsane.

**Dios pejumelivaisibaxuto  
pejanalivaisibaxuto  
New Testament in Guahibo**

copyright © 2011 Wycliffe Bible Translators, Inc.

Language: Guahibo

Translation by: Wycliffe Bible Translators, Inc.

**Copyright Information**

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Guahibo

**© 2011, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-08-06

---

PDF generated using Haiola and XeLaTeX on 11 Nov 2022 from source files  
dated 29 Jan 2022  
bc03f416-faf8-5000-bfb5-5ca8a3fa98cf